


四書述

論十五之二十



| | | | | |
|---|---|---|---|-----|
| | | | | 漢書門 |
| | | 八 | 九 | |
| | 九 | 九 | 九 | |
| 二 | 九 | 五 | 九 | |
| 冊 | 架 | 函 | 號 | 類 |

| | | | |
|------|---|---|----|
| 內閣文庫 | | | |
| | | | 漢書 |
| | | 八 | |
| | | 五 | |
| | 九 | 九 | |
| 二 | 九 | 九 | |
| 冊 | 架 | 函 | 號 |

| | | |
|------|-----|-------|
| 內閣文庫 | | |
| 番號 | 漢 | 8599 |
| 冊數 | 12 | (6) |
| 函號 | 277 | 133 |



衛靈公第十五

凡四十一

淺草文庫藏

衛靈公問陳於孔子孔子對曰俎豆之事則嘗聞之矣軍旅之事未之學也明日遂行

陳去聲

陳謂軍師行伍之列俎豆禮器尹氏曰衛靈公無道之

君也復有志於戰伐之事故答以未學而去之

問靈公問陳而夫子遂行何也朱子曰為國以禮戰陳之事非所宜先夫子往來於衛為日最久所以啓告公者亦已詳矣乃一無所入至是而猶問陳焉則其志可知故對以未學而去之

穎濱蘇氏曰孔子以禮樂遊於諸侯世知其篤於學而已不知其他犁彌謂景公曰孔子知禮而無勇衛靈之所以待孔子者始亦知矣然其所以知之者猶犁彌也久而厭之將傲之以其所不知而問陳焉孔子知其決不用也故明日遂行使誠用之雖及軍旅之事可也

勉齋黃氏曰夾谷之會則以兵加萊人而齊侯懼賁人之亂則命將士以伐之而費人又北又嘗曰我戰則克乃對衛靈公以軍旅未學答孔文子以甲兵未學大槩軍甲非衛所急也
 蔡虛齋曰靈公大病全錯在禮教上故對以俎豆分明救時致誠倘公能悟豈有後來父子相爭之禍耶

在陳絕糧從者病莫能興

從去聲 孔子去衛適陳興起也

金瑯山曰孔子去衛適曹宋宋遭匡人之難復適陳會吳伐陳陳亂絕糧只是無上下之交耳

子路愠見曰君子亦有窮乎子曰君子固窮小人窮斯濫矣

見賢遍反 何氏曰濫溢也言君子固有窮時不若小人窮則放濫為非程子曰固窮者固守其窮亦通 愚謂聖人當行而行無

所顧慮處困而亨無所怨悔於此可見學者宜深味之

或問固窮有二義朱子曰固守其窮恐聖人一時答問之辭未遽及此蓋子路方問君子亦有窮乎答曰君子固是有窮不如小人窮則濫耳以固字答上文亦有字文勢乃相應
 甯軒張氏曰子路之愠以為夫子之德之盛疑其不當窮也此不幾於不受命乎夫子答之之意以為命之不齊君子小人皆有窮也特君子能忘而小人失其守也

胡氏曰當行而行不計其後也無所怨悔觀固窮之語可見也學者之進退能於是而取則焉則不為利害所奪窮達所移矣
 徐勿齋曰靈公問陳孔子之所拒子路之所喜也倘孔子以軍旅投則子路遂其三軍之志又安有愠見之色夫曰窮莫窮於軍旅富莫富於俎豆蓋軍旅用則孤人之子寡人之婦窮在天下國家更甚惟俎豆用則破斧赤烏可以並行敬義鷹揚可以並發正一片救時深心惜靈公不知復問故夫子寧身受其窮而明日遂行也

金瑯山曰易困卦云困亨貞又云困而不失其所亨言身雖困道自通也固窮即此意

子曰賜也女以予爲多學而識之者與

女音汝識音志與平聲下同 子貢之學多而能識矣夫子欲其知所本也故問以發之

朱子曰聖人未嘗不博學多識然却在一以貫之今人只博學多識而無一以貫之然不博學多識則又無物可貫孔子實是多學無一事不理會過只於多學中有一以貫之耳曾子領會一貫之旨發出忠恕是從源頭上面流下來子貢是從下面推上去
徐勿齋曰喚醒子貢處全在女予二字分別者與二字今之自參

對曰然非與

方信而忽疑蓋其積學功至而亦將有得也

蔡虛齋曰卒然之間以多識合於已之所得力故以爲然旋疑夫子豈專用心於外其得力當不在是故曰非與能疑是他將悟處

曰非也予一以貫之

說見第四篇然彼以行言而此以知言也 謝氏曰聖人之道大

矣人不能遍觀而盡識宜其以爲多學而識之也然聖人豈務博者哉如天之於衆形匪物物刻而彫之也故曰子一以貫之德輶如毛毛猶有倫上天之載無聲無臭至矣尹氏曰孔子之於曾子不待其問而直告之以此曾子復深喻之曰唯若子貢則先發其疑而後告之而子貢終亦不能如曾子之唯也二子所學之淺深於此可見愚按夫子之於子貢屢有以發之而他人不與焉則顏曾以下諸子所學之淺深又可見矣

朱子曰子貢致知之功已至意其於一事一物之中各有以知其理之當然而未能知夫萬理之爲一廓然無所不通也聖人當其可而問之發其疑而告之使知所謂衆理者本一理也以是而貫通之則天下事物之多皆不外乎是而無不通矣夫子一貫之理謂五常百行人倫物理紛紜雜操不可名狀是可謂有萬而不同者矣然一體該乎萬有而萬殊歸乎一原循其本而觀之則固一矣卽其用而驗之則是其本行乎事物之間斯所謂一以貫之者也聖人生知固不待多學而識學者非由多學則無以識其全也故必格物窮理以致其博主敬力行以反諸約及夫積累既久豁然貫通則向之多學而得之者始有以知其一本而無二矣子貢能聞言而悟不逆於心觀夫子於曾子之外獨以告子貢則其不躐等而施者抑可見矣

新安陳氏曰彼以吾道冠於一以貫之上此自多學而識說起但云子一以貫之可見彼言行此言知也

潛室陳氏曰既是一貫本不可分知行緣子貢以知識入道故聖人從他明處指點以忠恕而明一貫驗得是行以知識而明一貫驗得是知一貫固不可分但向人語處入頭各有塗轍

袁氏曰曾子聞一貫之說唯而無疑固已深領聖道子貢雖未能

如曾子之唯而亦未如門人何謂之問是子貢亦默契於言下矣蔡虛齋曰天下無一人無一貫的道理何也心之虛靈知覺具衆理而應萬事者人所同也聖人一貫不過全此良知物至卽照隨其千端萬緒隨取隨得有一以貫其所不一不似多識者記得一件纔識得一件也子貢徒博夫子則有約以御博要之能由格物而至於知至則多學亦可以造於一貫矣

金鄂山曰學識是子貢前此從事處喚賜喚女又說以予爲是夫子現身醒發子貢處却不遽說一貫卒乍間子貢不暇思索只舉素所見者承當旋疑旋問夫子先將非也二字截住便明指出一貫與他說方見從前子貢不但錯認了予併自家錯認了賜此子貢所以默然領受而無言也前後總在本文無字句處看出聖賢直捷虛實語意頗子博我以文二句及孟子博學詳說將以反說約便是此章註脚要知一貫微存別處曾子直得聖道之傳故直從吾道說起一以貫貫的是道子貢知仲尼之學邇之識大識小之賢故從學識說來一以貫貫的是學朱子謂學識後方得到一貫羅近溪謂要一貫去學識朱子是有散錢要索子近溪是有索子尋散錢同異各別高下自殊

子曰由知德者鮮矣

鮮上聲 由呼子路之名而告之也德謂義理之得於己者非已
 有之不能知其意味之實也 自第一章至此疑皆一時之言此
 章蓋為愠見發也

覺軒蔡氏曰呼子路告以知德之鮮謂義理有得於己則死生禍
 福得喪自不能亂其所守所以釋其愠見之惑
 雙峰饒氏曰不日知道而日知德德與道不同知在行先日知道
 知在行後則日知德知在行先則道未為我有猶未親切知在行
 後則此道實為我有而知之也深既知得這裏面滋味則外面世
 味自不足以奪之子路未能實有是德於己所以纔絕糧便愠見
 雲峰胡氏曰詳集註之意不徒重在知字而重在德字蓋義理之
 味無窮必實得於己而後真知其味之實不然臆度之知非真知
 也夫苟真知之區區窮達豈足為欣戚哉
 金瑯山日子路兼人無所取裁只是不知由誨女知六言六蔽此

云知德每從知處教他德即德之不修的德字知德二字宜連看
 不可析看劈空呼由直捷喚醒鮮字暗擊子路身上說知德者鮮
 政欲迫人以知而不
 不絕人於德也。

子曰無為而治者其舜也與夫何為哉恭己正南面而已矣

與平聲夫音扶 無為而治者聖人德盛而民化不待其有所作
 為也獨稱舜者紹堯之後而又得人以任眾職故尤不見其有為
 之迹也恭己者聖人敬德之容既無所為則人之所見如此而已
 雙峰饒氏曰集註分兩節一節說聖人德盛而民化不待其有所
 作為此是眾聖人之所同一節說舜紹堯之後又得人以任眾職
 故尤不見其有為之迹此是舜之所獨
 蔡虛齋曰自古德盛遇隆無為而治者其惟舜與追而摹之彼曾
 何所作為哉惟恭己南面而已矣恭己南面分明居其所為政以
 德意象不為之為也此句雖非無為之實而益以顯其無為與堯



之德不可名。其可見者。功業文章而已。語氣相似。不勝仰慕之意。
金耶山曰。無爲與行所無事參看。治字不可忽。恭已正南面。卽舜
一段真精神。默運於上。不動聲色。處如歷試諸艱。選賢任職。撥亂
反治。凡治處皆是。無爲非以荒寧爲無爲也。無爲而治二句。只。要
跌出恭已句來。夫何爲哉。就上文喚起下文。恭已須想他與天同
德。物無疵厲氣象。人見爲恭已。舜不自知也。首二句。都說盡。下不
過申上意而已矣。却還有形容不盡處。與替堯無名意同。狀舜之
心。曰。不與。雖其容警于。而不可謂之與也。狀舜之治。曰。無爲。雖封
山濬川。誅凶舉。豈而不可謂之爲也。孔子稱大哉堯之爲君。稱舜
無爲而治。孟子稱君哉舜。豈無所用心。一也。

子張問行

猶問達之意也

子曰言忠信行篤敬雖蠻貊之邦行矣言不忠信行不篤敬雖州里
行乎哉

行篤行不之行去聲貊亡百反 子張意在得行於外故夫子反

於身而言之猶答于祿問達之意也篤厚也蠻南蠻貊北狄二千

五百家爲州

雙峰饒氏曰忠是出於心者信是見於事者凡事詳審不輕發重
厚深沉是篤凡事小心謹畏不敢慢易是敬告以如此則行如彼
則不行論理之辭下方教以下手工夫

朱子曰篤有厚重深沉意敬而不篤則有拘迫之意忠如口裏如
此心下不如此是不忠信是口裏如此說却不如此做是不信忠
是前一截事信是後一截事若前一截實後一截虛便不可

新安陳氏曰忠信篤敬乃言行當然之理工夫全在忠信篤敬念
念不忘入字上惟念念不忘於心而後常如見於目忠信篤敬吾
心此理也州里之人與蠻貊之人亦皆此心此理也盡吾之心則
通乎人心雖遠而可行不盡吾心則無以通乎人心雖近而不可
行矣夫然後行難其辭以深著行必存誠之意

蔡虛齋曰忠信則信必由衷斯誠能動物篤敬則敬極其至斯奏

假無言。此心相通處便是行。

雙巖金子曰。州里亦是借境。見得舉足盡為迷途。跬步悉非順境。與正牆面而立同意。

立則見其參於前也。在與則見其倚於衡也。夫然後行。

參七南反。夫音扶。其者指忠信篤敬而言。參讀如母往參焉之。參言與我相參也。衡軛也。言其於忠信篤敬念念不忘。隨其所在。常若有見。雖欲頃刻離之而不可得。然後一言一行自然不離於忠信篤敬。而蠻貊可行也。

朱子曰。參前倚衡。謂言必欲其忠信。行必欲其篤敬。念念不忘。而有以形於心目之間。是學者存誠工夫。令自家實有這個道理。鎮在眼前不相離去。

沈無回曰。首節行不行。是論其理。次節是熟後境界。下手工夫。全在虛處。令其自悟。夫然後二字宜玩。必如此然後行。不如此便不可行。此正是教他下工夫處。立則一句。是熟後工夫之妙。滾滾不離。常在目前。若把忠信篤敬。眼眼窺著。此與司馬公常念一中者何異。

子張書諸紳

紳大帶之垂者。書之欲其不忘也。程子曰。學要鞭辟近裏著。而已博學而篤志。切問而近思。言忠信。行篤敬。立則見其參於前。在與則見其倚於衡。卽此是學質美者。明得盡渣滓。便渾化却與天地同體。其次惟莊敬以持養之。及其至則一也。

金瑯山曰。此心與天下相通處。便是行。言行君子之樞機。誠敬為本。工夫全在實地去做。信曰忠。信敬曰篤。敬信必忠。而後無言。信敬必篤。而後無行。不敬。忠就貫在信裏。面篤就貫在敬裏。面信。氏云。篤自篤。敬自敬。蒙引云。篤不薄。敬則不苟。皆分作四項。非也。

言如此則行，不如如此則不行。只是論個理。參前二句，方是工夫。言此心不忘，敬信觸處提醒。即太甲顧諟之義。二語便見須臾不離。意近不見州里，遠不見蠻貊。只見吾立之前，吾興之前，無言行而非敬。信這便是信之忠，敬之篤。則行之天下，皆吾前之境，衡之境。一般夫然後行，就在參倚時行，不必推向後一步。猶言如此方行。非先後之後行，可易言哉。言外見不如此，即難行。意書紳亦是效參倚的意思。然欲由象識心，亦是反身機括。張子韶云：表裏分明，都見了區區，何必更書紳。遂有云：參倚見裡，無見無所不見。書紳見表，有見有不見之說者，然俱不必。

子曰直哉史魚邦有道如矢邦無道如矢

史官名魚，衛大夫名鱮，如矢言直也。史魚自以不能進賢退不肖，既死猶以尸諫，故夫子稱其直事見家語。

君子哉蘧伯玉邦有道則仕邦無道則可卷而懷之

伯玉出處合於聖人之道，故曰君子。卷收也，懷藏也。如於孫林父、甯殖放弑之謀，不對而出，亦其事也。楊氏曰：史魚之道，未盡君子之道。若蘧伯玉，然後可免於亂世。若史魚之如矢，則雖欲卷而懷之，有不可得也。

南軒張氏曰：史魚只可謂之直，能伸而不能屈，未盡君子之道。若伯玉，則能因時屈伸，故謂之君子。直者德之一端，君子者成德之名。然夫子只是賢二子，非有品題其高下之意。金梅巖曰：二節只宜開說，因史魚伯玉當時所處，分義各有當然處。故論次如此，不可將史魚來形容伯玉，硬分軒輊。集註圈外楊氏一條，便似專取伯玉直哉一節，乃譏史魚不能免亂。又朱子云：直固好，一向直便是偏，豈得如伯玉之君子，俱非夫子本旨。金瑯山曰：史魚伯玉一成爲直臣，一不失爲君子，此是二大夫合傳。龍門書法本此，衛自獻至靈，大抵皆無道之世，無道而如矢，必無事之時，而有道操持有守可知。伯玉周旋四朝，大抵皆仕之日。

無道之時。如孫林父甯殖放弑之謀不對而出。亦是卷懷處。平平叙列。不分優劣。

子曰可與言而不與之言矣。人不可與言而與之言矣。知者不失

人亦不失言

知去聲

勉齋黃氏曰。不與之言。不知其可與言也。與之言。不知其不可與言也。故惟知者不失人。人亦不失言。

新安陳氏曰。惟智者為能知人。知人之可與言。或不可與言。不知人。則當語而默。當默而語。非失人。則失言矣。

金那山曰。只泛就與人說。不專主施教說。知者無失。總是先知得人的可與不可與。言不言各有權度不爽處。知者一字最重。蒙引

云。用功不在語默上。在知人上。知人尤在居敬窮理。最是看本文亦字。言不言皆當可。重不失人邊者。若有云言者因人而施。失人

亦是失言處。當重言說亦非。

子曰志士仁人無求生以害仁。有殺身成仁

志士有志之士。仁人則成德之人也。理當死而求生。則於其心有

不安矣。是害其心之德也。當死而死。則心安而德全矣。程子曰

實理得之於心。自別實理者。實見得是。實見得非也。古人有捐軀

隕命者。若不實見得惡。能如此。須是實見得生。不重於義。生不安

於死也。故有殺身以成仁者。只是成就一個是而已。

朱子曰。志士仁人。所以不求生以害仁。乃心中自有打不過處。不

忍就被害此。所以成仁者。但遂其良心之所安而已。所安者。理也。

殺身成仁。只是義當殺身。即是成仁。若為成仁而殺身。便是利心。

死生是大關節。工夫不全在臨時學。者須於日用間。不問事之大小。皆欲即於義理之安。然後臨死生之際。庶幾不差。若平常應事。義理合如此處。都放過。到臨大節。未有不可奪者也。

雙峰饒氏曰。仁人與仁為一。仁為我有矣。志士與仁猶二。但有志於為仁。仁人自然無求生害仁。有殺身成仁。志士亦能勉而為之。

伯勳

比干是仁人。豫讓張巡是志士。
新安陳氏曰：志士志於仁而勉行，未及仁人之安行，然不以生死動心。而虧此仁，則一也有無二字。一正一反，一氣說，兩以字，不要作用力字解。成仁與取義有別，仁以心之全德言，義以身之大節言。成仁包得取義，取義即所以成仁。孔子就本心安適處，故曰：成仁。孟子就切身斷制處，故曰：取義。其為成就一個是，則一而已。蓋仁義體一而用殊，故君子之於事，有以仁決者，有以義決者。以仁決者，此章是也。以義決者，孟子謂欲有甚於生惡有甚於死是也。蓋仁人，不以所惡傷所好之體，義士，不以所賤易所貴之宜。
金瑯山曰：志士，仁人不平對，志士有志之士。士惟志於仁，害仁便是不仁。成仁乃完。此志，殺身是從盡處說。言自古皆有死，臨死生大節處，自然死得恰好，方是成仁。觀下文只說仁字，只承上並說殺身成仁可見，仁不專於死，有不殺身而成仁者，同之何敢死是也。有不求生而害仁者，召忽之死是也。只審是與不是，是處方是仁，非取必於殺身也。但無求生之心，殺身不殺身，俱是仁。必有一毫私意於其間，則貪生輕死，俱不足言仁。

子貢問為仁。子曰：工欲善其事，必先利其器。居是邦也，事其大夫之

賢者友其士之仁者

賢以事言。仁以德言。夫子嘗謂子貢悅不若已者，故以是告之。欲其有所嚴憚切磋以成其德也。程子曰：子貢問為仁，非問仁也。故孔子告之以為仁之資而已。

勉齋黃氏曰：大夫言賢已見於行事也。士言仁方見於修身也。
慶源輔氏曰：事大夫之賢者，則有所觀法而起嚴憚之心。友其士之仁者，則有所切磋而生勉勵之意。其所以為仁者力矣。
汪氏曰：此專挑為字發明之。問意重在此字。故夫子答之只從此字發明其意也。資助也。工欲二字亦不虛。必先辦了為仁的真心，然後仁賢為我益。

金瑯山曰：工欲善事欲字。正答他為字。心無所欲為，必不着力。學者謙冲虛受，自然獲益。事與友不徒在形迹，全是為仁精神相浹洽處。只一意與仁賢磨厲，便不覺悚惕振奮起來，便不容別念頭夾雜在內。便是為仁。不然精神不到，雖日與仁賢遊處，并格不入。

與仁何涉事
友須重看。

顏淵問為邦

顏子王佐之才故問治天下之道曰為邦者謙辭

子曰行夏之時

夏時謂以斗柄初昏建寅之月為歲首也天開於子地闢於丑人
生於寅故斗柄建此三辰之月皆可以為歲首而三代迭用之夏
以寅為人正商以丑為地正周以子為天正也然時以作事則歲
月自當以人為紀故孔子嘗曰吾得夏時焉而說者以為謂夏小
正之屬蓋取其時之正與其令之善此又以告顏子也

朱子曰陽氣進始於黃鍾而其月建子然猶潛地中未有以見其
生物之功也歷丑轉寅而三陽始備於是協風乃至盛德在木而
春氣應焉古之聖人以是為生物之始改歲之端蓋以人所共見
者言之以堯曆日中星鳥以殷仲春推之想夏之前皆用建寅之
月至商周始以征伐有天下於是更其正朔定為一代之制以新
天下之耳目而有三統之說然以言乎天則生物之功未著以言
乎地則改歲之義不明而凡四時五行之序皆不得其中正此所
以考論三王之制而必行夏之時也所謂行夏時者蓋由曆數以
來授時之法如堯典教民事者至夏而悉備也諸家之曆久而皆
差惟夏小正之書授時為無差故曰行夏時也行字兼令說了古
人每月有政令觀夏小正可見行夏之時不特改正朔乃兼每月
政令行了所以集註說夏之正與其令之善問春秋書春王正月
是以十一月為春如何曰然天時參差自是周制夫子不敢擅改
王制但如此書而於對顏子發此言則又見得合用夏時方與天
時當對此是夫子微意

雙峰饒氏曰天象難捉摸只有初昏可見日已落星初明於是時
推測方有定若其他時候周流四方無可捉摸凡測星辰都用初
昏測日景方用日中

徐勿齋曰商周曆數分而為二夏時曆數合而為一
馮留仙曰人生於寅時之正序從春始令之善行者審天時以定
人事凡政事所出俱
協盈虛消息之義也

乘殷之輅

輅音路亦作路 商輅木輅也輅者大車之名古者以木為車而
已至商而有輅之名蓋始異其制也周人飾以金玉則過侈而易
敗不若商輅之朴素渾堅而等威已辨為質而得其中也

胡氏曰商尚質亦有過於質者商之輅則得乎質之中者也
問周輅為過侈何也朱子曰輅者身之所乘足之所履其為用也
賤矣運用震動任重致遠其為物也勞矣且一器而工聚焉其為
費也廣矣賤用而貴飾之則不稱物勞而華飾之則易壞費廣而
又增費之則傷財此周輅之所以過侈歟
馮留仙曰樸素渾堅等威已辨乘者同天下之軌天下以朴凡制

度所尚俱得崇質式九圍之思也
金瑯山曰王者一代創制何止輅冕舉二者以示斟酌之意雖就
天子說起降而諸侯大夫士庶人服器物采在其中凡損益取舍
之宜即此皆可例推

服周之冕

周冕有五祭服之冠也冠上有覆前後有旒黃帝以來蓋已有之
而制度儀等至周始備然其為物小而加於眾體之上故雖華而
不為靡雖費而不及奢夫子取之蓋亦以為文而得其中也

朱子曰黃帝始作冕凡首服三等冕最貴次弁次冠冕之言倪居
高而視卑也制雖創於古法莫備於周殷以前冕制未備或冕以
朝不以祭故弁冕無等至周始重冕卿大夫以上助祭始得用之
雜記云大夫冕而祭於公弁而祭於已士弁而祭於公冠而祭於
已尚書顧命自王以下至大宗皆麻冕又冕者五人分立於堂階
等處則冕不止天子用之亦不獨祭用之矣或問周冕之不為侈

何也曰加之首則體嚴而用約詳其制則等辨而分明此周冕雖文而不爲過也夏商之制雖不可考然意其必有未備者矣
馮留仙曰元服之尊文得其中服者端冕凝旒想見文武周公之度而追其郁郁之雅也

樂則韶舞

取其盡善盡美

新安陳氏曰韶舞以樂聲兼樂容而言也

馮留仙曰惟舜之功德始可以作韶功德不如舜卽口奏韶無益也克復之精危微之辨也善勞之氓問察之誠也

金瑯山曰舜樂所以象舜之成也今必思致治何以如舜而後思作樂何以如韶果得其所以爲韶卽不襲古之韶是亦韶也卽不名樂曰韶不可謂非韶也

放鄭聲遠佞人鄭聲淫佞人殆

遠去聲 放謂禁絕之鄭聲鄭國之音佞人卑諂辨給之人殆危

也 程子曰問政多矣惟顏淵告之以此蓋三代之制皆因時損益及其久也不能無弊周衰聖人不作故孔子斟酌先王之禮立萬世常行之道發此以爲之兆牙由是求之則餘皆可考也張子曰禮樂治之法也放鄭聲遠佞人法外意也一日不謹則法壞矣虞夏君臣更相戒飭意蓋如此又曰法立而能守則德可久業可大鄭聲佞人能使人喪其所守故放遠之尹氏曰此所謂百王不易之大法孔子之作春秋蓋此意也孔顏雖不得行之於時然其爲治之法可得而見矣

雲峰胡氏曰集註前訓佞字但謂其辨給此則先之以卑諂蓋辨給在口卑諂在心此所謂巧言令色孔王者也

或問鄭衛之音皆為淫奔獨欲放鄭何也朱子曰衛詩三十淫奔之詩纔四之一鄭詩四十一淫奔之詩不啻七之五衛猶男悅女之詞鄭皆女惑男之語衛猶多譏刺懲創之意鄭幾蕩然無復羞愧悔悟之萌鄭聲淫其於衛矣獨戒鄭聲而不及衛舉重言也

張氏好古曰小人之禍國家柔惡尤可畏於剛惡佞者諂側媚使人喜愛親暱聰明之君猶為所惑有覆亡而終不悟者夫子舉佞人亦以小人之尤者言也是知有百王之大法有萬世之大戒四代禮樂為百王立此法也戒以鄭聲佞人為萬世保此法也

慶源輔氏曰治道成於樂鄭聲樂之淫者能搖蕩人之性情以壞其成故放絕之治道係於人才佞人人才之賊也利口辨給能變亂是非以移奪人之心志而喪其所守故屏絕之

馮留仙曰放遠所以清其非禮勿視聽言動之源也

金瑯山曰天下之感莫如聲與言感則聲與言先入惑則聲與言最深淫者聲調流蕩淫哇不正也殆指佞人心術言顛倒是非最是危險與淫字例看佞人即恣意見工議論泥古反古兩項人害道累治甚大不專指讒佞說蓋此輩最易眩主心亂制度故不可不遠觀孔子惡利口覆邦家可見

程子曰三王之法各是一王之法故三代損益文質隨時之宜若孔子所立之法乃通萬世不易之法

朱子曰三代制作極備矣孔子更不可復作故告以四代禮樂只是集百王不易之大法惟顏子可以語此故揀其大中至正者以告之舉一以例其餘也然又必設戒四者則法可興行而無斁矣或問孔子言王道只言禮樂如夏時商輅周冕是也孟子言王道只言政事如衣帛食肉經界井地是也意者孔子言王道之本孟子言王道之務

潛室陳氏曰孔子為學者言止言經世之大綱孟子為時君言當論濟時之急務

金瑯山曰諸賢皆問為政顏子獨問為邦或曰即是天下易曰上下不交而天下無邦是其證也為邦有大規模禮樂刑政無不具備由王進帝治定功成不可不防微杜漸夫子生平祖述憲章大道為公益合帝玉功德而一之因問為邦發出此段議論斟酌損益萬世無弊看來顏子此問却有關繫身居陋巷屬念為邦擔荷重大即此便是萬物一體意思孟子謂禹稷顏子同道易地皆然以此

子曰人無遠慮必有近憂

蘇氏曰人之所履者容足之外皆為無用之地而不可廢也故慮不在千里之外則患在几席之下矣

程子曰人無遠慮必有近憂思慮當在事外易於履霜即曰堅冰至以見其憂之在近也慮患於履霜之初則有以弭憂矣

厚齋馮氏曰慮在事未來之先憂在事既至之後慮不遠則備不豫而憂近矣遠近指事變未至為遠已至為近不必泥時地易曰君子以思患而豫防之遠慮以弭近憂之謂也

磐石金子曰遠不必千百年凡慮及其憂之未至者即是遠憂即在無慮中來即是近不必指目前凡天下禍幾每乘人精神不到處入居安不慮危危即生於安處治不慮亂亂即伏於治必有二字危辭致傲使知善後也

金瑯山曰人字一頓重看蘇氏遠近以地言饒氏時地雙言俱不必伏即如為善垂統求為可繼從升沉倚伏上看得透不徒苟安目前即是遠若無此段慮可憂即在此豈不甚近必有緊跟無字來警之最切夫子對子夏欲速見小利節正是此節對照二則字即是此必有二字

子曰已矣乎吾未見好德如好色者也

好去聲 已矣乎歎其終不得而見之也

金瑯山曰此已見子罕篇特加已矣乎三字還是做人好德意大

子曰臧文仲其竊位者與知柳下惠之賢而不與立也

全陳新安云警人意愈切是不必作絕望語

者與之與平聲 竊位言不稱其位而有愧於心如盜得而陰據之也柳下惠魯大夫展獲字禽食邑柳下諡曰惠與立謂與之並立於朝范氏曰臧文仲為政於魯若不知賢是不明也知而不舉是蔽賢也不明之罪小蔽賢之罪大故孔子以為不仁又以為竊

位

蔡虛齋曰凡不當得而有之者曰竊文仲位大夫薦賢其本分乃知賢而不與立不稱其位便是竊了此深譏其蔽賢非力誣其竊位

金瑯山曰春秋公族多世為大夫魯臧氏展氏並孝公孫也政既在臧氏柳下惠展氏賢者文仲達之甚易尤非俱之為家臣者比也乃掩其却齊之功擯其正祀之議不與以執政之權併使不得安於士師之位是謂知其賢而不與立故譏其竊位蓋在上位以薦賢為重也

子曰躬自厚而薄責於人則遠怨矣

遠去聲 責已厚故身益修責人薄故人易從所以人不得而怨之

葛吧瞻曰躬自厚不必加一責字只宜云躬自深厚不浮淺以令人易議而於人又薄責之耳
金曙谷曰學問只有省躬一法不敢以不肖之身滋指摘之嫌而不敢以強世之術開疑畏之端遠怨亦是對人言自己全無此念

金瑯山曰須重反躬自責上君子非有心避怨人有怨於我便是人已之心不能相通處故必寡怨而後見自修之至夫子教仲弓以那家無怨亦此意

子曰不曰如之何者吾未如之何也已矣

如之何如之何者熟思而審處之辭也不如是而妄行雖聖人亦無如之何矣

雙峰饒氏曰上言如之何是思而處之下言如之何是思之熟而處之審也曰字是心口商量語此就處事說
黃石齋曰天下無難處之人只消三個必自反天下無難處之事只消兩個如之何此兩言可為涉世處事箴

徐勿齋曰曰如之何而事之嘗我者破矣不曰如之何而我之料事者尚闇曰如之何而我之與心謀者密矣不曰如之何而我之與事謀者尚疎

金瑯山曰本文曰字就心裏展轉揣摩區畫處看非口說而已若

僅口說雖百千萬遍說個如之何究竟只是空言不曰者正是他
心裏不肯揣摩區畫耳末如之何與上兩如之何不同言無可奈
何亦不能如何代他區畫也還
是儆醒他自己尋求的意思

子曰羣居終日言不及義好行小慧難矣哉

好去聲 小慧私智也言不及義則放肆邪侈之心滋好行小慧
則行險僥倖之機熟難矣哉者言其無以入德而將有患害也

宋子曰下三句雖從第一句帶下來必羣居終日而如此尤見得
下二句爲亂道言不及義無學識之村人多如此而又只好行小
慧則其爲邪惡傾險之小人審矣欲免於罪過難矣哉
金瑯山曰此深著燕朋之戒言不及義二句較飽食無所用心更
增却許多病痛行小慧正是不及義處加一好字伏無限機心械
事在難矣哉危之之辭

子曰君子義以爲質禮以行之孫以出之信以成之君子哉

孫去聲 義者制事之本故以爲質榦而行之必有節文出之必
以退遜成之必在誠實乃君子之道也 程子曰義以爲質如質

榦然禮行此孫出此信成此此四句只是一事以義爲本又曰敬
以直內則義以方外義以爲質則禮以行之孫以出之信以成之

朱子曰義以爲質是應事接物之際先決其當否其間節文次第
須要皆具此是禮以行之然徒知盡其節文而不能孫以出之則
亦不可且如人知尊卑之分須當讓他人然讓之之節辭氣或不能
婉順便是不能孫以出之信以成之者是終始誠實以成此一事
非是孫以出之後方信以成之也

陳氏曰事到面前便斷可否此在先是義以爲質可否既定或從
或違所以區處須中節文無過不及是禮以行之於其區處或出
辭氣須孫順而無峻厲方不忤人是孫以出之其總歸須誠實則
此事之成無欠缺可悔處是信以成之四者皆一套事只於日用
間驗之三之字指事君子之於天下其盡善若此真個是君子哉

南軒張氏曰義以方外是義為用也此則以義為體蓋物則森然具於秉彜之內此義所以為體也必有是體而後品節生焉和氣盜焉真心貫焉皆從性體流出君子不知也此君子以養成者言袁坤儀曰義是心之所宜君子事事求慊於心便是集義之學質是本質棧榦非一本根不變一切動用皆從此生禮以行是禮在吾心體中特由此以行耳乃由仁義行也集註出之云云乃行仁義也君子哉是贊其德之成非汎論道也

張受先曰四者同出異名析之時措各見君子之條理已備合之渾成無間君子之體段已完

金瑯山曰首末兩君子相呼應首是名稱義是本主禮孫信是用相連叠出方見其用不窮君子哉方成得君子是贊詞亦是指人路頭語義禮孫信在各句之上而以字在下比以約以禮以德不同此袁了凡有由仁義行與行仁義之分也

子曰君子病無能焉不病人之不已知也

雙峰饒氏曰若自以為有能則不足以為君子如云君子道者三我無能焉君子之道四丘未能一焉夫子豈是無能者此言君子

之心非傲戒之辭也

金瑯山曰此節冒君子二字便是說君子之心如此與不患節傲戒之辭有別看患與病宜分曉病是切身之痛須想出君子反躬悚惕意下句足上句不病人不已知正是病無能的意思一有病人不知之心便不能見自家病處

子曰君子疾沒世而名不稱焉

范氏曰君子學以為己不求人知然沒世而名不稱焉則無為善之實可知矣

南軒張氏曰有是實則有是名名者所以命其實也終其身而無實之可言君子疾諸非謂求名於人也

雙峰饒氏曰言沒世者生前或可干名沒後公論方定非有可稱之實者必不見稱於人大學沒世不忘亦此意

厚齋馮氏曰病之者病我也疾之者疾人也齊氏曰求有為善之名固君子之所羞終無為善之實亦君子之

所惡故長而無述孔子責之四十五十而無聞孔子嘆之沒世而無稱孔子疾之然則學者亦可以勉矣。

至心齋曰疾白疾也恐其沒而名不稱故當未沒疾已無可稱若既沒如何疾得。

金瑯山曰君子不是驚名只緣名可驗實沒世不稱無實可稱也所疾在實上不專在名上須發君子所以疾之之意此中便有汲汲求進修處世必有我方成世我必與世有關係方成我故君子之所疾疾其自沒沒於世而名不稱也。

子曰君子求諸己小人求諸人

謝氏曰君子無不反求諸己小人反是此君子小人所以分也

楊氏曰君子雖不病人之不已知然亦疾沒世而名不稱也雖疾

沒世而名不稱然所以求者亦反諸己而已小人求諸人故違道

干譽無所不至三者文不相蒙而義實相足亦記言者之意

南軒張氏曰君子無適而非求諸己小人無適而非求諸人

蔡虛齋曰求字甚有力與為字不同如所求乎子所求乎臣即此

求字孟子反求之說特求己中一節耳君子看得此已甚大道德

固從性具事業亦非外邀自己取用不盡故求諸己小人志在隨

人看得自己一毫沒有富貴在人掌握聲名在人齒頰故求諸人

金瑯山曰凡言己皆教人理會自家事看得已重天下萬事萬物

盛德大業皆在己上為學實能求己自然見得己大無處非己便

是聖人通天下為一身處君子見己有餘故一切求諸己小人視

己不足故一切求諸人求己求人精神聚散不同非但名實之謂

也求與為不同即孟子求在我求在外之意兩求字雖同却起念

處甚不同一在己一在人也己與人內外公私迥殊學者須先認

己人分明求處方不差了路徑此際一差便不是君子便是小人

子曰君子矜而不爭羣而不黨

莊以持己曰矜然無乖戾之心故不爭和以處眾曰羣然無阿比

之意故不黨

南軒張氏曰矜莊自持易至絕物而失於爭羣居相與易至狗物而失於黨君子正其在我初不以己形人角是競非而自失其和故矜而不爭從衆諧俗而所持終不失其正初非狗物苟且不合於公故羣而不黨

慶源輔氏曰莊以持已理也然用意或過則便至乖戾之心生而與人爭和以處眾理也然用意或過則周全阿比之意起而與人黨天理存亡只在一息之間天子言君子如此所以使學者於持已處眾之際戒謹恐懼務盡其理而防私意之或萌也
金瑯山曰矜羣皆世人病君子處聖人特為分別合二句想出君子和平正直之養須就矜內見出不爭羣內見出不黨方見矜羣無疵累處若云矜則不爭羣則不黨便失語氣此處宜渾融看

子曰君子不以言舉人不以人廢言

蔡虛齋曰此言君子用人聽言之道言與人原不相蒙於人只論人於言只論言舉人不以言則所舉必得人廢人不廢言則嘉言罔攸依言通就好邊說人通就不好邊說
余亦山曰張南軒陳新安俱用言用人平說蒙引至此後來乃出

就用言上說謂君子之於言收其益不受其害無非廣開言路意人字只作一個人看合二句是極一途以承人言非設兩界以防濫進至用人另有權衡在下句只是上意然不廢須先辨別言之是非可否審察時勢量度事理求其實有裨政事而推行之若徒取其言不措諸行猶空言耳

子貢問曰有一言而可以終身行之者乎子曰其恕乎已所不欲勿施於人

推己及物其施不窮故可以終身行之 尹氏曰學貴於知要子貢之問可謂知要矣孔子告以求仁之方也推而極之雖聖人之無我不出乎此終身行之不亦宜乎

問言恕必兼言忠如何此只言恕朱子曰不說忠時不成恕獨說恕忠在裏面了



陳氏曰：已所不欲，勿施於人。只就一邊論，其實不止勿施所不欲者。凡已所欲者，須施於人。方如己欲孝，欲弟，人亦欲孝，欲弟，必推已所欲，孝弟者以及人，使人亦得遂其欲，孝弟之心，便是恕。只是推已之心，流行到那物而已。恕之義甚濶大。自漢以來，恕字之義不明，有謂善恕已，量主范忠宣亦謂以恕已之心，恕人。此說恕字，只作饒字解。如說且恕之不輕恕之意，如此是已有過且自恕。人有過，又併恕人，乃相率為不肖之歸，豈推已如心之義乎？
雙峰饒氏曰：此問在未聞一貫之先，子貢多學，欲知博中之約，遂發此問。一言是一字，所以只以一恕字答之。
南軒張氏曰：人之患莫大於自私，恕所以克其私而擴公理也。不欲勿施，恕之方也。是所當終身而行之者，極其至則仁也。忠恕體用也。獨言行恕者，蓋於其用力處言之。行恕則忠可得而存矣。
蔡虛齋曰：子貢從事博施，一言終身之問，明是反約意象。夫子只就他本身指點人，莫近於己身，莫約於己身之反求，以吾心如人心，一身可以通天下，守約施博，真可終身行之不盡。
徐勿齋曰：恕者如心之謂，欲人如吾心，則難；欲吾如人心，則易。欲人人如其心，則難；欲自如吾心，則甚易。不欲勿施，則疴瘵疾痛自通而藩籬踰域自撤。

金哪山曰：天下只有人已，病在見已不見人。一恕字，正己與人相流貫處。子貢向行處安頓此身。夫子却直就身內指出恕字。恕便終身可行。已所不欲二句，不是釋恕字。正示以行之之法。已即對身字看。須知己與人原是疴瘵相關，喘息相通，只因失了萬物一體意思，從中自生隔礙。若就己身不欲一念，通徹到人身上，便是大公無我。修齊治平，皆從此出。何不可行之有。大學說絜矩，孟子說強恕中庸，說忠恕違道不遠工夫，只在不欲勿施上。無兩個道理。此即所謂一貫也。張南軒云：不欲勿施，恕之方也。最是首句之者二字不虛。行之，即終身行此一言，不必多求，也不欲二句，正是一言可終身行，影子單說行，不回顧一言非也。

子曰吾之於人也誰毀誰譽如有所譽者其有所試矣

譽平聲 毀者稱人之惡而損其真譽者揚人之善而過其實夫子無是也然或有所譽者則必嘗有以試之而知其將然矣聖人善善之速而無所苟如此若其惡惡則已緩矣是以雖有以前知



其惡而終無所毀也

朱子曰毀者惡未著而遽詆之譽者善未著而亟稱之也試者驗其將然之辭聖人之心光明正大稱物平施無毫髮之差故人之善惡稱之未有少過其實者然以欲人之善也故但有試而知其賢則善雖未顯已進而譽之矣不欲人之惡也故惡之未著者雖有以決知其不善而卒未嘗遽詆之也是乃善善速惡惡緩也正書所謂與其殺不辜寧失不經罪疑惟輕功疑惟重春秋傳所謂善善長惡惡短孔子樂道人之善惡稱人之惡之意

斯民也三代之所以直道而行也

斯民者今此之人也三代夏商周也直道無私曲也言吾之所以無所毀譽者蓋以此民卽三代之時所以善其善惡其惡而無所

私曲之民故我今亦不得而在其是非之實也 尹氏曰孔子之

於人也豈有意於毀譽之哉其所以譽之者蓋試而知其美故也

斯民也三代所以直道而行豈得容私於其間哉

新安陳氏曰此句繳上一截誰毀誰譽之意若曰直道而行謂善善惡惡無所私曲也吾之於民所以無毀譽者蓋以此民卽三代之時所用以直道而行之民故我今亦不得而在其是非之實也蔡虛齋曰夫子固無毀譽斯人亦不容有毀譽非謂不敢毀譽之故全在此蓋以傲世之爲毀譽者耳有以直道而行屬上之人謂民心古今如一三代所以直道行之吾亦不得不以直道行之者金那山曰有毀有譽便非直道有所試蒙引說是舉三代正對着吾之於人也吾字斯民正對人字所以二字最可味正對上誰字見此人卽三代之所以直道而行之民之人吾將誰毀誰譽

子曰吾猶及史之闕文也有馬者借人乘之今亡矣夫

乘平聲夫音扶亡與無通 楊氏曰史闕文馬借人此二事孔子猶及見之今亡矣夫悼時之益偷也愚謂此必有為而言蓋雖細故而時變之大者可知矣胡氏曰此章義疑不可強解

予我衡曰史闕文乃責實之義所謂直書其事不假文飾者也蒙引指夏五傳疑為證非是苟以為傳疑則亦史家常事何關風俗而夫子及之且本文明言闕文豈可變文為疑孔子所稱闕文蓋深慮後之為史者徇一時偽飾之文障萬世綱常之實故思之深而慮之切如此以闕疑一例釋之者誤也

徐勿齋曰史闕文不必盡書也為尊諱為親諱為賢諱故闕必欲詳書史職盡巧仁恕遠矣讀史不肯闕文是才人驕氣有馬不借人是財人吝心使驕且吝其餘不足觀也已

金那山曰二者闕祭國史疑信風俗厚薄皆人心世道之大者不可謂細故闕文是不私用其見借乘亦不私吝其有朝有信史則是非明野有淳風則禮教著此夫子所以撫今追昔也無限感慨全在音猶及三字上音亡也夫與吾猶及緊相呼應

子曰巧言亂德小不忍則亂大謀

巧言變亂是非聽之使人喪其所守小不忍如婦人之仁匹夫之勇皆是

雲峰胡氏曰德者人心所守之正也巧言者則能亂人之心術是非有定理而彼以是為非以非為是使聽者失其所守為人心之害莫大焉婦人之仁失於無斷匹夫之勇失於輕決二者皆亂大謀蓋大謀主斷而輕決則又失之

蔡虛齋曰兩亂字俱從自心而生聽巧言而喪其所守者心中不明理不知言也故理明則無亂德不堅忍者氣歉也不容忍者氣盈也故養氣則無亂謀大謀在經營圖度上看事功尚後一層寫介僉曰德而巧言足以亂之不足以語德若周於德者邪世不能亂謀而為小不忍所亂何足以語大若真謀大事者惟有忍乃克有濟

金那山曰此於立德立功先審幾之學德本乎理理明自不為所亂謀克乎氣氣定自不為所亂孟子知言養氣本此

子曰衆惡之必察焉衆好之必察焉

好惡並去聲 楊氏曰惟仁者能好惡人衆好惡之而不察則或蔽於私矣

南軒張氏曰天下之善惡有易明者衆之好惡固所同至於事若善而其情則有害事若不善而其情或可取此衆人之所惑而君子之所察也孟子於仲子匡章是也

胡氏曰察者詳審之謂非謂衆人之好惡皆非也特恐其或蔽於私又加詳審爾

雙峰饒氏曰衆好惡固當察然我心無私意方能察之若有私意則衆好惡之得其當者我反以為非矣所以惟仁者能好惡人也鄒肇敏曰必字根衆字來不是說惟衆所以必察正謂雖衆必不可廢察耳兩必字不要說煞

金瑯山曰好惡與毀譽自別好惡是衆必察正為是衆好者安知不是鄉愿不是厚施惡者安知不是季路不是匡章兩必察正要從衆因討出個真好真惡使用好惡的人與受好惡的人皆不為

衆所掩覆好惡不濶是非自見非求與衆異但不與衆同耳聖人心事何等謹嚴忠恕此便是作春秋大義甚有關係

子曰人能弘道非道弘人

弘廓而大之也人外無道道外無人人然人心有覺而道體無為故人能大其道道不能大其人也 張子曰心能盡性人能弘道也性不知檢其心非道弘人也

雙峰饒氏曰此道字是就自心上說若就道體說則道自際天蟠地何待人弘四端甚微擴而充之則不可勝用此之謂人能弘道四如黃氏曰弘有二義人之得是道於心也方其寂然無一理之不備亦無一事之不該是容受之弘及感而通無一事非是理之用亦無一物非是理之推是廓大之弘其容受也人心一推而萬物皆備於我此弘之體其廓大也四端雖微充之足以保四海此弘之用性分所固有者一一盡收入來職分所當為者一一便推出去方是弘

勿軒熊氏曰道之全體無所不包惟學故能廓而大之矣
蔡虛齋曰道者事物當然之理道體寓於事物之間夫何能為必
待人將此理體驗擴充則道體方為之光輝宣著盛大流行如禮
儀三百威儀三千通是聖人之大又如文王仁敬孝慈信是文王
能盡其道以吾心之知覺盡此當然之理故曰人能弘道非道弘
人覆說以決之全是責人弘道之意

金瑯山曰人能二字正見道從人出有人方有道不能者自失此
道耳非道句正痛着一鞭非徒作反振語弘道只如其道之本量
而止非有絲毫增益也人字兼智愚賢不肖說便卸擔不得能字
著力全是喚醒人從自家身上認取這道不要懸空從道上去攆
索君子之道只在子臣弟友盡其在我聖人說未能正是求能處
正是弘道處凡人不能弘道不成個道便不成個人如何不突地
省猛

子曰過而不改是謂過矣

過而能改則復於無過惟不改則其過遂成而將不及改矣

新安陳氏曰過而肯改則過泯於無過而不改則過成而有勉人
改過莫此為切

馮留仙曰無心之失偶懼何傷迷後之復悔即不遠

金瑯山曰過知為過方能去改若真行自遂不自知為過人雖多
端告戒尚自掩護安望能改不責人無過只要人速改是學者修
省的工夫

子曰吾嘗終日不食終夜不寢以思無益不如學也

此為思而不學者言之蓋勞心以必求不如遜志而自得也李氏

曰夫子非思而不學者特垂語以教人爾

南軒張氏曰此章非以思為無益也以思而不學則無益耳

雲谷胡氏曰書說命惟學遜志一句六經言學所從始非特取卑
遜之義不凌節而施之謂遜蓋勉勉循循其學有自得之益勞心
以必求徒思而未必有得也

蔡虛齋曰不學而思是懸空想像此理縱苦探力索終危疑不可
憑據於心無所得惟學則所思之理稽之古而安習之事而實事

逸功倍始為有益此教人思不可廢學非教人廢思也

薛敬軒曰見得理明須一一踐履過則事與理相安皆有著落處

不然理與事不相資終無可入之地

海蠹篇曰無益當連上句讀蓋思無益之事如名物技藝之類故

不如學也若能反求即是有益之思有益之思即是學更於何處

見學學者覺也覺非在心外

子曰君子謀道不謀食耕也餒在其中矣學也祿在其中矣君子憂

道不憂貧

餒奴罪反 耕所以謀食而未必得食學所以謀道而祿在其中

然其學也憂不得乎道而已非為憂貧之故而欲為是以得祿也

尹氏曰君子治其本而不卹其末豈以在外者為憂樂哉

采子曰君子謀道不謀食是將一句統說中又分兩腳說耕也餒

在其中學也祿在其中又恐人錯認此意似教人謀道以求食故

下面又繳一句謂君子所以為學者所憂在道爾非憂貧而學也

新安陳氏曰耕也句自是引喻此夫子始終教學者審內外之輕

重也君子惟謀學以明道而不謀食以得祿譬耕本不求餒而餒

自在其中是學本不求祿而祿自在其中學焉聽祿之自至可也

未又申言之憂道以見其謀道不憂貧以見其不謀食憂出於心

謀見於事憂之深然後謀之熟總欲學者知內之重而外之輕耳

蔡虛齋曰謀道以事言憂道以心言謀者謀其得憂者憂其失所

謂學如不及猶恐失之也耕也二句言耕本謀食而食或不在于學

本謀道而祿反在中得失皆不關於謀愈見食之不當謀故君子

只憂道之不得更不憂貧之不免也夫子勉學者專心於道之意

金二酉曰存疑作三節看輕重在首尾二句首句見君子得已之

學中二句因不謀食而言不特耕也句輕即學也句亦輕末句又

恐人因學可以得祿而以學為干祿之資故末又足憂道句朱子

金那山曰首句只說君子原是謀道並無謀食意思謀道便自不謀食不謀食便自不憂貧中二句承上言謀食未必得食不謀食未必不得食不須著意營求故君子始終只憂道一念孳孳不遑。

子曰知及之仁不能守之雖得之必失之

知去聲 知足以知此理而私欲間之則無以有之於身矣。

知及之仁能守之不莊以涖之則民不敬

涖臨也謂臨民也知此理而無私欲以間之則所知者在我而不失矣然猶有不莊者蓋氣習之偏或有厚於內而不嚴於外者是
以民不見其可畏而慢易之下句放此

知及之仁能守之莊以涖之動之不以禮未善也

動之動民也猶曰鼓舞而作興之云爾禮謂義理之節文 愚謂
學至於仁則善有諸已而大本立矣涖之不莊動之不以禮乃其
氣稟學問之小疵然亦非盡善之道也故夫子歷言之使知德愈
全則責愈備不可以為小節而忽之也

潛室陳氏曰雖是有仁能持守然當臨涖之時舉動之際此心少
懈即安心便生又須逐照管要令盡善盡美是檢身工夫周密處
朱子曰動字不是感動之動是使民底意思禮字歸在民身上如
菟苗獮狩就其中教之少長有序之事便是使之以禮蓋使他以
此事此事有禮存也問知及仁守到仁是極了却又要莊涖動以
禮底工夫如何曰人有此心純粹不走失而於接物治民時少此
莊嚴意思自不足以使人敬此便是未盡善處又問此是要本未
工夫兼備否曰固是但須先有知及仁守做根本方好去檢點其
餘便無處無事不善若根本不立又有何可點檢處知及仁守為
學之事也莊涖禮動為政之事也此章當以仁為主所謂知及之

所以求吾仁。泣之動之所以持養吾仁者。仁能守之則大本已立。雖臨民不以莊。動民不以禮。亦其支節之小失耳。然亦不可不自警省。以求盡善而全其德也。

雙峰饒氏曰。此章六個之字。要分別。及之守之得之失之。此四之字。指理而言。泣之動之。此二之字。指民而言。只就上說個得能字。則所知才為我有。不莊泣亦是心體放逸處。便是不能仁守。

袁坤儀曰。知是悟得徹。信得過。學問已是當了。從此保任去。不使一毫私意間斷。便是仁守。非知。及外。別有仁守工夫。泣字分明是臨民。若是為一身。則知及仁守。不須更求進步。惟為物立。則故須莊與禮。莊是此心嚴肅處。禮是此心節文處。亦非仁守外。別有莊禮工夫。只是明體不息處。充實光輝。德盛禮恭。便是。

陳伯玉曰。總是一知。徹終始曰仁。徹內外曰莊。徹人已曰禮。金瑯山曰。此當本末內外兼修。知及仁守。理得於心。不莊泣。則其形於身者猶未也。知及仁守。莊泣。形於身者一無愧然。動不以禮。則其見於事者亦未也。見道理要做到徹頭徹尾處。未善也是活語。勿作煞語看。饒雙峰六個之有分別。吳因之云。數之字分別。下二之字指民。未免一字兩解。不如只就心體完全上。渾發將內外動靜。一以貫之為妙。附記於此。

子曰君子不可小知而可大受也。小人不可大受而可小知也。

此言觀人之法。知我知之也。受彼所受也。蓋君子於細事未必可

觀而材德足以任重。小人雖器量淺狹而未必無一長可取。

朱子曰。一事之能否。不足盡君子之蘊。然能任天下之重。而不懼。小人一才之長。亦可器使。但不可以任大事耳。

雲峰胡氏曰。小節可以知小人。不足以知君子。大受可以許君子。不可以許小人。材之所成。為器德之所充。為量。君子之所以可大受者。材與德俱大。小人之不可大受者。器與量俱小也。

蔡虛齋曰。此論人之品格。大受小知。俱以事功言。大兼才德。小不過才枝之末耳。知就外所著見言。受就中所承當言。意重觀君子。當略小而觀其大。一邊不致觀小。人上。

金瑯山曰。照註觀人為是。受中所容也。我包乎人。知外所著也。人包乎我。受是我受。知是人知。

子曰民之於仁也。甚於水火。水火吾見蹈而死者矣。未見蹈仁而死

者也

民之於水火所賴以生不可一日無其於仁也亦然但水火外物而仁在已無水火不過害人之身而不仁則失其心是仁有甚於水火而尤不可以一日無者也况水火或有時而殺人仁則未嘗殺人亦何憚而不為哉李氏曰此夫子勉人為仁之語下章放此

蔡虛齋曰仁即人之生理所以生者也水火所賴以生者也賴以生不可一日無所以生不可一息無故仁為甚上言仁之甚切於人下言仁之無害於人妙在即以生死論仁仁能生生故曰甚於水火仁能不死故曰未見蹈仁而死總勉人為仁之意

金瑯山曰看一民字見盡人皆然無貴賤賢愚二也首二句提出水火就人最緊要者以形出仁字為甚後二句即發明仁甚於水火之意須理會一蹈字說甚於水火處正是欲人蹈仁水火吾見二句承上一氣遞下非有兩層

子曰當仁不讓於師

當仁以仁為已任也雖師亦無所遜言當勇往而必為也蓋仁者人所自有而自為之非有爭也何遜之有程子曰為仁在已無所與遜若善名在外則不可不遜

朱子曰當仁擔當之當這仁字是指大處難做處說這般處須著擔當不可說道自家做不得是師長所做底事所說不讓猶程子所謂不可將第一等事讓與別人做者此與上章皆勉人為仁之辭上章為凡民都不知仁而憚於為之者發此章為學者粗知仁之為美而不知勇於有為者發

雲峰胡氏曰當字大有力量不弘者當不起不毅者當不去請事斯語顏子當之仁為已任曾子當之顏曾遊於夫子之門未嘗以當仁之事而遜於夫子也

蔡虛齋曰全重一當字不讓正是當字之意當者能弘能毅擔當獨任之意決不可道自家力弱氣沮讓有氣力者去當顏之請事

曾之仁為已任。便是當仁不讓。
金瑯山曰：人之於世，凡事皆可讓人。為仁由已，於師亦不讓。不讓正從當字看出。一生讓，當便不力。總是勉人當仁，不讓於師甚言也。

子曰君子貞而不諒

貞正而固也。諒則不擇是非而必於信。

覺軒蔡氏曰：諒有二訓。有止訓信者，友諒是也。有訓必信者，此諒是也。諒似真而實非，故夫子特別而言之。

楊龜山曰：惟貞固可以不諒，所謂貞者，惟義所在也。

金瑯山曰：不諒，即貞處見不是貞了。又不諒，無兩層貞與乾坤合德易所謂貞固足以幹事，歷萬變而不失其正也。諒是匹夫匹婦之為諒，固守而不知變也。

子曰事君敬其事而後食

後與後獲之後同食祿也。君子之仕也，有官守者修其職，有言責

者盡其忠，皆以敬吾之事而已。不可先有求祿之心也。

蔡虛齋曰：但看敬字，何等專一。不期食之後，而自後矣。後食是絕無利祿酬報之念，正是純心盡職，正是敬事處。

金瑯山曰：後食，正敬事處。始終只一敬事。學學求無愧事。君而止它非所計也。觀仲山甫夙夜匪懈，諸葛武侯鞠躬盡瘁，可見此全在平日見得義利分明，到事君只是盡其在我，雖不矯情辭祿，却無微祿意思。若源頭不清，不從君民起見，便患得患失，無所不至。

子曰有教無類

人性皆善，而其類有善惡之殊者，氣習之染也。故君子有教，則人皆可以復於善，而不當復論其類之惡矣。

慶源輔氏曰：人之性同乎一理而已。然其品類則有善惡之異。蓋其始生也，已有氣稟清濁之分。及其少長也，又有習染邪正之異。苟欲合其異而反其同，則在乎教耳。故君師有教，則皆可以復其善。而自無為惡之人，聖人之教，如雨露之於萬物，夫豈有所擇哉。

蔡虛齋曰有無二字俱就教者立心說習有類性無類教所以復性君子之心惟知以教一其類而已豈先計人之類而以為有可教不可教之別哉君子愛人之心如此

金瑯山曰天之生人各有其類原待於教也有教則無類矣無類始見教法之弘

子曰道不同不相為謀

為去聲 不同如善惡邪正之類

蒙引云善惡以君子小人言邪正以吾道異端言

金瑯山曰此主明道業不主謀事天下原只一道而人自於同中起異苟得於道亦何必強求其同刪正云不同不止如善惡邪正即均為善而此中有所不侔亦難相謀宜廣看

子曰辭達而已矣

辭取達意而止不以富麗為工

新安陳氏曰惟達理者辭能達意達意之外而過求之非以繁多為富則以華美為麗正理反為所蔽本意反以不達矣東坡與人論文每以夫子此言為主

勉齋黃氏曰此為學者工言辭者設然曰達而已矣則非通於理者亦不能達也聖人之言未嘗有所偏達之一字命辭之法也

蔡虛齋曰辭字讀住言所貴乎辭者惟達而已矣謂之達須是其中實有之流於既溢發於積厚達者行乎其所不得不行而已矣者止乎其所不得不止此修辭之準則也

金瑯山曰為工言辭設非通於理不能達達是真辭而已矣是真達可止不止畢竟是不達未有達而止者夫子非要人止只是要人達今人言達只就顯淺一路說須知微顯洪纖詳略旁正皆有達在所以儀禮聘記曰辭多則史少則不達辭苟足以達義之至也即此意也

師冕見及階子曰階也及席子曰席也皆坐子告之曰其在斯其在

斯

見賢遍瓦 師樂師瞽者冕名再言其在斯歷舉在坐之人以詔之

師冕出子張問曰與師言之道與

與平聲 聖門學者於夫子之一言一動無不存心省察如此

子曰然固相師之道也

相去聲 相助也古者瞽必有相其道如此蓋聖人於此非作意而為之但盡其道而已 尹氏曰聖人處已為人其心一致無不盡其誠故也有志於學者求聖人之心於斯亦可見矣范氏曰聖人不侮寡不虐無告可見於此推之天下無一物不得其所矣

蔡虛齋曰道非有名可示非有法可取舉足動步即由其中如遇師即有相師之道推之安老信友懷少莫不皆然聖人行來不知拈起便覺於此見天理流行隨處充滿無少欠缺子張一問深得無行不與之妙

金瑯山曰道無往而不在聖無行而不與道從聖心自然流出初告師冕時未嘗有意以此為道而行之因子張拈出道字來問故答云然固字承上張問意說道字只承上與師言之道道字說子張不是疑其非道却有疑道不必拘於此之意夫子說個然字固字見得道理因是如此語氣甚平易馮厚齋云使瞽者若能視然是謂相師之道豈特與師言之道按此說深看道字一層非是

下論卷之十五終

侄 鴻 恒 編 正

[Faded text, likely bleed-through from the reverse side of the page]

季氏第十六

洪氏曰此篇或以為齊論凡十四章

厚齋馮氏曰上篇首衛靈公以識諸侯之失此篇首季氏以識大夫之失下篇首陽貨以識陪臣之失也此篇季氏而後即記禮樂征伐祿去公室之語乃記者以為篇次之意

季氏將伐顓臾

顓音專史音俞 顓臾國名魯附庸也

蔡氏曰人臣無將將必誅將伐二字是案

金瑯山曰上篇舞佾歌雍此伐顓臾正禮樂征伐自大夫出也將字見書法由求可諫止也此季氏非桓子定公五年陽貨囚桓子冉有時年十八未仕哀公十一年始為季氏宰伐顓臾必康子也

冉有季路見於孔子曰季氏將有事於顓臾

見賢遍反 按左傳史記二子仕季氏不同時此云爾者疑子路

嘗從孔子自衛反魯再仕季氏不久而復之衛也

金那山曰諱伐而言有事在聖人前已自碍口。

孔子曰求無乃爾是過與

與平聲 冉有為季氏聚斂尤用事故夫子獨責之

金那山曰呼求而責之黨惡明有首從度與云爾是過與直罪其與謀又一解

夫顓臾昔者先王以為東蒙主且在邦域之中矣是社稷之臣也何以伐為

夫音扶 東蒙山名先王封顓臾於此山之下使主其祭在魯地七百里之中社稷猶云公家是時四分魯國季氏取其二孟孫叔

孫各有其一獨附庸之國尚為公臣季氏又欲取以自益故孔子言顓臾乃先王封國則不可伐在邦域之中則不必伐是社稷之臣則非季氏所當伐也此事理之至當不易之定體而一言盡其曲折如此非聖人不能也

蔡虛齋曰提出先王把大名分壓倒季氏見立國有自來且在邦域之中非敵國外患者皆是社稷臣則尤與魯相依倚季氏伐之是蔑先王之命為邦域之擾撤公室之衛何以伐為

艾千子曰顓臾分明說邦域中社稷臣如何可指作遠人所謂不服如淮夷蠢動狄伐我及齊楚諸邦世為魯患當時實有其事耳

文德所包甚廣指定均安說亦非
金那山曰提起夫顓臾三字口氣鄭重緊承昔者先王東蒙主是周天子的臣在邦域中非敵國比社稷臣與魯相終始併非魯臣俱跟先王來且字是轉語是字直頂疊說下義正詞嚴豈季氏伐得的

再言曰夫子欲之吾二臣者皆不欲也

夫子指季孫冉有實與謀以夫子非之故歸咎於季氏

蔡虛齋曰冉有因夫子責之故自解云非二臣之欲及夫子責以救正之大義遂有固而近于費一節併為季氏解說欲字正是季氏病根子孫憂及患貧寡皆此欲字夫子說患不均患不安直寃到蕭牆之憂總以止其欲

金那山曰欲字對上將字照後憂字閒居心腸不覺發露吾二臣者正應上爾是過却不挽著子路

孔子曰求周任有言曰陳力就列不能者止危而不持顛而不扶則將焉用彼相矣

任平聲焉於虔反相去聲下同 周任古之良史陳布也列位也

相瞽者之相也言二子不欲則當諫諫而不聽則當去也

雙峰饒氏曰危未至於顛故持之使不至顛顛則既暗須扶起之蔡虛齋曰此段皆周任語陳力就言責說陳力乃可就列力不能就該止了扶持正是陳力處就相瞽者說而意在臣通重在位當諫意此只就二子所處而泛論道理為下文不得辭其責張本
金那山曰上面求言此獨責之引周任語重在焉用二字直斥老陳力二句就諫言說下三句設喻以足之扶持二句雖就相瞽說而相諫已在言下

且爾言過矣虎兕出於柙龜玉毀於櫝中是誰之過與

兕徐履反柙戶甲反櫝音獨與平聲 兕野牛也柙檻也櫝匱也

言在柙而逸在櫝而毀典守者不得辭其過明二子居其位而不去則季氏之惡已不得不任其責也

蔡虛齋曰爾言過矣謂二臣不欲言之為得辭其責亦已過矣下引喻以明不得辭其責出柙喻其跋扈毀櫝喻不惜先王之大典

金瑯山曰且字承二臣不欲來過矣與上下兩過不同只作差字看正照是誰之三字虎兇二句亦是喻言須與上引語相照

再有曰今夫顯與固而近於費今不取後世必為子孫憂

夫音扶 固謂城郭完固費季氏之私邑此則冉有之餽辭然亦可見其實與季氏謀矣

勉齋黃氏曰冉有此言見顯與之不得不伐但知費為季氏之邑而為季氏子孫謀也豈復知有魯哉
金瑯山曰今夫二字正對夫子昔者二字夫子說先王以為說邦域中說社稷臣來說固而近於費說取說子孫憂汗言抵對鳴鼓之攻所自來已夫子為司寇使仲由墮費冉求乃因近費而謀伐顯與意中目中尚有夫子哉

孔子曰求君子疾夫舍曰欲之而必為之辭

夫音扶舍上聲 欲之謂貪其利

稱嚴胡氏曰求以為夫子之欲吾二臣者皆不欲孔子從欲字發明切責之疾其飾辭以掩貪也

金瑯山曰君子疾夫十三字一氣讀求說夫子夫子只口語帶出照他欲字欲字即是他飾辭

丘也聞有國有家者不患寡而患不均不患貧而患不安蓋均無貧和無寡安無傾

寡謂民少貧謂財乏均謂各得其分安謂上下相安季氏之欲取顯與患寡與貧耳然是時季氏據國而魯公無民則不均矣君弱臣強互生嫌隙則不安矣均則不患於貧而和和則不患於寡而安安則不相疑忌而無傾覆之禍

朱子曰不均不和不安在當時有難顯言者故夫子微辭以告之語雖畧而意則詳也

雙峰饒氏曰均無貧以下文理參差與上文不相當對何也曰上兩句以貧與寡對說下三句又錯綜說大抵貧多起於不均均則彼此皆足而無貧故曰均無貧不和則爭爭則土地雖廣人民雖衆而心常以為寡惟和而不爭則雖寡亦不見其為寡矣故曰和無寡傾覆生於不安人心苟安則禍亂不作自無傾覆之患矣故曰安無傾均無貧而後能和和無寡而後能安三者又自相因蔡虛齋曰季氏但知患寡與貧而不知不均不和為可患故夫子泛言有國家者患此不患彼既曰有國有家已自無貧寡惟因患而見貧寡耳所以貧寡不足患惟因其患貧寡而至於不均不安禍有不可言者是真可患也蓋字下究所以患不患之意和即在均安中故併及之均則君十臣一各享其有不患貧自然無貧均則上下無猜何等輯睦自然和則各撫其民不患寡自然無寡均而和則臣不思退其君君不思剪其臣心與勢俱安互相倚依決不至有意外之變自然無傾此無傾正與下文蕭牆之變相映金邪山曰夫子語門人而自言其名即此一字便見求之強辭夫子此時多少慨嘆再求此時能無汗下聞字正照昔者先王有國有家各分凜然提均字作主該各安其分下根均字遞說雙峰蒙引得解再求說季氏之欲夫子即說季氏是欲再求又換一憂字

夫如是故遠人不服則脩文德以來之既來之則安之

夫子說季氏非憂乃患也心本乎中者為憂心落乎下者為患夫子嘗云是吾憂孟子亦云君子有終身之憂而無一朝之患可見夫如是故遠人不服則脩文德以來之既來之則安之夫音扶 內治脩然後遠人服有不服則修德以來之亦不當勤兵於遠

新安陳氏曰夫如是總包括上三句即所謂內治脩也今不均不安既與內治反矣又欲興兵贖武則與脩文德反矣

雙峰饒氏曰遠人不特遠夷中庸柔遠人在懷諸侯之上夫子以蕭牆對顯與則蕭牆近顯與遠其為遠人可知

馮氏曰蕭肅也臣之見君至屏而加肅故曰蕭牆

蔡虛齋曰夫如是指不患寡二句一心只在均安而安分無欲也安分無欲且無覬于國中況遠人乎故遠人不服則修吾禮樂政事以感動之既感德而來服則不復計其前失與之相安于無事而已所聞有國家者治內而服外其道如此

泛言道理則字文勢甚緊文德即上均安和不必泛說既字則字正有來之在人所以來之安之在我不必征伐意

也
今由與求也相夫子遠人不服而不能來也邦分崩離析而不能守也

子路雖不與謀而素不能輔之以義亦不得為無罪故併責之遠人謂顓臾分崩離析謂四分公室家臣屢叛

蔡虛齋曰遠人不服而不能來者不修文德也邦分崩離析而不能守者不修內治也

金瑯山曰上文俱已說盡又緊著一鞭由求并訓相字正照前彼相字顓臾在邦域之中對季孫則為遠人邦分崩離析須暗舍不均和意大夫盡君之有家臣又專大夫之有上下交征不均和孰甚於此

而謀動干戈於邦內吾恐季孫之憂不在顓臾而在蕭牆之內也

干楯也戈戟也蕭牆屏也言不均不安內變將作其後哀公果欲

以越伐魯而去季氏 謝氏曰當是時三家強公室弱冉求又欲

伐顓臾以附益之夫子所以深罪之為其瘠魯以肥三家也洪氏

曰二子仕於季氏凡季氏所欲為必以告於夫子則因夫子之言

而救止者宜亦多矣伐顓臾之事不見於經傳其以夫子之言而

止之與

蔡虛齋曰而謀動干戈於邦內承上言汝之相季氏既不能修文德以來遠人又不能修內治以守邦家乃謀伐顓臾不以德而以兵不治內而治外日恐為子孫憂不知不均不和內變將作政恐憂不在顓臾而在蕭牆之內耳自丘也聞有國有家者以下至此見不均不安之可患而惕之以內憂蓋以利害言之以止其伐顓臾之役其淮魯之意至矣

金瑯山曰。而字緊頂上說。謀動干戈。指伐顓臾。蓋以其自為一國。為魯附庸。故曰邦內也。季氏干戈之謀。冀外有所益。却不知離析之中。將內有所損。蕭牆。家臣肅立之地。正指離析之甚。變起家臣言。非另說他變也。推其原。皆由季氏先分崩其邦。患寡患貧。欲心致之。耳。蕭牆之憂。與子孫之憂。相照。正危辭。過季氏亂萌意。此章總明顓臾不可伐。夫顓臾節。就理之。是非言。吾恐季孫節。就勢之利害言。吾乃爾是過。至誰之過一段。二過字。相應。見由來過不可辭。為子孫憂。至季孫之憂一段。二憂字。相應。見顓臾不必取責。由求即所以懼季氏安。季氏。即所以安魯。無兩意。

孔子曰。天下有道。則禮樂征伐自天子出。天下無道。則禮樂征伐自諸侯出。自諸侯出。蓋十世希不失矣。自大夫出。五世希不失矣。陪臣執國命。三世希不失矣。

先王之制。諸侯不得變禮樂。專征伐。陪臣家臣也。逆理愈甚。則其

失之愈遠。大約世數不過如此。

厚齋馮氏曰。先王之時。五禮六樂。掌之以宗伯。九伐之法。掌之以司馬。禮樂征伐之權。在上而下。莫敢干也。至自諸侯出。則逆理矣。然自諸侯出。故亦自大夫出。而逆理甚矣。下而陪臣執國命。逆理愈甚矣。十世五世三世。言其極。大約不出此論。理亦論勢也。下章戒竊權者。此戒失權者。有道無道。俱以天子作主。天子以道建極。則天下有道矣。

南軒張氏曰。禮樂征伐。天下之事也。天子得其道。則權綱在已。而在下莫敢干也。所謂自天子出者。天子亦豈敢以已意可專。而私意於間哉。亦曰奉天理而已矣。若上失其道。則綱維解紐。而諸侯得以竊之。諸侯可以竊于天子。則大夫亦可竊于諸侯。而陪臣亦可竊于大夫矣。其理之逆。必至于此也。所以有十世五世三世之異者。尹氏謂于理愈逆。則其亡愈近是也。天下有道。則政不在大夫者。政出于一也。庶人不議者。民志定于下。而無所私議也。

天下有道。則政不在大夫。

言不得專政

慶源輔氏曰天下有道諸侯既不得變禮樂專征伐則大夫亦豈得而專國政哉獨言政不在大夫者因當時政在大夫而言此政字泛言賞罰號令

天下有道則庶人不議

上無失政則下無私議非箝其口而不敢言也此章通論天下

之勢

慶源輔氏曰下無私議此有道之極致大驗使下尚有竊議者則上之人于道猶有慊必至於庶人自然不議方為有道之極

止齋陳氏曰此章備春秋之終始禮樂征伐自天子出見春秋以前時節自諸侯出隱桓莊閔之春秋也自大夫出僖文宣成之春秋也陪臣執國命襄昭定哀之春秋也孔子作春秋正欲反其在大夫者以歸之天子自托於庶人之議云爾

新齋陳氏曰前自有道及于無道末又因無道及于有道其欲維持名分挽今而返之古歟後二節兩呼天下有道有追責君上意

指自已作春秋漏坦之全章文可據

張卓庵曰春秋自魯莊十三年以前禮樂征伐雖自諸侯出權猶未一也及桓公既霸中國之政齊晉專之無復有天子矣然猶在

諸侯也至襄公十六年以後則皆自大夫出溴梁之會諸侯皆在獨書大夫盟者言自是無諸侯也至帥師圍費而南蒯叛竊寶玉

大弓以出而陽虎叛則併無大夫矣聖人之言豈不信哉

金瑯山曰春秋時魯三家晉六卿齊田氏政俱出自大夫始由諸侯放恣不知有天子故大夫因而竊之遂致陪臣效尤因追想有

道之盛以慨歎無道之失見道失而後政失由來者漸自諸侯以下其逆愈甚其亡愈速總是正名定分傷今思古意政不在大夫

大夫奉諸侯正諸侯所以奉天子此內須想出天子命諸侯政本不預於藩封大夫自不敢干僭處上節明誅臣下二節隱責君父

看下二節兩言天下有道分明追求亂本寓無限感慨意猶幸有議天子之廢人而天子存議之所在道之所在也故曰春秋天子之事也

孔子曰禮之去公室五世矣政逮於大夫四世矣故夫三桓之子孫微矣

夫音扶 魯自文公薨公子遂殺子赤立宣公而君失其政歷成襄昭定凡五公逮及也自季武子始專國政歷悼平桓子凡四世而為家臣楊虎所執三桓三家皆桓公之後此以前章之說推之而知其當然也 此章專論魯事疑與前章皆定公時語蘇氏曰禮樂征伐自諸侯出宜諸侯之強也而魯以失政政逮於大夫宜大夫之強也而三桓以微何也強生於安安生於上下之分定今諸侯大夫皆陵其上則無以令其下矣故皆不久而失之也

南軒張氏曰斯言發于魯定之世魯自宣公賴襄仲以立而一家始盛專制魯國之賦而祿去公室矣又一世政悉移於大夫自成公以下為國君者拱手聽命而已孔子于祿去公室政在大夫而知三桓子孫之必微以理之順逆勢之陵犯知之也夫三家視其君起不奪不厭之心則陪臣視之亦何憚而不為乎方三家專公室之祿竊魯公之政本其私意欲以利其子孫豈知子孫之微實兆于此哉

洪氏曰前言十世五世理也今言五世四世者實也非其有而有者必失不宜大而大者必微

朱子曰孔子之言嘗理也如書言惠迪吉從逆凶易言積善餘慶不善餘殃也氣數舛戾則當然而不然者多矣田恒三晉傳世皆不過五六胡氏又考之莽懿歡堅五胡十國南朝四姓五代八氏皆得之非道或止其身或四五傳而止惟晉祚差永而牛之易馬猶呂之紹嬴嘗理未嘗不驗也天定勝人其信然歟

李衷一曰論公室之運剝極當復論大夫之橫勢極必反故夫二字是當然必然意微是奪政柄削田祿在天時人事上斷之

蔡虛齋曰玩矣字有宜其微也之意非逆料語也

郝京山曰自宣公奪適自立東門襄仲與季孫行父執國政至成

公時行父逐襄仲季氏遂專魯歷襄昭定凡五世行父猶稱忠勤其子武子孫悼子平子專恣桓子死康子殺適是後三家遂衰三家皆桓公後故曰三桓大夫無君何以令下故不久而失之也金那山曰此承二章自大夫出而言是專論魯事五世宣成襄昭定君之世數也四世武子悼子平子桓子臣之世數也定公五年陽虎已囚桓子故夫二字指已然說非推未然說正就事感歎說

孔子曰益者三友損者三友友直友諒友多聞益矣友便辟友善柔友便佞損矣

便平聲辟婢亦反 友直則聞其過友諒則進於誠友多聞則進於明便習熟也便辟謂習於威儀而不直善柔謂工於媚說而不諒便佞謂習於口語而無聞見之實三者損益正相反也 尹氏曰自天子以至於庶人未有不須友以成者而其損益有如是者可不謹哉

荀子曰是謂是非謂非曰直友直則有過必聞諒信也。有燥執也。友諒則苟且徇外之念可消。可以進於誠。多聞非止博物。熟聞先王法言。法行足以爲著蔡者是也。友多聞則德慧有所啟。事理有所發。可以進於明也。

胡氏曰直者責善而無所回互諒者朴實而無虛浮多聞者有所參訂而不膠偏也。雙峰饒氏曰與直者友則有過必聞與諒者友則信實相示與多聞者友則多識前言往行知識日廣三者雖常情所做憚然友之却有益便辟者威儀習熟善柔者每事阿順便佞者語言可聽三者皆常情所狎悅而友之却有損舉三者爲勸又舉三者爲戒徐勿齋曰益者損者益損便屬友下先友后說益矣損矣損益就在三友字上便屬我。

金那山曰重數友字友是我去友他損益皆主我言吳氏曰益增其所未能損壞其所本有舉三益三損欲人從此中自審擇意

孔子曰益者三樂損者三樂樂節禮樂樂道人之善樂多賢友益矣



樂驕樂佚遊樂宴樂損矣

樂五教反禮樂之樂音岳驕樂宴樂之樂音洛 節謂辨其制度
聲容之節驕樂則侈肆而不知節。佚遊則惰慢而惡聞善。宴樂則
淫溺而狎小人。三者損益亦相反也。尹氏曰君子之於好樂可
不謹哉

新安陳氏曰禮之制度樂之聲容禮樂本有節而我節之多寡隆
殺清濁高下俯仰徐疾一一辨之使協于中凡人一言一動皆有
禮樂禮勝則離樂勝則流節禮樂只是謹之于毫釐之際不教過
亦不教不及。

覺軒蔡氏曰三友損益之資於外者三樂損益之發于中者也。
馮留仙曰益者之樂從心上生情而還從情上養心損者之樂從
心上恣情而遂從情上累心。

金邪山曰樂節禮樂是以吾之已發未發合先王之制酌質文損

益而定其所從考性情功德而反其自始節則以禮樂從心生樂
則禮樂不為我苦道是人善而我道之樂道則人善一如我善樂
多賢友賢在友多在吾樂愈在我也驕樂就身上言動驕縱說一
味矜肆以為樂佚遊是安佚遊蕩一味閒放自安宴樂是宴飲盤
樂沉溺不反即所
謂周念作狂也

孔子曰侍於君子有三愆言未及之而言謂之躁言及之而不言謂
之隱未見顏色而言謂之瞽

君子有德位之通稱愆過也瞽無目不能察言觀色 尹氏曰時
然後言則無三者之過矣

勉齋黃氏曰言有及未及者或數人侍坐長者當先言不及少者
或君子先有問則承問者當先對既有及未及又有未見顏色者
雖及之而言亦須觀其顏色或意他在或有不樂則亦未當言也
雲峰胡氏曰言貴乎時躁者先時隱者後時瞽者冥不知所謂時

金那山曰却全在侍於君子四字提醒。只看曲禮侍長者一段。凡長者。一起居。一動靜。皆須體察。言豈可不慎。三愆就侍君子反觀。自省處說。非侍君子責他愆。方去悔過。正要人未侍前一步。養之有素。意默雷云愆字從心。三愆非愆於語。愆於嘿。乃愆於心心不能自制。則躁心不能自達。則隱心不能自知。則瞽三愆。總是少檢心工夫。到侍於君子時。一一呈露。

孔子曰君子有三戒。少之時血氣未定。戒之在色。及其壯也。血氣方剛。戒之在鬪。及其老也。血氣既衰。戒之在得。

血氣形之所待以生者。血陰而氣陽也。得貪得也。隨時知戒以理。勝之則不為血氣所使也。范氏曰聖人同於人者。血氣也。異於人者。志氣也。血氣有時而衰。志氣則無時而衰也。少未定。壯而剛。老而衰者。血氣也。戒於色。戒於鬪。戒於得者。志氣也。君子養其志。

氣。故不為血氣所動。是以年彌高而德彌邵矣。

勉齋黃氏曰三者自少至老。皆所當戒。然三者之好。又各隨其血氣。而有最甚者焉。故各指其最甚者。而使之深戒也。

慶源輔氏曰人之血氣未定。則常動而易流。方剛則勇銳而好勝。既衰則收斂而多貪。此血氣之變也。戒色戒鬪戒得。此志氣之常也。常者為主。而使變者不得肆焉。此君子終身之務也。

新安陳氏曰三戒皆隨時。而就衆人所易犯者言也。朱子欲以理勝。氣則不為血氣所使。范氏欲以志帥。氣則不為血氣所動。意不相遠。志亦定向於理而已。

厚齋馮氏曰血稟於陰。行於脉之內。而為榮。氣稟於陽。行於脉之外。而為衛。

雙峰饒氏曰魂者氣之靈。魄者血之靈。心是魂魄之合。氣屬天。血屬地。心屬人。人者天地之心。心是血氣之主。能持其志。則血氣皆聽於心。不能持其志。則心反聽命於血氣。

羅近溪曰凡世間一切綺麗可悅之事。皆色也。凡材能藝術與物相競。常懷上上之心。皆鬪也。凡一生經營。可以便身圖者。皆得也。不專指牀第鬪狠貨利言。

〔金那山曰〕人生多是血氣用事。惟於血氣上涵養收攝。時時提醒此心。則不隨血氣轉移。非謂少不戒關。壯不戒得。但各就所偏。因年加謹。三戒只一戒也。

孔子曰君子有三畏畏天命畏大人畏聖人之言

畏者嚴憚之意也。天命者天所賦之正理也。知其可畏則其戒謹恐懼自有不能已者。而付畀之重可以不失矣。大人聖言皆天命所當畏。知畏天命則不得不畏之矣。

〔朱子曰〕畏天命是理會得道理。便謹去做。不敢違。如非禮勿視聽言動。與戒謹恐懼皆是。然須理會天命是恁地。方得要緊。須是知得天命。卽是天理。纔知得。便自不容不畏。

〔新安陳氏曰〕三畏平說。本無知字意。以小人不知天命推之。則見君子所以畏天命者。以其知也。故集註于上節。兩以知言之。欲知天命者。可不格物以致其知。欲畏天命者。可不誠意以正其心哉。

〔蔡虛齋曰〕天命謂性。日用之間。皆天命流行。觸處戒懼。惟恐失墜。大人行可爲法。聖人言可爲則。于此皆畏。是君子檢心之法。

〔張侗初曰〕凡日用動靜大小語默。便是天命流貫。君子見觸處。是天便觸處是畏。畏中不敢失墜意。

〔雙巖金子曰〕畏天命。須知物尊所生。理反自始。天命宰制者。大君子之心。左右以之出。玉游衍無之。不與天觸。無之不與命凝。無貳臨汝之命。此君子以心事天。卽天卽心也。

〔李衷一曰〕大人德望隆重。爲一世師表者。非徒以位分言。聖言卽方冊格言。典謨訓誥是也。王克云。上天之心。在聖人之胸。其譴告在聖人之口。世無聖人。不能知天。

小人不知天命而不畏也狎大人侮聖人之言

侮戲玩也。不知天命。故不識義理。而無所忌憚如此。尹氏曰。三畏者。修己之誠。當然也。小人不務修身。誠已則何畏之有。

〔徐勿齋曰〕小人之狎大人也。窺之以私心。則非道而欲以悅之。伺之以有間。則非分而欲以干之。

陳木叔云叛聖言以自恣者侮聖言之淺者也竊聖言以自飾者侮聖言之深者也

金瑯山曰畏不畏是君子小人分路處畏是心上工夫不可一刻不提醒天命雖是源頭宜仍還三畏不必以天命穿貫亦不必專提知字小人處亦不須補三不畏君子不是空存敬畏却便有靜存動祭不愧屋漏處說者因下節不知二字便於上節增入知字其實君子心體渾是與天命相對非待知而後畏也論小人便須醒之以知此是無忌憚小人非愚不肖也

孔子曰生而知之者上也學而知之者次也困而學之又其次也困而不學民斯為下矣

困謂有所不通言人之氣質不同大約有此四等 楊氏曰生知

學知以至困學雖其質不同然及其知之一也故君子惟學之為貴困而不學然後為下

朱子曰人之至者氣質之稟清明純粹絕無查滓則于天地之性無所間隔而凡義理之當然有不待學而了然于中者所謂生而知之聖人也次者則以昏明清濁正偏純駁之多少勝負為差其或得于清明純粹而不能無少查滓雖少有間隔而其間易達其疑易通故于所未通者必知學以通之則亦無不通矣所謂學而知之大賢也或得于昏濁偏駁之多而不能無少清明純粹則必其窒塞不通然後知學其學又未必無不通也所謂困而學之眾人也至昏濁偏駁之甚而無復少有清明純粹之氣則雖有不通而懵然莫覺以為當然終不知學以求其通此則下民而已矣 蔡氏曰此夫子列知之等知之之字指義理生而知之最上一等其從入處不可企及然學知亦知困知亦可由學以進於知皆次于生知究竟豈終遠哉惟困而不學斯為下耳困是義理難通四面俱窒學則憤悱奮發轉來

馮留仙曰學乃去做祛慾之學非是口耳聞見工夫 徐勿齋曰夫婦與知與能難道非生夫子忘食忘寢難道不困故上焉者從生處學學處困下焉者從困而學學而生 金瑯山曰次即次於生知又次非只次於學知謂又次於生知也 張南軒云中庸及其知之一謂其終所至之同也此節三等之分

謂其所知進之異也。按所進異處，亦見所至同處。困學，便是他知。體未泯滅處，先正云人生本有這知。若本無知，安得謂困？困者此知乍塞而不得通，非真然無知也。斯為下言。到此方下耳。肯轉念去學，仍不下。下對上言。見下民亦可求進於困，學生知處所謂果能此道，雖愚必明也。

孔子曰：君子有九思：視思明，聽思聰，色思溫，貌思恭，言思忠，事思敬。

疑思問，忿思難，見得思義。

難去聲。視無所蔽則明，無不見聽無所壅則聰，無不聞色見於面者貌舉身而言思問則疑不蓄，思難則忿必懲，思義則得不苟。○程子曰：九思各專其一。謝氏曰：未至於從容中道無時而不自省察也。雖有不存焉者寡矣。此之謂思誠。

朱子曰：九思不是雜然而思，當思時各專其一，是主一之義。

新安陳氏曰：君子苟未至於不思而得，當隨時隨處而各致其思，則處已待人，應事接物，無不各中其則矣。

南軒張氏曰：思則天理所自擴，而人欲所自遏也。然是九者要當養之於未發之前，而持之於方發之際，不然但欲察之於流而收之於暫，則但見其紛擾而無力矣。

蔡虛齋曰：前六件是存心治身之法，後三件是明理克己之務。平日固當存養此心，使常惺惺，及至身心有感，尤當每事致思，反求而得其理。夫子言此以訓君子。

湛甘泉曰：九思同一思，但隨事不同，如物之形有萬鏡之明，則一也。洪範五事，只說一思，聖人此言亦隨處體認之意。

金鄒山曰：此君子近思之學，九項皆是天下與我相感，我與天下相應，身與心縮轂處，每事致思，隨處中則方不至差繆。聖人教人內外夾持，起來到積累成孰，自無毫髮滲漏。君子只須用省察工夫，馴至動容周旋中禮便是不思而得地步。思問欲以破疑，勿使疑又因思生。思難者忿能致禍，思柔之使不暴也。

孔子曰：見善如不及，見不善如探湯。吾見其人矣，吾聞其語矣。

探吐南反 真知善惡而誠好惡之顏曾閔冉之徒蓋能之矣語
蓋古語也

慶源輔氏曰見善如不及則表裏皆好而無一念之不好不患其
不為之矣見不善如探湯則表裏皆惡而無一念之不惡不患其
或為之矣此唯知至意誠者能之

蔡虛齋曰善不善指事如不及從善之敏如趕不上相似如探湯
鼎鑊之湯方熱不敢染指所謂不使不仁者加乎其身上也此皆自
修之事先言見其人後說聞其語見所見合于所聞欣幸之意

隱居以求其志行義以達其道吾聞其語矣未見其人也

求其志守其所達之道也達其道行其所求之志也蓋惟伊尹太
公之流可以當之當時若顏子亦庶乎此然隱而未見又不幸而
蚤死故夫子云然

新安陳氏曰惟伊尹太公可以當之方耕莘釣渭則隱居求志也
及遇湯文而大用則行義達道也窮達無異體用相須前節真知

善惡而誠好惡之者此知至意誠之事方篤信自修未達之用也
後節求志以守所達之道達道以行所求之志者則修身而推以

齊治平之事體用全而為大人矣此所以有見與未見之分歟
鄒南阜曰上段先著見其人矣便是幸詞下段先著吾聞其語矣
更餘想慕講法須有斟酌總是慨嘆

顧麟士曰春秋時不惟無伊尹太公即有伊尹太公亦安得有湯
武孔子一生轍環老於洙泗故曰求志達道二者合一未見其人
自是實話

金那山曰士惟獨善其身方能兼善天下章內二項人不必分軒
輊只平平述古語一是所見與所聞合一是所聞與所見違俯仰

今古微寓欣慨當春秋時獨善不乏人只是處不能求志出不能
達道以用舍行藏同道如顏子皆遭時不偶徒有其志此聖人所
以歎未見也意在言外說者或言慨世或說勉人上節要虛籠引
起下節下節要回顧上節

齊景公有馬千駟死之日民無德而稱焉伯夷叔齊餓于首陽之下

民到於今稱之

駟四馬也首陽山名

其斯之謂與

與平聲 胡氏曰程子以為第十二篇錯簡誠不以富亦祇以異

當在此章之首今詳文勢似當在此句之上言人之所稱不在於

富而在於異也愚謂此說近是而章首當有孔子曰字蓋闕文耳

大抵此書後十篇多闕誤

新安陳氏曰富貴而無善可稱身死而名隨滅貧賤而有善可稱世遠而名愈芳是名之稱不稱初不繫於富貴貧賤也

葉氏少蘊曰伯夷叔齊同隱首陽而孟子不言叔齊者制行立教以示天下為之始者伯夷也叔齊則從之而已孟子論教之所始

故獨舉伯夷夫子論行之所異故兼稱叔齊

鄴仙馮子曰須知以景公照夷齊就如以羿皋照禹稷不言羿皋

之惡只言其善射盪舟不言景公之位只言其有馬千駟不言禹

稷之德只言其躬稼不言夷齊之節只言其餓於首陽正令虛拙

令人自想

金瑯山曰景公夷齊大較相懸獨民之稱與不稱見三代直道在

人不可泯滅處蓋學士大夫往往逞見意角議論雖史筆謚法愛

憎異同不足傳信反不若小民是非之至公而無私也兩民字不

可輕看其斯句舊移詩誠不以富二句補在上所謂異者高節迥

異於流俗也然斯字別有所指恐是夫子感事寄慨特借景公夷

齊作樣言這個局面自古已然語意只如此

陳亢問於伯魚曰子亦有異聞乎

亢音剛 亢以私意窺聖人疑必陰厚其子

對曰未也嘗獨立鯉趨而過庭曰學詩乎對曰未也不學詩無以言

鯉退而學詩

事理通達而心氣和平故能言。

慶源輔氏曰詩本人情該物理故學之者事理通達其為教溫柔敦厚使人不絞不訐故學之者心氣和平事理通達則無昏塞之患心氣和平則無躁急之失此其所以能言。

張南軒曰退而學詩學禮二句不可看闕了見得伯魚承當得夫子之訓吾無隱乎爾理會得即飲食起居無非教也顏曾可至伯魚亦可至但爭工夫到與未到。

他日又獨立鯉趨而過庭曰學禮乎對曰未也不學禮無以立鯉退而學禮

品節詳明而德性堅定故能立。

慶源輔氏曰禮有三千三百之目其序截然而不亂故學之者品節詳明其為教恭儉莊敬使人不淫不懾故學之者德性堅定惟

詳明其義精而莫之惑惟堅定則守固而莫之搖此其所以能立。

聞斯二者

當獨立之時所聞不過如此其無異聞可知

陳亢退而喜曰問一得三聞詩聞禮又聞君子之遠其子也

遠去聲 尹氏曰孔子之教其子無異於門人故陳亢以為遠其子

朱子曰陳亢實以私己之心窺孔子故有此問及聞伯魚之說而又以為遠其子則以其私意之未忘而以為聖人故推其子而遠之也夫聖人曷嘗有是心哉但其教人之法不過如此亢始以聖人有心私其子終以聖人有心遠其子到底不明白

新安陳氏曰得三謂聞詩聞禮與遠其子為三也夫子固不私其子亦何嘗遠其子當其可而教之教子與教門人一耳與詩立禮

詩禮雅言。與此之聞詩聞禮。平日教門人如此。教子亦不過如此。陋哉。亢之見也。味伯魚答亢之辭氣。雍容詳密。亦可見濡染薰陶之所得矣。惜其不壽。而不至大成就。

蔡虛齋曰。伯魚此言。不重詩禮之益。全是。即詩禮。照出無異。聞意。金瑯山曰。聖人教人。所以為道也。子可受。傳之。其子不為私。子不可受。傳之。於人不為。慈堯禪舜。舜授禹。與孔子之傳顏曾。一也。伯魚過庭之訓。初無所容。其厚薄者。亢始疑有私授。既知為遠其子。兩失之矣。

邦君之妻。君稱之曰夫人。夫人自稱曰小童。邦人稱之曰君夫人。稱諸異邦曰寡小君。異邦人稱之亦曰君夫人。

寡寡德謙辭。吳氏曰。凡語中所載如此類者。不知何謂。或古有之。或夫子嘗言之。不可考也。

南軒張氏曰。此正名之意也。春秋時。以妾母為夫人者多矣。甚則以妾為夫人。如魯惠晉平之為者。名實之乖。一至於此。正其名。所以責其實也。

陳氏用之曰。國君理陽道而出命。正人於其外。故謂之君夫人。理陰德而出命。正人於其內。故亦謂之君。易曰。其君之袂。詩曰。我以為君。禮稱女君。春秋書小君是也。

金瑯山曰。此為春秋諸侯內寵奪嫡而言。邦君之妻四字。便是正名。惟其為君妻。故稱如下所云。名正則言順也。

侄佐 治編正

論語卷之十六終



陽貨第十七

凡二十六章

陽貨欲見孔子孔子不見歸孔子豚孔子時其亡也而往拜之遇諸塗

歸如字一作饋 陽貨季氏家臣名虎嘗囚季桓子而專國政欲令孔子來見已而孔子不往貨以禮大夫有賜於士不得受於其家則往拜其門故瞰孔子之亡而歸之豚欲令孔子來拜而見之也

顧瑞屏曰論語記孔子時其亡孟子則以為瞰其亡味時字渾是天機真是孔子氣象吾將仕矣語不煩而意自見此之謂聖之時謂孔子曰來予與爾言曰懷其寶而迷其邦可謂仁乎曰不可好從

事而亟失時可謂知乎曰不可曰月逝矣歲不我與孔子曰諾吾將仕矣

好亟知並去聲 懷寶迷邦謂懷藏道德不救國之迷亂亟數也失時謂不及事幾之會將者且然而未必之辭貨語皆譏孔子而諷使速仕孔子固未嘗如此而亦非不欲仕也但不仕於貨耳故直據理答之不復與辯若不喻其意者 陽貨之欲見孔子雖其善意然不過欲使助已爲亂耳故孔子不見者義也其往拜者禮也必時其亡而往者欲其稱也遇諸塗而不避者不終絕也隨問而對者理之直也對而不辯者言之遜而亦無所詘也楊氏曰楊

雄謂孔子於陽貨也敬所不敬爲詘身以信道非知孔子者蓋道外無身身外無道身詘矣而可以信道吾未之信也

吳氏曰小人行事君子豈得效之非謂禮尚往來欲其相稱不往不可往拜則墮小人之計故權衡如此又曰不見正也往拜權也隨問而答辭順禮恭在此無詘在彼亦無所忤也貨天資小人術既狡深語皆機警夫子雍容應之曲盡其道貨終無所施其奸已勉齋黃氏曰日月二語蓋謂夫子既老可以有爲之日月已過矣歲運而往其去甚速豈復與我而爲少緩乎是亦諷使速仕也新安陳氏曰將之一字其辭活其意婉不輕絕之亦未嘗輕許之聖人之遠小人所以不惡而嚴也蔡虛齋曰上條序其事此條叙其言貨之言都著在孔子身上來夫子之答却不認作自家身上去只據理答之及言日月二句即應以將仕猶云我將待時而出也貨不能復置一辭矣日月一條承上懷寶失時二條貨意孔子所以日月逝矣皆以懷寶失時而然耳故諷之曰歲月不爲吾少留不可終於懷寶失時也金二酉曰上節時亡往拜固是尚遂其不肖見之心然猶不足見

聖人妙處。迨塗中一值。不激不隨。見猶如不見。直以塗人遇之耳。但看不可兩答。只是隨口答去。及陽貨日月二語。夫子只以將仕

答之。其妙無窮。聖人之待小人。誠不惡而嚴也。

金邠山曰。此處見孔子聖之時。或拜或遇。或諾。陽貨費許多機械。聖人却自然順應。拜只如未嘗拜。遇只如未嘗遇。諾只如未嘗諾。陽貨自是陽貨。孔子自是孔子。所謂無可無不可也。孟子眼裏容不得王驩。孔子胸中全不見陽貨。此便是孔孟氣象。分別處。陽貨問句句緊。孔子答句句寬。將仕句不可黏上。懷寶失時。一黏便著。朱子云。隨其所問。應答如響。畧無自明之意。得之。

子曰性相近也習相遠也

此所謂性兼氣質而言者也。氣質之性固有美惡之不同矣。然以其初而言。則皆不甚相遠也。但習於善則善。習於惡則惡。於是始相遠耳。程子曰。此言氣質之性。非言性之本也。若言其本。則性

即是理。理無不善。孟子之言性善是也。何相近之有哉。

朱子曰。孔子言性。雜乎氣質言之。故不曰同。而曰相近。蓋以為不能無善惡之殊。但未至如所習之遠耳。

雲峰胡氏曰。天命之性。純粹至善。一而已矣。不可以相近言。此所謂性兼氣質而言也。天命之性。不離乎氣質之性。其初猶未甚相遠。蓋猶未滴也。赤子之生。無有五方。其聲一也。性之相近也。如之長。則言語不通。飲食不同。有至死莫能相為者。習之相遠也。如之新安陳氏曰。人有此形。則有此心。有此心。則稟受此理。性者心中所稟受之理也。纔說性字。已寓於氣質中矣。非氣質則性安所寓乎。性善以天地之性言。非天地之性。懸空不著乎氣質。而自為一物也。就氣質中指出。天地本然。賦予之理。不離乎氣質言之耳。然天地之性。雖不離乎氣質。亦不離乎氣質。孟子之言性善。指其不雜乎氣質者言之也。乃是純言天地之性也。孔子之言性相近。以其不離乎氣質者言之也。乃是兼言氣質之性也。兼云者。言本然之性。夾帶言氣質之性也。因當時之人。以為善惡相遠。皆由於性。故夫子云。然乃據其習相遠。而原其性相近也。

羅近溪曰。此與繫易所言。繼之者善成之者性合。相遠起於習。習

原由於人。人多以不善為氣質之性。則不善之過。天當任之矣。

蔡虛齋曰。此是據其習相遠。性相近。
徐勿齋曰。性本相近。而所以卒至相遠者。習為之也。只要把習字
翻得醒。習屬人。人無所不至。故說箇相遠。因人不識性。却認遠者
是性。所以特從習中拈出。近字。從遠字生來。若煞說相合。便非旨
焉。留仙曰。二句以性字為主。下句正以明性之相近。

金瑯山曰。夫子從來教人。從實地上做工夫。此所謂性相近。乃是
率性之性。所以朱子云。兼氣質而言。至子思說天命之謂性。方是
從原頭上說來。然即繼以率性修道。亦正是夫子欲人慎習以全
性的本旨。人性皆善。正邪成敗。皆由於習也。晉愍懷太子。始未嘗
不聰慧。卒以悖逆廢。周處少為州里所患。一旦厲志自修。遂成忠
義。人亦顧其所習何如耳。此云相遠者。正欲慎習以全性。非謂性
與習相反而不相成也。

子曰唯上知與下愚不移

知去聲 此承上章而言。人之氣質相近之中。又有美惡一定而

非習之所能移者。程子曰。人性本善。有不可移者。何也。語其性
則皆然也。語其才。則有下愚之不移。所謂下愚有二焉。自暴自棄
也。人苟以善自治。則無不可移。雖昏愚之至。皆可漸磨而進也。惟
自暴者。拒之以不信。自棄者。絕之以不為。雖聖人與居。不能化而
入也。仲尼之所謂下愚也。然其質非必昏且愚也。往往強戾而才
力有過人者。商辛是也。聖人以其自絕於善。謂之下愚。然考其歸
則誠愚也。或曰。此與上章當合為一。子曰二字。蓋衍文耳。

朱子曰。性相近。通善惡。智愚說。上智下愚是就中。指出懸絕者。說
才稟於氣。氣清則才清。氣濁則才濁。如后稷自幼而岐嶷。越椒自
幼而惡。是氣稟如此。孟子謂盡得才之善固是好。畢竟氣稟有善
惡不同。自濂溪太極圖。始說陰陽五行之變不齊。二程始因其說

推出氣質之性來。以聖言觀之。則曰不移而已。不曰不可移也。以程子之言考之。則以其不可移而後不可移耳。聖人本以氣質之稟而言其品。未有不可之辨。程子則以稟賦甚異。而不可移。非以其不可移也。

葛屺瞻曰。性唯上智方不移。非上智。性難保。其不染於習。習亦唯下愚方不移。非下愚。習猶可挽。其復歸於性。唯字有警策人意。

王龍溪曰。古人立教。皆為中人設。看一唯字。原從上習相遠內看出來說。惟上智下愚。這兩等人。習不能移。其餘皆是相近之性。皆是習之可移者。何可不慎所習。

張芑山曰。危言人當慎習。意上智下愚不平。須體貼與字與即習字義。言惟上智雖與下愚相習。必不為下愚所移。苟非上智。則習於不善。如入鮑魚之肆。與之俱化。未有不失其本然之性者。也不移專屬上智。說見習易。移人不可不慎。非註善惡一定之謂。人能改過遷善。學問日進。雖愚必明。安得下愚終不可移。

金瑯山曰。唯字與字。要認語意。語雖說不移。全是望人移。唯上智不移。非上智。則可移而之上智。亦可移而之愚。有慎之之意。與字是過脉。下愚不移。非下愚。固可移而之下愚。亦可移而之智。有勉之意。集註承上章而言。未曾分著。亦未分貼。蒙引則云。夫子此

言以是性相近一句之意。端為中人指點。默雷則云。此正是習之相遠。副墨則云。上智為性相近之極。則下愚為習相遠之極。則總因承上章一言。遂成聚訟。湖南及龍溪將與字作自天子。以至於庶人。以至二字。看張芑山單講上智。將與字作相與。與字看言與下愚相習。殊支離。

子之武城聞絃歌之聲

絃琴瑟也。時子游為武城宰。以禮樂為教。故邑人皆絃歌也。

蔡虛齋曰。歌必叶於弦。古者教人。春習樂。夏習詩。秋習禮。冬習書。因時為教。夫子過武城。想是春夏時也。故聞絃歌。便知其以禮樂為教。學詩書禮樂。皆是學道。城以武名。用武之地。攷左傳可見。

夫子莞爾而笑曰。割雞焉用牛刀。

莞華版反焉於虔反。莞爾小笑貌。蓋喜之也。因言其治小邑何

必用此大道也

蔡虛齋曰其心則深喜其辭若有譏焉實反言以戲之以觀子游之自信何如耳非虛戲也

子游對曰昔者偃也聞諸夫子曰君子學道則愛人小人學道則易使也

易去聲 君子小人以位言之子游所稱蓋夫子之常言君子小人皆不可以不學故武城雖小亦必教以禮樂

雙峰饒氏曰君子小人以位言方其學時漸摩於禮樂書詩服習乎孝弟忠信君子小人尚未分也後來入仕者則用此道以愛人在閭閻畝畝間者亦自知義所以易使此見子游尊聞行知實際言外見武城雖小亦有君子小人必當教以禮樂

子曰二三子偃之言是也前言戲之耳

嘉子游之篤信又以解門人之惑也 治有大小而其治之必用

禮樂則其為道一也但眾人多不能用而子游獨行之故夫子驟聞而深喜之因反其言以戲之而子游以正對故復是其言而自

實其戲也

南軒張氏曰莞爾而笑聞弦歌而喜也割雞焉用牛刀謂其治小以大也君子學道則有以養其仁心故愛人小人學道則亦和順以服事其上故易使夫子又恐學者疑於前言以寡國小民為可忽故告二三子以子游之言為是而謂前言為戲辭氣抑揚之間無非教也本是述夫子之言今日偃言之即偃之言也

沈崑銅曰前言初不差但喜聞絃歌不暇莊語微覺近戲耳聖人恐二三子不達其意誤看焉用二字因抑前言發明學道大義正是教人詳曲處講戲字宜含蓄不宜痛自貶駁失了莞爾初意
金瑯山曰子游所學於夫子所用於武城者道也道止用於一邑不覺微寓之笑欲存道於天下後世故揭偃言之是君子小人無

異人也。同此道，卽同此學。愛人則君子成，其君子易使，則小人安乎？小人本是逆夫子之言，夫子却以爲偃之言，正是子游尊聞行，知實際，夫子道濟天下之心，昭昭乎如見已。

公山弗擾以費畔，召子欲往

弗擾季氏宰，與陽虎共執桓子，據邑以叛。

子路不說曰：末之也已，何必公山氏之之也。

說音悅。末無也。言道旣不行，無所往矣。何必公山氏之往也。

子曰：夫召我者而豈徒哉？如有用我者，吾其爲東周乎？

夫音扶。豈徒哉，言必用我也。爲東周，言興周道於東方。程子

曰：聖人以天下無不可爲之事，亦無不可改過之人，故欲往。然而

終不往者，知其必不能改故也。

蘇氏曰：孔子之不助畔人，天下之所知也。畔而召孔子，其志必不在於惡矣。故孔子因其有善心而取之，使不自絕而已。弗擾之不能爲東周，亦明矣。然而用孔子，則有可以爲東周之道。故子欲往者，以其有是道也。卒不往者，知其必不能也。

蔡虛齋曰：召我者，指公山。如有用我者，已自推開說。

黃東崖曰：欲往二字，甚活。東周亦寄言也。夫子作春秋，始於平王定王，風於黍離，錄西歸於鄘風，采美人於簡兮，何嘗一日忘西周。金璠山曰：聖人非真欲往，特無聊之思耳。然却難顯言。東周二句，亦只因子路不悅，姑爲此慨然興寄之語，非真解說欲往之意。不可泥實看。召我豈徒二句了，弗擾一案下二句，汎言用我者，猶可爲也。不屬公山氏說。孔子卒不往，召豈真望其用哉？吾其二字乎？字須體貼。言外有復見文武成康之盛意。程伊川云：東周之亂，無君臣上下，吾其爲東周乎？言不爲東周也。明道亦云：東周衰亂，總不肖爲也。按此說，與集註別。楊升庵云：孔子未嘗一日忘西周言，如有用我者，肖爲東周之微弱偏安而已乎。東崖說本此。

子張問仁於孔子孔子曰能行五者於天下為仁矣請問之曰恭寬信敏惠恭則不侮寬則得眾信則人任焉敏則有功惠則足以使人行是五者則心存而理得矣於天下言無適而不然猶所謂雖之夷狄不可棄者五者之目蓋因子張所不足而言耳任倚仗也又言其效如此 張敬夫曰能行此五者於天下則其心公平而周遍可知矣然恭其本與李氏曰此章與六言六蔽五美四惡之類皆與前後文體大不相似

雲峰胡氏曰子張問達問行其志欲得行於彼也故夫子因其問仁而告之以能行乎此者也能行此五者則心存而理得能行之於天下則其心公平而溥遍矣

刻不與天下相應接無處不與天下相感通必事物各得其理方見心存理得處夫子平素論仁如居處恭執事敬與人忠及天下歸仁邦家無怨必就當境實際處體認此章全重能行二字能行五者於天下一氣直下不分兩截此句已盡下特申明之耳恭寬句是所行之五者恭心不放寬心不褊信心不僞敏心不怠惠心不刻此皆理之所在故心存則理得矣此與答樊遲意同都教他做工夫五者有見於身者有見於事者然皆心之所由存理之所由得也恭則五句是能行必至不侮等方見恭能行於天下恭則不慢人望而畏寬則量足以容人而人樂就之信則不朝更夕改有所憑準而人皆相信而倚仗之敏則振作勤勵百事俱舉所謂明作有功也於此見發皆中節有感必應心體周流無處不達豈不是仁

黃石齋曰子張一生受病在要行天下夫子就他行天下處曰能行五者於天下則五者之天下心內之天下也勿輕過能行二字恭寬信敏惠不但指點名目是說吾心與天下相關處若有一處洩漏便不是仁恭則不侮五句正發能行於天下之意與邦家無怨不同前是使之自考此則欲使之勉勵自期必要到這地位也徐勿齋曰此能字煞甚喫緊天下是境能行五者於天下是真境

下不侮。只是能行處。五者皆根。諸心不侮等。何一不是。駭已之心。
金瑯山曰。子張平日好高務遠。多是能言不能行。夫子教他重能
行二字。上都是實落。下手做工。夫處行。即力行之行。能做得五項
事。徹底裁。是行。恭則以下。正是能行實地。如居處恭。三句是從恭
敬中做仁。無非存心的方法。不是有三箇心。此五者亦然。能行五
者於天下。人各得其心。盛德大業皆備於此。故曰。仁恭則五句不
是效言。必至此方無虧欠。只是能行。盡頭處不侮。是吾心能不侮
天下。得衆是吾心能得天下之衆。人任是吾心能爲天下所倚任。
有功是吾心能有功於天下。足以使人是吾心能感動天下。句句
是吾心能行於天下。

佛胥召子欲往

佛音彌胥許密反。佛音大夫趙氏之中牟宰也。

子路曰。昔者由也聞諸夫子曰。親於其身爲不善者。君子不入也。佛
胥以中牟畔子之往也。如之何。

子路恐佛胥之挽夫子。故問此以止夫子之行。親猶自也不入不
入其黨也。

蔡虛齋曰。君子不入以其能挽人
也。子之往也。如之何。恐被挽也。

子曰。然有是言也。不曰堅乎。磨而不磷。不曰白乎。涅而不緇。

磷力亦反。涅乃結反。磷薄也。涅染皂物。言人之不善不能挽已。

楊氏曰。磨不磷。涅不緇。而後無可無不可。堅白不足而欲自試於
磨涅。其不磷緇也者。幾希。

蔡虛齋曰。然有是言也。指君子不入之言也。不曰堅乎云云。必夫
子所嘗言也。言吾固有是言矣。又獨無此言乎。吾今日之欲往。爾
當以此言律吾。不當以向所聞者泥我也。堅白涅緇。皆影借說。言
德之盛。而人莫之挽也。然德之盛內。自有過化存神之妙。有伸縮

變化之機不必拘拘自守而不為世用故緊接以吾豈云云正意已在上文不能免已之內故此節不復解意

吾豈匏瓜也哉焉能繫而不食

焉於虔反 匏瓠也匏瓜繫於一處而不能飲食人則不如是也
○張敬夫曰子路昔者之所聞君子守身之常法夫子今日之所言聖人體道之大權也然夫子於公山佛肸之召皆欲往者以天下無不可變之人無不可為之事也其卒不往者知其人之終不可變而事之終不可為耳一則生物之仁一則知人之智也

金邪山曰此是聖人自信無可無不可處不可免是堅白確執堅白便是匏瓜聖人却是不磷不緇的堅白不是不食的匏瓜真影說非譬喻二節一直遞下不須轉語不日二字從言字生來堅自只是形容隨所入不受免之意不必說是器是道有形無形有據

莊子以堅白鳴語從不日二字立解謂吾不說箇堅白誰能磷之緇之語氣甚淺

子曰由也女聞六言六蔽矣乎對曰未也

女音汝下同 蔽遮掩也

居吾語女

語去聲 禮君子問更端則起而對故夫子諭子路使還坐而告

之

好仁不好學其蔽也愚好知不好學其蔽也蕩好信不好學其蔽也賊好直不好學其蔽也絞好勇不好學其蔽也亂好剛不好學其蔽也狂

好知並去聲。六言皆美德。然徒好之而不學以明其理。則各有所蔽。愚若可罔。可罔之類。蕩謂窮高極廣而無所止。賊謂傷害於物。勇者剛之發。剛者勇之體。狂躁率也。范氏曰。子路勇於爲善。其失之者未能好學以明之也。故告之。以此曰勇。曰剛。曰信。曰直。又皆所以救其偏也。

朱子曰。固執必信。而不好學。必至於害物。如尾生之信。便是勇。只是敢爲。剛有堅強之意。南軒張氏曰。學所以明善也。不知學。則徒慕其名。而莫知善之所。以爲善矣。只愚便蔽。非有所蔽。而愚餘做此。愚者是愛人。或至失已。蕩者窮高索隱。賊者守小諒。而不知大義。人已俱受其害。絞者務徑行。而不知含蓄。攻發陰私。亂則恃其血氣之強。而犯上作亂。狂則軼蕩不羈。要行便行。要說便說。不管前後。傲世凌物。非志大言大之狂也。六者本達德善行。不好學。則非所以爲德行。反以自蔽。學如行大道。日闢而通也。不學如守閹室。終日而蔽矣。

勉齋黃氏曰。集註訓蔽爲遮掩。言有所不見也。學所以明理者。效之師友之言行。求之方冊之紀載。皆學者所以學。欲觀夫埋之所當然者。而效法之也。仁知信直勇剛六者德之目耳。輕重淺深。當施不當施之間。其理固多端也。但見其目而好之。不務學以究其理之曲折。則見其一而蔽其全。未有不流於一偏者也。仁至於愛。偏則不分輕重。而流於愚。智而偏。則窮高極遠。而流於蕩。信而偏。則執一不通。而流於賊。直而偏。則迫切不舒。而流於絞。勇則尙氣。而亂。剛則堅守而狂。是皆得其大目。不明理而惑於所似也。格物以致其知。則其蔽徹矣。慶源輔氏曰。范氏就子路發明尤切。蓋好勇。且有何必讀書之說。其失正在未能好學以明善也。剛勇直信。皆氣稟之偏。故特告之。季習之曰。蔽者各隨其意見所向。以遮掩其正理外邊。雖做得近似。只是氣質之偏。不是達德。故須學以去蔽。然學又須好學。而不好。只是口耳之私。只增長得蔽。去他不得。沈耕巖曰。仁智等是美德。受病在六。好字。篤名。不求實。却不能從源頭上流出。便走入愚蕩等一路。本體反遮蔽了。只好學去。還他本體。便自無蔽。語云。凡學非能益也。達天性也。能全天之所生。而

勿敗之。是為善學。故良醫之治百有去翳法。無益明法。
金邛山曰。通章重好學。學以明理。總不在六言外。蔽字與言字。對六言不從自心。認取實際。便增出許多影似障礙。即所謂六蔽也。蔽在。有餘不能自克。蔽在不足不能自益。夫子劈頭一語。突地提醒。後段逐項剖出病症。病雖有六。藥只一學。六言名目自分。好學工夫無二。須句句切子路身上說。好學是心體為主。就六者窮究義理。隨處求實踐工夫。徒好六言。率意做去。有一好。即有一蔽。能好學。便認得六者真不好學。自認真處。皆是認理妄處。六者在身心上。茫然無著。反害事。

子曰小子何莫學夫詩

夫音扶 小子弟子也

厚齋馮氏曰。何莫云者。謂弟子何為而莫之學也。學者詠咏而體會之下。歷指學詩之益。即此便是學詩之法。

詩可以興

感發志意

朱子曰。讀詩見不美者。令人羞惡。見其美者。令人興起。須是反覆讀。使詩與心相入。自然有感發處。

可以觀

考見得失

新安陳氏曰。觀詩所美所刺者之得失。因可以考見我之得失。

可以羣

和而不流

新安陳氏曰。和以處眾曰群。和而不流。故可處眾。若和而流。則失於雷同。非處眾之道矣。

可以怨

怨而不怒。

慶源輔氏曰當怨不怨則失之疏怨而怒則又失之過程子所謂小弁擊鼓皆怨而各當乎理者是也。興觀是貼解群怨是推原解四箇可以從學字生來。

邇之事父遠之事君

人倫之道詩無不備二者舉重而言

多識於鳥獸草木之名

其緒餘又足以資多識。學詩之法。此章盡之。讀是經者所宜盡心也。

慶源輔氏曰論語論詩惟此章為備學者苟於此盡心焉則有以感發其志意而為善不懈有以考見其得失而於事無惑相而不

流以處羣居之常怨而不怒以處人情之變孝父忠君而人倫之大者無愧博物洽聞而一物之小者不遺詩之為益不既多乎

蔡虛齋曰詩中鳥獸草木皆有所取義如易之列象非苟然者玩一識字因名得義亦是格物之學正心修身處常處變察倫明物皆備於詩詩之不可不學如此

金瑯山曰備言學詩之益全要從諷咏內加體驗工夫觸類自得

不徒在誦讀上若拘泥篇章求益益便有限便非善學詩須知典觀等俱根首句學字來上說四可以字而即接以邇之遠之則知

事父事君正是興觀羣怨之實際處末句多識正備興觀羣怨之致亦事君事父者所不可忽也諸家所以有重事父事君者

子謂伯魚曰女為周南召南矣乎人而不為周南召南其猶正牆面而立也與

女音汝與平聲 為猶學也周南召南詩首篇名所言皆修身齊

家之事正牆面而立言即其至近之地而一物無所見一步不可

行。

新安陳氏曰詩有二南。猶易有乾坤。學詩自此入。而修齊治平之道。皆自此出。學詩誠先務也。孔子過庭之傳。既以學詩居學禮之先。此又以二南為學詩之先。所以丁寧其子者。豈有他說哉。

蔡虛齋曰二南皆治象非治本也。夫子教子為二南。正教他。邇入本。原來於此體會。盡其正始之道。起化之基。便無往不通矣。乎二字。乃訓辭。非問辭。為二南後之效驗。不必言。只說不為二南。遂至正牆面而立。蓋不知修身。不知齊家。不待出門。已行不去了。况能及遠乎。甚言其不可不為也。

萬茂先曰二南雖見文王齊家之化。却本修身來。大全輔氏修身疑未之及。一句悖理。王厚齋云家人卦辭曰利女貞。男正易女正難。二南之詩以化行閨門為極致。上九之象曰反身之謂也。身正則家正矣。由王氏言推之。為二南者。自正身始。觀大學經文可見。

金瑯山曰二南是家庭日用事。這裏欠理會。這裏便去不得。正教伯魚。從歌咏中。推見文王當日精神。身體力行。無一處放過。便自有刑寡妻。至兄弟。御家邦的實地。為字全不在。誦說上。不為猶面牆。只是心中壅塞。且不必說到不可行。

子曰禮云禮云玉帛云乎哉。樂云樂云鐘鼓云乎哉。

敬而將之以玉帛則為禮。和而發之以鐘鼓則為樂。遺其本而專事其末。則豈禮樂之謂哉。程子曰禮只是一箇序。樂只是一箇和。只此兩字。含蓄多少義理。天下無一物無禮樂。且如置此兩椅。一不正便是無序。無序便乖。乖便不和。又如盜賊至為不道。然亦有禮樂。蓋必有總屬。必相聽順。乃能為盜。不然則叛亂無統。不能一日相聚而為盜也。禮樂無處無之。學者要須識得。

南軒張氏曰玉帛固可行禮。鐘鼓固可為樂。謂玉帛鐘鼓非禮樂。則不可。然禮樂豈止玉帛鐘鼓間哉。得其本則玉帛鐘鼓莫非吾情文所寓。不然特虛器已。所謂本者。反求之吾身。則知其不遠也。厚齋馮氏曰復曰云者。謂人所常言也。乎哉疑而反之之辭。謂禮

樂之所云者。止云玉帛鐘鼓而已。哉。禮者天地之序。樂者天地之和。玉帛有等差。所以明其序。鐘鼓有聲音。所以發其和。是其禮樂廢壞。皆僭竊其文。而不知其本。諸侯僭天子。大夫僭諸侯。則無序矣。征伐相尋。國異政家。殊俗則不和矣。夫子亦必有爲而言也。
金瑯山曰。本文未說出和敬來。只咏歎。淫佚令人深思自得。蓋因世人泥未遺本。故發此論。全在數云字及兩乎哉內想。出意思。

子曰色厲而內荏譬諸小人其猶穿窬之盜也與

荏而審反與平聲。厲威嚴也。荏柔弱也。小人細民也。穿穿壁窬。踰牆言其無實盜名而常畏人知也。

王氏回曰。譬諸小人。指當時之大人也。緣他以色厲蓋其內荏。如穿窬內懷爲盜之實。外飾非盜之狀。以瞞人。此極鄙忽之辭。

雲峰胡氏曰。易泰卦以內健外順爲君子之道。否卦以內柔外剛爲小人之道。此則厲者外爲剛之容。荏者內蘊柔之惡者也。

金瑯山曰。緣他內荏。故做出色厲來。將欲以色厲掩其內荏。却被人看破。譬諸二句。舊俱說是小人而穿窬。其猶二字。全沒著落。小

人路徑不一。畏人知。莫如穿窬。就小人。中指。出穿窬情狀。形容他較小人又下一等。鄙之之甚也。

子曰鄉原德之賊也

鄉者鄙俗之意。原與愿同。荀子原慤。註讀作愿。是也。鄉原鄉人之愿者也。蓋其同流合汙。以媚於世。故在鄉人之中。獨以愿稱。夫子以其似德非德。而反亂乎德。故以爲德之賊。而深惡之。詳見孟子

末篇

朱子曰。鄉原者。僞也。做得好。便人皆稱之。而不知其有無窮之禍。如五代馮道者。此真鄉原也。

勉齋黃氏曰。德者務合乎理者也。鄉原求媚於世。則不必皆合乎理。而委曲遷就。似乎理。而實非理。使人之善者。莫知乎理之正。是天下之正德。反爲鄉原所害也。如廉潔理之正也。鄉原似廉潔。實非廉潔。而反以害廉潔之正。故貪夫不足以害廉。似廉非廉者。乃

所以害夫廉也。此夫子所以深惡之也。
 雙峰饒氏曰：一鄉有君子，有小人。鄉原同流合汙，以媚小人。似忠信，似廉潔，以媚君子。人人都道他好，人人都學他。最敗風俗。故曰：德之賊。上章言盜盜，猶畏人之知。此章言賊，則肆行無忌矣。
 高、新、鄭曰：陸子靜謂漢文帝也。只學得箇鄉愿，三代以後致治之美，如漢文有幾？若漢文只是鄉愿，則鄉愿非賊了。儒者大言乃爾。
 袁臨侯曰：愿處似德，愿為鄉之所愿，則是流俗汙世所謂德。非聖人君子所謂德。一鄉人不知他是賊，故愿之。是此人先賊了。一鄉人。不有孔子此論，併賊了天下萬世。須知說愿說賊，正是存德處。
 金、邠、山曰：上章為竊位者做。此為亂德者防。做原壞而目之為賊，正恐其亂德於鄉也。

子曰道聽而塗說德之棄也

雖聞善言不為已有，是自棄其德也。王氏曰：君子多識前言往行，以蓄其德。道聽塗說，則棄之矣。

朱子曰：道聽塗說者，謾聽來便說了，便不能蓄。既不能蓄，於心不能行之於身，是棄其德也。故曰：德之棄。
 雙峰饒氏曰：上章德字是得之於天者，鄉原之人似德非德，以人偽亂天理，是害其所得於天者。此章德字是得之於人者，有聞於人而不能蓄之為己有，是棄其所得於人者。
 新安陳氏曰：人之聞善，蘊蓄之不言之表者，其德固淺露於輕言之際者，其德棄矣。
 鄭氏曰：無所得而竊其名，故曰賊。有所聞而不蓄諸己，故曰棄。
 蔡虛齋曰：道是眼下路，塗是前頭路。道聽塗說，形容其入耳出口，畧不停研。如此則義理無得於心，故曰德之棄。此節德字以義理之得於心者言。上節德字以道理之正言。二德字小異。
 王觀濤曰：只病在不經心。若經心去思索，做實地工夫，自不暇說。
 金、邠、山曰：本無而竊之曰賊，已有而失之曰棄。不曰棄德而曰德之棄，是為德所棄，而非自棄其德也。惟道聽所以塗說，說一道聽，便不是從身體實歷中來，得之不經心，失之亦不著意也。

子曰鄙夫可與事君也與哉

與平聲 鄙夫庸惡陋劣之稱

子瞻蘇氏曰鄙夫止於營私其害至於亡國李斯之立胡亥張禹之右王氏其謀皆始患失故人以為識見庸陋志趣卑汚而忽之不知充其患失之心至於無所不至則亦天下之大奸大惡也用人者其知所以絕之哉

其未得之也患得之既得之患失之

何氏曰患得之謂患不能得之

蔡虛齋曰自未得之也至無所不至矣盡說鄙夫之為鄙者如此不可與事君之意自見

苟患失之無所不至矣

小則吮鴆砥痔大則弑父與君皆生於患失而已 胡氏曰許昌

斬裁之有言曰士之品大槩有三志於道德者功名不足以累其

心志於功名者富貴不足以累其心志於富貴而已者則亦無所

不至矣志於富貴即孔子所謂鄙夫也

新安陳氏曰功名功業聲名也今俗人認貴仕為功名非矣

金耶山曰鄙夫如甄豐王舜馮道輩初念只是患失既而擁戴篡弑不復知人間羞耻事皆自卑汗庸陋始無所不至四字見鄙夫許多固寵竊位欺君誤國情態有語言形容不盡處鄙夫固貴尤責其與共事者

子曰古者民有三疾今也或是之亡也

亡與無通 氣失其平則為疾故氣稟之偏者亦謂之疾昔所謂

疾今亦亡之傷俗之益偷也

慶源輔氏曰人身之氣當平和而安寧一失其平則為疾矣人之德氣稟得中則為善一失之偏則亦為疾矣

厚齋馬氏曰。或是之亡。不敢為决然之辭。恐尚亦有之。

古之狂也肆。今之狂也蕩。古之矜也廉。今之矜也忿。古之愚也直。今之愚也詐而已矣。

狂者志願太高。肆謂不拘小節。蕩則踰大閑矣。矜者持守太嚴。廉謂稜角峭厲。忿戾則至於爭矣。愚者暗昧不明。直謂徑行自遂。詐則挾私妄作矣。范氏曰。末世滋偽。豈惟賢者不如古哉。民性之蔽亦與古人異矣。

南軒張氏曰。疾生乎氣稟之偏。狂而肆者。過於進為也。矜而廉者。廉隅露見也。愚而直者。直情徑行也。此雖偏而為疾。然猶為疾之常。至於狂而放。則流而為蕩。矜而爭。則溢而為忿。戾。愚而銜直。則變而為詐。是蓋世衰俗弊。則習益遠故也。古者三疾學則可復。今

至於今之疾。悖理亂常之甚。蓋難反矣。

蔡虛齋曰。狂矜愚疾之名也。肆廉直疾之實也。蕩忿戾詐。氣稟偏而加之。以作意使然。非自然也。則非復古之狂矜愚矣。故曰。或是之亡也。南軒以詐為銜直。極確。如俗所云假志誠。即此意。

郝京山曰。人身陰陽調則無疾。二氣偏滯。疾乃生。狂矜愚疾也。肆廉直疾之本症。蕩忿戾詐疾之變為怪症也。本症易藥。怪症難治。金瑯山曰。此是就人心。驗世風。不但美德不如古。併疾亦不如古。寓無限感痛。蓋古人真病處。乃真好處。今人假有處。乃真亡處。而已矣。三字。總收上三段。見其盡喪失也。須知聖人雖傷俗。益衰。還要挽回。他由古疾進於無疾意。

子曰巧言令色鮮矣仁

重出

子曰惡紫之奪朱也。惡鄭聲之亂雅樂也。惡利口之覆邦家者。

惡去聲。覆芳服反。朱正色。紫間色。雅正也。利口捷給。覆傾敗也。

○范氏曰天下之理正而勝者常少不正而勝者常多聖人所以惡之也利口之人以是為非以非為是以賢為不肖以不肖為賢人君苟悅而信之則國家之覆也不難矣

新安陳氏曰朱南方赤之正色合赤黑而成紫北方之間也朱子曰紫近黑色過了朱即為紫便變做朱不得便是奪了朱雅樂平淡鄭便過而為淫哇過了雅便是亂雅那家力勢也甚大然被利口之人說一兩句便有傾覆之慮豈不可畏哉
蔡虛齋曰此如詩之興體用兩也字換一者字朱眩觀鄭聲燭聽人情易趨於物欲不覺尚紫抑朱好鄭厭雅故曰奪曰亂利口舌端變化顛倒是非那家由此而覆如楚之費無忌吳之宰嚭是也
郝京山曰利口較佞人尤勝亂義尚依附道理利口亂信全不根心如徐幹所云利口者心足以見小數言足以盡巧辭給足以應切問難足以斷俗疑是也

金瑯山曰此章意不主疑似所惡在奪與亂與覆色眩目聲感耳小人蠱心志二邪同類不分低昂只看古聖人制禮作樂正服色

協聲律聖讒說遠孔玉皆治亂得失最關切處便見紫色鄭聲利口讓害甚大不可不慎三惡總是正名定分防微杜漸之意朱自朱紫自紫鄭自鄭雅自雅只為人情易趨於物欲故不覺為欲所動遂至邪以勝正以為朱不如紫雅不如鄭逆耳不如利口靡然從風播蕩其心而正道廢矣故夫子惡之蒙引以上二句起下一句與孟子惡似而非一節例看

子曰欲無言

學者多以言語觀聖人而不察其天理流行之實有不待言而著者是以徒得其言而不得其所以言故夫子發此以警之

子貢曰子如不言則小子何述焉

子貢正以言語觀聖人者故疑而問之

子曰天何言哉四時行焉百物生焉天何言哉

四時行百物生莫非天理發見流行之實。不待言而可見。聖人
動一靜。莫非妙道精義之發。亦天而已。豈待言而顯哉。此亦開示
子貢之切。惜乎其終不喻也。程子曰。孔子之道。譬如日星之明。
猶患門人未能盡曉。故曰。子欲無言。若顏子則便默識。其他則未
免疑問。故曰。小子何述。又曰。天何言哉。四時行焉。百物生焉。則可
謂至明白矣。愚按。此與前篇無隱之意。相發學者詳之。

朱子曰。此語子貢聞之而未喻。故有疑問。到後來自云。夫子之文章可得而聞也。夫子之言性與天道不可得而聞也。方是契此旨處。顏曾則不待疑問。若子貢以下。又不知所疑矣。

雙峰饒氏曰。子欲無言。是要人就他躬行處體認。莫只於他言語上求。蓋就躬行處體認。便件件把作實事看。若只就言語上求。只將作空言看了。無益於得也。此與吾無隱乎爾章大同小異。那是

說行處無非至理。別無深晦底道理。此是說行處都是實理。不必於吾言語上求。

雲峰胡氏曰。集註妙道精義之發。妙道其體也。天理之渾然者也。精義其用也。天理之粲然者也。朱子感興末篇。始曰。立天幽且默。仲尼欲無言。萬物各生遂。德容自清溫。末曰。曰子昧前訓。坐此枝葉繁。發憤永。刊落奇功。收一處。三復是詩。朱子晚年之學深矣。

徽庵程氏曰。先聖雖欲無言。而未得以無言也。不以無言期諸子。而獨以無言期子貢何哉。高於子貢者。自能忘言以會道。與回言終日而無所不說。不必示之以無言也。下於子貢者。方將因言以求道。但教之以不知言。無以知人言及之。而不言謂之隱。可與言而不與之言。失人未可示之以無言也。惟天資學力。賢如子貢。而猶以言語觀聖人。不得不示之以無言耳。

蔡虛齋曰。聖人行處也盡。言處也盡。但學者偏求之於言。故說子欲無言。隱然見道理不消說得。欲人當面認取。不必專求之言內也。天何言哉。不是分疏自家。只是指點妙理。與他看。天何嘗言。而行者自行。生者自生。此正所謂天理發見流行之實。目擊道存者也。悟此則知夫子一動一靜。莫非妙理精義之發。有不待言而可述者矣。此與吾無行而不與二三子者同意。而此章指點更切。



季衷一日天理在日月間即是時行物生初非二事夫子說這道理原不待言若說天何言已亦何言便似援天自况

金瑯山曰無言不是有可說不說直是不消說聖人說無言何言何等虛員子貢說不言便似有可言而不言便執著了末節只就

天指點行生寫出眼前不待言的光景俱從見成處說說生百物行四時便是有言說四時行焉百物生焉須知自行自生即百物

四時即天也集註不待言可見豈待言而顯二句得之

孺悲欲見孔子孔子辭以疾將命者出戶取瑟而歌使之聞之

孺悲魯人嘗學士喪禮於孔子當時是必有以得罪者故辭以疾而又使其非疾以警教之也程子曰此孟子所謂不屑之教誨所以深教之也

蔡虛齋曰辭疾則拒之矣於將命者方出戶之時即取瑟而弦歌之記者領得夫子之意此使悲聞之也瞿然發深省矣聖人於不

屑教者而亦曲行其教誨如此

譚掃庵曰孺悲欲見孔子蓋在孺悲終喪時也辭以疾非不可而拒之將以品節之禮喻之也取瑟而歌使之聞之正微示以哀樂相成歎笑相生戚斯辟斯踊喜斯陶陶斯詠品斯節斯之謂禮也先王制禮不至者跋而及之過之者俯而就之此教孺悲意也即子夏閔子之喪畢見孔子而孺悲之欲見孔子可知也取瑟與琴一義也閔子哀未忘能斷以禮故夫子曰君子也孺悲不能斷以禮故欲其俯而就之謂孺悲得罪孔子者不經也

金瑯山曰辭疾而瑟而歌使知夫子非疾也使之聞之記者善會聖心處

宰我問三年之喪期已久矣

期音基下同 期周年也

君子三年不為禮禮必壞三年不為樂樂必崩

恐居喪不習而崩壞也

慶源輔氏曰禮樂自事親從兄而出不能三年之喪則禮樂之本
蹙矣幸我虞其崩壞而急之於玉帛鍾鼓之間則亦不知務甚矣

舊穀既沒新穀既升鑽燧改火期可已矣

鑽徂宮反 沒盡也升登也燧取火之木也改火春取榆柳之火
夏取棗杏之火夏季取桑柘之火秋取柞櫟之火冬取槐檀之火
亦一年而周也已止也言期年則天運一周時物皆變喪至此可
止也尹氏曰短喪之說下愚且耻言之宰我親學聖人之門而以
是為問者有所疑於心而不敢強焉爾

子曰食夫稻衣夫錦於女安乎曰安

夫音扶下同衣去聲女音汝下同 禮父母之喪既殯食粥麤衰

既葬疏食水飲受以成布期而小祥始食菜果練冠縗緣要經不
除無食稻衣錦之理夫子欲宰我反求諸心自得其所以不忍者
故問之以此而宰我不察也

蔡虛齋曰食稻衣錦就期年外說
於女安乎一句正喚醒宰我處

**女安則為之夫君子之居喪食旨不甘聞樂不樂居處不安故不為
也今女安則為之**

樂上如字下音洛 此夫子之言也旨亦甘也初言女安則為之
絕之之辭又發其不忍之端以警其不察而再言女安則為之以
深責之

蔡虛齋曰女安則爲之。是故意說話三不字。正就君子心上不安說。所以發其不忍之心。爲之指食稻衣錦言。

宰我出子曰予之不仁也。子生三年然後免於父母之懷。夫三年之喪天下之通喪也。予也有三年之愛於其父母乎。

宰我既出。夫子懼其真以爲可安而遂行之。故深探其本而斥之。言由其不仁。故愛親之薄如此也。懷抱也。又言君子所以不忍於親而喪必三年之故。使之聞之。或能反求而終得其本心也。范氏曰。喪雖止於三年。然賢者之情則無窮也。特以聖人爲之中制。而不敢過。故必俯而就之。非以三年之喪爲足以報其親也。所謂三年然後免於父母之懷。特以責宰我之無恩。欲其有以跂而及之耳。

蔡虛齋曰。上說君子心不安。故不食稻衣錦。此又言以其有三年之愛。故不能安於食稻衣錦。予而無三年之愛於其父母罷了。既有三年之愛。欲無三年之喪。以此見其不仁。三年之喪。人子聊以自盡其心耳。宰我欲短喪。此心便失。夫子不暇折其禮壞樂崩之語。亦不與細論。三年期月之是非。但反覆挑動其心。而予竟漠然。故深責其不仁。復以父母之深恩。人子之至情。明喪必三年之故。以感動之也。宰我聞之。必惻然不寧。始終欲動其不安之心也。黃禹庸曰。三年之喪。從人子至情來。宰我欲短爲期。以禮壞樂崩爲辭。豈知人子一段惻怛不安之情。不敢怠慢。不敢乖戾處。正是禮樂的原本。夫子以不然警之。所謂人而不仁。如禮樂何也。薛敬軒曰。子生三年二句。若以爲喪所以三年之故。是爲報服。非正服矣。論人子之心。固有終身若三年者。特以終身不得服喪。服張卓庵曰。三年之喪。古今皆然。以日易月。自漢文帝始。後世以爲景帝之罪。胡氏云。孝文溺於小仁。短喪廢禮。信有罪矣。然行而悖於義。雖有父令。不可從也。况三年之喪。所以盡孝子之心。又非父之所得令者也。使景帝斷以從令。非孝之義。一由古禮。後世孰敢

踵其失哉綱目不書始責不在文帝也景帝短喪從父令耳先儒猶深責之宰我非父母而創為此說何與

金瑯山曰三年之喪何能酬報深恩只人子心所自盡短喪一問夫子只就他本心不容自安處說出今之惻然自省不仁句是據上文安忍處直斷他不仁不作推原說于生三年二句非止發明喪必三年之故正指出父母顧復至愛感動他本心前後皆刺心語深足戒凡為人子者不獨為宰我言亦不獨為欲短喪言也

子曰飽食終日無所用心難矣哉不有博奕者乎為之猶賢乎已

博局戲也奕圍碁也已止也李氏曰聖人非教人博奕也所以甚言無所用心之不可爾

金瑯山曰甚言心不可無用博奕是影語假此甚彼之辭張子曰言有教動有法晝有為宵有得息有養瞬有存便是用心心無所用便放心放便無所不為難矣哉無限慨嘆使之惕然自悟

子路曰君子尚勇乎子曰君子義以為上君子有勇而無義為亂小人

有勇而無義為盜
向上之也君子為亂小人為盜皆以位而言者也尹氏曰義以為尚則其為勇也大矣子路好勇故夫子以此救其失也胡氏曰疑此子路初見孔子時問答也

朱子曰勇於義為大勇見得到處便行事孔悝一事却是見不到蓋不以出公之立為非謂正名為廷斯可見矣上二君子以德言也對小人者則以位言耳
南軒張氏曰徒知勇之務至於犯義者有之尚義則義所當為勇固在其中矣
慶源輔氏曰尚義而勇義理之勇也勇而無義血氣之勇也為血氣所使而不以義理制之則隨所居而為害故在上則逆理而為亂在下則肆欲而為盜子路有自負其勇之意故以此戒之

徐巨源曰勇達德也君子不廢但不宜尚勇尚勇便有勇無義病在一尚字夫子嘗語子路云好勇不好學其蔽也亂即此章之意義以為上不是懸空討箇義出來工夫只在好學上

金瑯山曰子路生平尚勇夫子說箇義以為上隱寓勇為下意義正所以成其為君子使君子有勇無義便不免為亂即如小人亦以無義之勇致為盜也義為上內亦含勇意只不以客氣勝正氣耳見義必為處便是勇

子貢曰君子亦有惡乎子曰有惡惡稱人之惡者惡居下流而訕上者惡勇而無禮者惡果敢而窒者

惡去聲下同唯惡者之惡如字訕所諫反 訕誹毀也窒不通也稱人惡則無仁厚之意下訕上則無忠敬之心勇無禮則為亂果而窒則妄作故夫子惡之

朱子曰勇是以氣加人故易至無禮果敢是斷然敢為蓋果敢而不窒則所為之事必當於理窒而不果敢則於理雖不通然亦未敢輕為惟果敢而窒者則不論是非率然妄作此聖人所以惡也雙峰饒氏曰果敢即前章之剛果敢屬性質勇屬血氣果敢者有學以開明之則不窒勇者有禮以節文之則不暴

南軒張氏曰君子者惟其愛人故惡稱人之惡者為其薄也惟其順德故惡居下流而訕上者為其逆也惟其循禮故惡勇而無禮者為其陵犯也惟其達義故惡果敢而窒者為其冥行也此惡不善之公心也子貢之惡惡其近似而害於知勇與直者唯仁者能惡人夫子以之惡不仁者其為仁矣子貢有焉

曰賜也亦有惡乎惡微以為知者惡不孫以為勇者惡訐以為直者

微古莧反知孫並去聲訐居謁反 惡微以下子貢之言也微伺察也許謂攻發人之陰私 楊氏曰仁者無不愛則君子疑若無惡矣子貢之有是心也故問焉以質其是非侯氏曰聖賢之所惡

如此所謂惟仁者能惡人也

雲峰胡氏曰聖賢之所惡。若有不同。然子貢所謂微訐者。因夫子所謂稱人之惡以訕上者而推之也。所謂不孫者。因夫子所謂無禮與室者而言之也。

蔡虛齋曰夫子所惡。是顯悖於理者。子貢所惡。是假托於理者。由夫子一惡。凡人世徑行執已。不循理道之事。皆所必絕也。由子貢一惡。凡人世逞機用察。不由本心之事。皆所必絕也。

呂涇野曰此章雖說惡。即可以見愛。惡稱惡訕上。欲其厚道自處也。惡勇惡直。欲其遜讓通達也。惡微不孫訐。欲其存真智勇直也。王桐菴曰維持世道。在國法則賞窮而罰佐之。在人心則好窮而惡代之。君子之惡。惡心體不明。子貢之惡。惡心術不正。皆足為世道立防。却皆合著天下人心公惡。

葛屺瞻曰夫子之惡。是理不該如此而如此。故皆用而字乃相反之辭也。賜之惡。是事本不如此而冒以為如此。乃矯造之辭也。
金瑯山曰上四項皆由理路不明。故妄言妄動。下三項所見全與理背。却認是自家好處。害世道。人心不小。聖賢所惡。總維世意。

子曰唯女子與小人為難養也近之則不孫遠之則怨

近孫遠亦去聲 此小人亦謂僕隸下人也君子之於臣妾莊以蒞之慈以畜之則無二者之患矣

慶源輔氏曰此等雖有難養之情。君子則有善養之道。莊以蒞之。則禮有以消其不孫之心。慈以畜之。則仁有以弭其易怨之意。莊慈其不近不遠之中道乎。

馮少墟曰恒情多加意於大人君子。忽畧於女子小人。不知女子小人最難養。可見修身齊家治國。真是無微可忽。無眾寡無大小無敢慢。

金瑯山曰此聖人杜亂之意。說難養正。見君子當有善養之道。近就是不遜處。遠就是怨處。惟先勿近之。先近之。一旦遠之。則怨深其本。原却在正。已不在用。情上。非徒患其難養也。聖人立言。大小兼該。雖不必將女子小人專看做婦寺。防過禍。爨道理寓其中。單指士庶說亦非。

子曰年四十而見惡焉其終也已

惡去聲 四十成德之時見惡於人則止於此而已勉人及時遷善改過也蘇氏曰此亦有為而言不知其為誰也

問此章立言之意固是勉人及時進德然鄉人之善者好之其不善者惡之苟有特立獨行之士不徇流俗眾必羣嘲共詈何為而不見惡學者亦不可不知也未知是否朱子曰見惡亦謂有可惡之實而得罪於能惡人者非不善者惡之之謂也

金瑯山曰四十無聞已不足畏見惡謂多罪過不但無聞也後此不自艾便終無進步危辭以醒之進德修業不必要令人好只是莫令人惡然豈能必人不惡我只是要我自不見惡工夫全在反躬內省處得力其字甚活須追思四十前作何工夫四十後作何補救正提醒他猛求進步處

論語卷之十七終

男佐坤編正

微子第十八

此篇多記聖賢之出處凡十一章

微子去之箕子為之奴比干諫而死

微箕一國名子爵也微子紂庶兄箕子比干紂諸父微子見紂無道去之以存宗祀箕子比干皆諫紂殺比干囚箕子以為奴箕子因佯狂而受辱

孔子曰殷有三仁焉

三人之行不同而同出於至誠惻怛之意故不拂乎愛之理而有以全其心之德也楊氏曰此三者各得其本心故同謂之仁

蔡虛齋曰三人或死或不死或去或不去疑于此是則彼非孔子即其位揆其時而原其心直斷為同出于憂君愛國之心而行之

各當於理。故迹不同而仁則一也。此等公案。非聖人誰能定之。
〔金瑯山曰〕前是序。後是傳。龍門筆法。昉此。殷有三仁。可見未嘗無
仁人也。有之而不有也。

柳下惠為士師。三黜人曰。子未可以去乎。曰。直道而事人。焉往而不
三黜。枉道而事人。何必去父母之邦。

三去聲。焉於虔反。士師獄官。黜退也。柳下惠三黜不去。而其辭
氣雍容如此。可謂和矣。然其不能枉道之意。則有確乎其不可拔
者是。則所謂必以其道而不自失焉者也。胡氏曰。此必有孔子

斷之之言而亡之矣。

〔朱子曰〕柳下惠三黜不去。其言若曰。苟以直道事人。雖適他國。終
未免三黜。若枉道事人。自不至三黜。又何必去父母之邦。蓋曉人

以不去之意。而自信其終身直道矣。此所以為和而介歟。若徒知
不去之為和。而不知所以三黜者之為有守。未足以議柳下惠也。
〔雙峯饒氏曰〕柳下惠謂直道事人。焉往而不三黜。是欺天下無一
君之可事。無一國之可往。便是他不恭處。若夫子則歷聘侯國。何
嘗以天下為無可有為之人。但惠辭氣雍容不迫。而不枉道之意
自在其中。此所以為聖之和也。三黜亦想因諫諍刑罰不中。而然
新安陳氏曰。直道難容。雖他國皆然。枉道易合。雖吾國亦可。言終
不能枉道以求合。則姑守道而不去也。其三黜不去。雖見其和。而
不能枉道。則不失其介。可謂和而不流者矣。

〔魯齊王氏曰〕舜命臯陶。汝作士。士之名始見於刑官。周禮秋官司
寇之屬。有士師之職。刑官曰士。其長曰師。故士師之下。有鄉士。遂
士。縣士。訝士。皆掌獄詞者。

〔張南軒曰〕柳下惠仕則仕。黜則黜。未嘗枉道也。若枉道則害於和
之理矣。至孔子道不行。父母之邦。可以去而亦去。雖周行天下。未
嘗苟仕。此所以異也。此篇記柳下惠於三仁之後。以見其趨之一
下文又詳著孔子之事。以見聖之為至也。

〔金瑯山曰〕惠之不去。惠自有不防於黜者。此意却難與或人言。故
只就所云去者。而以枉道直道商之。何必去父母之邦。正見直道

終不可變。直道事人。說出三黜根原。枉道句。設言。以見若肯自枉。道不必他適也。却。不說。出父母之邦。見容可以免黜意。總是望魯。從直道振刷有為。不當悅佞惡直。言外寓諷諭意。細看枉道二句。自見。僅云下惠不忍去宗國。非是。

齊景公待孔子曰若季氏則吾不能以季孟之間待之曰吾老矣不能用也孔子行

魯三卿季氏最貴孟氏為下卿孔子去之事見世家然此言必非面語孔子蓋以自告其臣而孔子聞之爾 程子曰季氏強臣君待之之禮極隆然非所以待孔子也以季孟之間待之則禮亦至矣然復曰吾老矣不能用也故孔子去之蓋不繫待之輕重特以不用而去耳

厚齊馮氏曰此與其臣議所以處子之辭子魯人也故議以魯君所以待三卿者待之是時諸侯之賢而國勢富強者莫如齊之景公此子所以願仕焉者也晏平仲得政已三世矣景公至魯與子語而說之其後子不得志於魯遂之齊景公數問政而說嬰之所深忌也所以進以間言也方責效於期月之間而嬰乃謂累世不能殫其學景公所以謂吾老而不可俟也孔子行承不能用一句金瑯山曰魯季平子三家攻昭公昭公奔齊齊處昭公軋侯魯亂孔子適齊景公問政於孔子悅將封以尼谿之田晏嬰沮之當日季氏有費孟氏有郕皆封邑也尼谿視費不足視郕有餘故曰以季孟之間待之孔子行即所謂去齊接漸而行也然孔子之留齊去齊不在齊之用不用也留齊八年從公於難也接漸之行政昭公薨於軋侯之年從公始終於齊也公薨孔子反魯終不仕於平子之朝蓋知孔子之留齊去齊非為景公也

齊人歸女樂季桓子受之三日不朝孔子行

歸如字或作饋朝音潮 季桓子魯大夫名斯按史記定公十四



年孔子為魯司寇攝行相事齊人懼歸女樂以沮之尹氏曰受女樂而怠於政事如此其簡賢棄禮不足與有為可知矣夫子所以行也所謂見幾而作不俟終日者與 范氏曰此篇記仁賢之出處而折衷以聖人之行所以明中庸之道也

蔡虛齋曰齊不能用孔子又沮魯用之怠已忌人愚不肖之通患也女樂之受君相與有責焉而記者以為季桓子受之蓋孔子用魯道都出甲桓子心忌之久矣故必勸魯君受之外借隙於隣國內分謗於魯君而陰泄其強國削家之恨故曰桓子受之遂至君三日不視朝臣三日不往朝而孔子行明乎季桓子之行孔子也金那山曰孔子為魯司寇墮三都出藏甲志强公室桓子心忌之齊窺見此意故敢於行間桓子亦樂齊有此間明受其餌而不辭是時女樂雖不至孔子逆知其不能有為於魯使郊而致膳孔子猶行也記者不曰魯君受而曰桓子受微詞也

楚狂接輿歌而過孔子曰鳳兮鳳兮何德之衰往者不可諫來者猶可追已而已而今之從政者殆而

接輿楚人佯狂辟世夫子時將適楚故接輿歌而過其車前也鳳有道則見無道則隱接輿以比孔子而譏其不能隱為德衰也來者可追言及今尚可隱去已止也而語助辭殆危也接輿蓋知尊夫子而趨不同者也

孔子下欲與之言趨而辟之不得與之言

辟去聲 孔子下車蓋欲告之以出處之意接輿自以為是故不欲聞而辟之也

雲峰胡氏曰接輿沮溺丈人章首冠以楚狂二字皆楚之狂者也狂者志行之過集註此篇之末謂夫子於此四人皆倦倦接引之意在陳之嘆蓋亦如此然魯之狂士何幸而得在聖人陶冶之中楚之狂者又何不幸而自棄於聖人造化之外也哉

長沮桀溺耦而耕孔子過之使子路問津焉

沮七余反溺乃歷反 二人隱者耦並耕也時孔子自楚反乎蔡

津濟渡處

長沮曰夫執輿者為誰子路曰為孔丘曰是魯孔丘與曰是也曰是知津矣

夫音扶與平聲 執輿執轡在車也蓋本子路御而執轡今下問

津故夫子代之也知津言數周流自知津處

問於桀溺桀溺曰子為誰曰為仲由曰是魯孔丘之徒與對曰然曰滔滔者天下皆是也而誰以易之且而與其從辟人之士也豈若從辟世之士哉耰而不輟

徒與之與平聲滔吐刀反辟去聲耰音憂 滔滔流而不返之意

以猶與也言天下皆亂將誰與變易之而汝也辟人謂孔子辟世

桀溺自謂耰覆種也亦不告以津處

慶源輔氏曰桀溺以夫子為辟人而天下皆滔滔不反則世人無一不可避者故絕人逃世以為潔而自謂其能辟世滔滔二句以譏夫子且而二句以曉子路

東坡蘇氏曰人皆趨世出世者誰人皆遺世世誰為之

蔡虛齋曰且而二句許白雲說譏子路然諷孔子意在其中
沈虹野曰誰以易之言舉世皆無道誰人用聽服你與你變亂為
治誰字兼君民在

子路行以告夫子憮然曰鳥獸不可與同羣吾非斯人之徒與而誰與天下有道丘不與易也

憮音武與如字 憮然猶悵然惜其不喻已意也言所當與同羣者斯人而已豈可絕人逃世以為潔哉天下若已平治則我無用變易之正為天下無道故欲以道易之耳 程子曰聖人不敢有忘天下之心故其言如此也張子曰聖人之仁不以無道必天下而棄之也

慶源輔氏曰天生聖賢欲其平治天下者理之常也其或雖生聖賢而未欲平治天下者理之變也然既曰聖賢則必以天地之常者為心而其所以平治天下之道又備盡於已舉而措之易亂為治固必有自然之應如其不然則亦安於理而已若天下既已平治則亦何用聖人以易之哉
蔡虛齋曰鳥獸二句反其避人之譏有道二句反其滔滔之說非斯人之徒與而誰與蓋所耦之人亦人也無處非人無處非吾所與之人即欲避之而不可得與字自情之關切言有一體同仁意有道不與易正發出易世深心正為天下滔滔聖人欲立欲達之心豈忍坐視故欲以道變易之耳欲天下有道則仕亦可不仕亦可何用如此栖栖不舍耶
金瑯山曰沮溺只因天下無道便長往避世孔子正因天下無道却輒環與易憮然以下特自言欲易天下之志寓許多感慨只看沮溺避世却耦而耕離了人如何成得個世界聖人直是此處認得親切未嘗避人何忍避世人何忍避世

子路從而後遇丈人以杖荷篠子路問曰子見夫子乎丈人曰四體

四書通 卷之十八 六
不勤五穀不分孰為夫子植其杖而芸

篠徒弔反植音值 丈人亦隱者篠竹器分辨也五穀不分猶言不辨菽麥爾責其不事農業而從師遠遊也植立之也芸去草也

子路拱而立

知其隱者敬之也

止子路宿殺雞為黍而食之見其二子焉明日子路行以告子曰隱者也使子路反見之至則行矣

食音嗣見賢遍反 孔子使子路反見之蓋欲告之以君臣之義而丈人意子路必將復來故先去之以滅其跡亦接輿之意也

子路曰不仕無義長幼之節不可廢也君臣之義如之何其廢之欲潔其身而亂大倫君子之任也行其義也道之不行已知之矣

長上聲 子路述夫子之意如此蓋丈人之接子路甚倨而子路益恭丈人因見其二子焉則於長幼之節固知其不可廢矣故因其所明以曉之倫序也人之大倫有五父子有親君臣有義夫婦有別長幼有序朋友有信是也仕所以行君臣之義故雖知道之不行而不可廢然謂之義則事之可否身之去就亦自有不可苟者是以雖不潔身以亂倫亦非忘義以徇祿也福州有國初年寫本路下有反子二字以此為子路反而夫子言之也未知是否

范氏曰隱者為高故往而不返仕者為通故溺而不止不與鳥獸同羣則決性命之情以饗富貴此二者皆惑也是以依乎中庸者為難惟聖人不廢君臣之義而必以其正所以或出或處而終不離於道也

雙峰饒氏曰前章說天下有道不與易可見聖人救世之仁此章說君臣之倫不可廢可見聖人出仕之義問行其義與道之不行道義如何分曰只一般道指全體言義指一事言聖人之道行於天下則人人共由此道如義只是君臣有義一件而已然道必遇賢君而後行義則是我自家行底孔子雖知當時道之不行而自家却不可不行其義

朱子曰義便有進退去就在裏如丈人直是截斷只見一邊君臣之義本乎天而具乎我道存乎我而行止則繫乎天存乎我者不可廢繫乎天者則非敢必也故孔子卒老於行而終不敢自潔以廢君臣之義義者宜也曰義事便有可否身便有去就可則就之否則去之固有截然不可移易者故聖人之法君子之行既不可

潔身而亂倫如隱者之為亦不可忘義而徇祿如世俗之仕者也蔡虛齋曰不仕無義一句是主下皆申明此句之意長幼之節至廢大倫是說丈人君子之仕三句是明自己君子之仕也言君子欲仕之意也仕不獨君子必君子之仕方為行義即如夫子拜下不拜上一節君臣之分凜然足以杜僭竊正名分豈非行義郝京山曰既云行義又說道不行已知之矣非謂行義不必行道也道行而仕即君臣之義行道即不行而君臣之義未嘗一日亡也已知之矣一句蓋不以君舍我而忘君雖不行而猶庶幾也金瑯山曰君子之仕二句重君子二字不仕無義君臣之義上文已說明此二句正見君子欲仕之意與苟且仕路不同行其義其字見君子將一身擔荷這義不肯旁諉他人雖欲不仕不可得其字須如此看夫子不仕天下亦自有君臣在義何嘗廢但當時只存個空名其實僭竊猾亂無父無君必得夫子出來整頓一番方成個君臣夫子直是擔荷經世一件大事使天下萬世凜然知有君臣之義豈忍潔身避世行字全在夫子轍環天下處看出非必得志大行而後為行義也

逸民伯夷叔齊虞仲夷逸朱張柳下惠少連

少去聲下同 逸遺逸民者無位之稱虞仲即仲雍與泰伯同竄

荆蠻者夷逸朱張不見經傳少連東夷人

蔡虛齋曰逸對勞言彼見時不可為但自遂其高自行其志不為世法所拘何等逍遙自在故曰逸民按此數人非遜世則混世大抵商周之季不得志於時者之所為也彼皆以用世為不可以出世為可是以成其逸孔子則欲以有道易無道視天下如一身未嘗以用世為不可遺世為可有必不忍為逸者故曰我則異於是金瑯山曰逸民中亦有三黜不去端拱南面以君吳非無位之稱古註云逸民者節行超逸也蓋超然物外不循常格無所拘繫之意不專指隱遯言故有隱而逸者有仕而逸者其心則一也

子曰不降其志不辱其身伯夷叔齊與

與平聲

雙峰饒氏曰夷齊遜世離羣與沮溺輩異遜國而逃父子兄弟之倫厚矣諫伐而餓君臣之倫厚矣此便見不是全然忘世底人蔡虛齋曰古史謂夫子言夷齊不怨以讓國言不降辱以去周言盟於心為志見於行為身非有兩意先下評語讓指兩人想慕無窮記雜記下孔子曰少連大連善居喪三日不怠三月不懈期悲哀三年憂東夷之子也言其生於夷狄而知禮也

林次崖曰不降不辱總是一事志以立心言身以制行言

謂柳下惠少連降志辱身矣言中倫行中慮其斯而已矣

中去聲下同 柳下惠事見上倫義理之次第也慮思慮也中慮言有義意合人心少連事不可考然記稱其善居喪三日不怠三月不懈暮悲哀三年憂則行之中慮亦可見矣

慶源輔氏曰慮對倫言倫是義理之次第則以亦人之正也中倫謂所言合倫理中慮謂所行當人心乃人之公心即義理所在也

蔡虛齋曰他人降志辱身人得而降之辱之惠連只自降其志不求為伸自辱其身不求為榮觀三黜不去可見比之夷齊為降辱耳據其所言不去之意辭氣雍容而不枉道之意確然見於言外言中倫也三黜而猶仕仕而終不枉道行中慮也於此見和而不流異乎他人之降志辱身矣其斯而已矣謂其可取者在此耳非謂其無他善也

謂虞仲夷逸隱居放言身中清廢中權

仲雍居吳斷髮文身裸以為飾隱居獨善合乎道之清放言自廢合乎道之權

慶源輔氏曰仲雍退處句吳以獨善其身所以合乎道之清清即伯夷之清也放言自示其不可用所以合乎道之權蓋當時止有一廢即廢是道理也故以放言自廢為中權

張卓庵曰隱居放言是一套事清與權是從隱放內看出見二子非潔身亂倫者比廢自是身廢即隱居二字放言又隱居內一端

我則異於是無可無不可

孟子曰孔子可以仕則仕可以止則止可以久則久可以速則速所謂無可無不可也謝氏曰七人隱遯不汙則同其立心造行則異伯夷叔齊天子不得臣諸侯不得友蓋已遯世離羣矣下聖人一等此其最高與桡下惠少連雖降志而不枉已雖辱身而不求合其心有不屑也故言能中倫行能中慮虞仲夷逸隱居放言則言不合先王之法者多矣然清而不汙也權而適宜也與方外之士害義傷教而亂大倫者殊科是以均謂之逸民尹氏曰七人各守其一節而孔子則無可無不可此所以常適其可而異於逸

民之徒也。揚雄曰：觀乎聖人，則見賢人。是以孟子語夷惠，亦必以孔子斷之。

南軒張氏曰：無可者，不以可為主也。無不可者，不以不可為主也。夫子之心，當可則可，當不可則不可。其曰無者，言其不存乎心也。在夷齊必以降志辱身為不可，而惠連則以為可。惠連必以隱居放言為不可，而仲逸則以為可。是各立一不可之見於中，所以異於夫子也。

致堂胡氏曰：無可無不可，以五字成文。當渾全以會其意，不當分析以求其義。

蔡虛齋曰：夷齊志行天下所知，惠連似和而縱矣。仲逸似隱而僻矣。要皆先有不可之見於胸中，而夫子獨登其潛德之光如此。即可不可，偶與諸子合，自是無可無不可。

全那山曰：聖人非自附於逸民，亦非自別於逸民。只偶爾叙次逸民，遺行見已有不忍自處於逸之意。正倦倦不忘用世處。此必目擊當時沮溺丈人感懷千古，引逸民發論，謂從來高人不乏卓行可風，但我不學他做超世的事。不著不可兩見，只隨時隨處應

之耳。總見逸民遇時不可為，各以得行其志為快。聖人欲易無道將身與世看做一體。痛癢切身，如何去逸得慨歎意在言外。

大師摯適齊

大音泰 大師魯樂官之長摯其名也

蔡虛齋曰：去此之彼，為適是避地者。

亞飯干適楚三飯繚適蔡四飯缺適秦

飯扶晚反繚音了 亞飯以下以樂侑食之官干繚缺皆名也

齊氏曰：魯諸侯故止三飯。然不言一飯，豈周公錫天子樂而魯僭之孔子正樂而去其一邪？記者起數以亞，其仍魯之舊以見其僭之僭邪。

周禮春官大司樂王大食三宥皆令奏鍾鼓注大食朔日與月半以樂侑食時也

朱子曰：白虎通云王者平旦食晝食晡食暮食凡四飯。諸侯三飯

大夫再飯。故魯之師官曰亞飯以下。蓋三飯也。
厚齋馮氏曰：天子諸侯皆以樂侑食，每食樂章各異，各有樂章。

鼓方叔入於河

鼓擊鼓者方叔名河河內

蔡氏曰：一往不反，為入。是避世者。

播鼗武入於漢

鼗徒刀反。播搖也。鼗小鼓兩旁有耳持其柄而搖之，則旁耳還

自擊，武名也。漢漢中

少師陽擊磬襄入於海

少去聲。少師樂官之佐陽襄，二人名襄，即孔子所從學琴者。海

海島也。此記賢人之隱道，以附前章。然未必夫子之言也。末章

放此。張子曰：周衰，樂廢。夫子自衛反魯，一嘗治之，其後伶人賤工

識樂之正。及魯益衰，三桓僭妄，自大師以下皆知散之。四方逾河

蹈海，以去亂。聖人俄頃之助功化如此，如有用我，期月而可，豈虛

語哉。

金瑯山曰：遲遲吾行，不脫冕而行，應楚昭之聘，臨河而返，浮海一
嘆居夷一欲，惟夫子所以無可無不可也。惟師摯諸人，則竟飄然
長往，適者適而入者入矣。

周公謂魯公曰：君子不施其親，不使大臣怨乎不以，故舊無大故則

不棄也。無求備於一人。

施陸氏本作弛福本同 魯公周公子伯禽也弛遺棄也以用也
 大臣非其人則去之在其位則不可不用大故謂惡逆李氏曰四
 者皆君子之事忠厚之至也 胡氏曰此伯禽受封之國周公訓
 戒之辭魯人傳誦久而不忘也其或夫子嘗與門弟子言之歟

林次崖曰大臣不信用則怨故於大臣則信用之不使怨乎不信
 用也然不是怕怨方用他須識此意故舊無大故則不棄若有大
 故則亦棄之人不能兼才各有所長若求備於一人則有一得之
 長者皆所棄矣。

金瑯山曰周公之治魯也尊尊而親親此道得也夫子之對哀公
 亦只舉文武之政布在方策者而已

周有八士伯達伯适仲突仲忽叔夏季隨季騶

騶鳥瓜反 或曰成王時人或曰宣王時人蓋一母四乳而生未

子也然不可考矣 張子曰記善人之多也愚按此篇孔子於三


仁逸民師摯八士既皆稱贊而品列之於接輿沮溺丈人又每有
 惓惓接引之意皆衰世之志也其所感者淡矣在陳之歎蓋亦如
 此三仁則無間然矣其餘數君子者亦皆一世之高士若使得聞
 聖人之道以裁其所過而勉其所不及則其所立豈止於此而已

哉

金瑯山曰周有二字最重惟祖宗培育深厚故能有之也須本周
 室開氣運說來八士又在亂之外只據一家言不必穿鑿
 生議
 論。

論卷之十八終

男佐履編正



子張第十九 此篇皆記弟子之言而子夏為多子貢次之蓋孔門自顏子以下穎悟莫若子貢自曾子以下

篤實無若子夏故特記之詳焉十五章

新安陳氏曰所記五人子張二章子夏十一章子游二章曾子四章子貢六章

慶源輔氏曰穎悟篤實皆以資質言二子資質次於顏曾顏曾學力有非二子所能及者顏之穎悟知之固徹行之又至曾之篤實行之固至知之又徹子貢則穎悟於知而不足於行子夏則篤實於行而不足於知焉

子張曰士見危致命見得思義祭思敬喪思哀其可已矣

致命謂委致其命猶言授命也四者立身之大節一有不至則餘無足觀故言士能如此則庶乎其可矣

西山真氏曰義敬哀皆言思致命不言思者死生之際惟義是徇有不待思而決也

新安陳氏曰見危致命者處變而決之於一旦也思義敬哀者處嘗而思之於平時也平時能思此三者而行之則其人好義謹厚已養之有素矣一但臨大變故庶能於當死而必死焉否則臨財利而苟得臨喪祭而苟且何望其臨變故而能死哉

蔡虛齋曰世間惟利害最重今見害不苟去見利不苟就安於義命人道惟喪祭為根本今祭能思敬喪能思哀全其本心則大節無虧其可已矣言儘好了蓋許其為士也朱子以為士分內事當不止此故訓曰庶乎其可以少抑之或問其可已矣與前篇可也之說曰可則同然曰可也則其語抑曰其可已矣則其語揚

金瑯山曰士字提起看末句猶言必如此方成其為士四者皆立身大節須在平日用工夫不然臨時便苟且過去如何能自立

子張曰執德不弘信道不篤焉能為有焉能為亡

焉於處反亡讀作無下同 有所得而守之太狹則德孤有所聞而信之不篤則道廢焉能為有亡猶言不足為輕重

慶源輔氏曰德孤言不能兼有眾德子然固守一節者也德得諸已而居之不弘則輕喜易足有一善則自以為天下莫已若矣道有所聞而信之不篤則亦或作或輟銳始怠終終亦必亡而已矣雙峰饒氏曰執德弘者器量大信道篤者志操堅如此方是世間卓然底人若執德既不能弘信道又不能篤這般人雖有之亦不足為當世重無之亦不足為當世輕

朱子曰弘之為寬廣以量言也人所以體道者存乎德所以執德者存乎量量有大小故所以執德有弘不弘也非其量之大則所以執德者孰能寬廣而不迫哉信道之貴乎堅確者此以志言也人所以進德者繇乎道而所以信道者存乎志志有強弱故所以信道者有篤不篤也非其志之強則所以信道者孰能堅確而不移哉觀此二言為學之道信非福心狹量質薄弱氣弱者所能及也林次崖曰不弘指片善自足不以遠大自期者不篤知得道理當如是或以他念雜之焉能為有亡猶言有之無所補少之無所缺金瑯山曰此言不執德不信道的人無足深責既執德豈可不弘既信道豈可不篤還須克滿此德量使無毫髮虧欠還須信得徹底不為曲學異端所移裁能擔荷世道末二句正鞭策他向前非斷其不足為輕重也

子夏之門人問交於子張子張曰子夏云何對曰子夏曰可者與之
其不可者拒之子張曰異乎吾所聞君子尊賢而容衆嘉善而矜不
能我之大賢與於人何所不容我之不賢與人將拒我如之何其拒
人也

賢與之與平聲 子夏之言迫狹子張譏之是也但其所言亦有
過高之弊蓋大賢雖無所不容然大故亦所當絕不賢固不可以
拒人然損友亦所當遠學者不可不察

朱子曰初學當如子夏之言然於不可者但亦疎之而已拒之則
害交際之道成德當如子張之說然於有大故者亦不得而不絕
也以此處之其庶幾乎
齊氏曰拒則大迫何所不容則幾於無別

蔡虛齋曰君子尊賢二句是述君子交人之道容字矜字皆破子
夏一拒字我之大賢以下又以已意辨其拒之之非何所不容是
不必拒人人將拒我是不能拒人見拒之說無論賢不賢皆無一
而可以施之於交也雲峰胡氏云不必拒而拒之其交不廣當拒
而不拒其交不正必如集註之言則盡乎交之道矣
金瑯山曰子夏得聖人毋友不如己之意子張得君子厚德載物
之意學者取友輔仁當如子夏慎所與大心體物當如子張無不
容道並行而不相悖母徒以二子廣狹分軒輊

子夏曰雖小道必有可觀者焉致遠恐泥是以君子不爲也

泥去聲 小道如農圃醫卜之屬泥不通也 楊氏曰百家衆技
猶耳目鼻口皆有所明而不能相通非無可觀也致遠則泥矣故
君子不爲也

莊子曰天下大亂道法不一天下多得一察焉以自好譬如耳目
鼻口皆有所明不能相通猶百家衆技皆有所長時有所用雖然



不該不徧。一曲之士也。

朱子曰：小者對大之名。正心修身以治人道之大者也。專一家之業而治於人道之小者也。然皆用於世而不可無者。其始固皆聖人之作。而各有一事一物之理焉。是以必有可觀。然能於此或不

能於彼。而不可通於君子之大道也。
新安陳氏曰：大道愈遠而愈通。小道致遠而不通。是以君子於大道盡心焉。而於小道不屑用其心也。

勉齋黃氏曰：農圃醫卜。施之目前淺近。不為無益。然求如聖人之道。無所不通。則不可也。曰：小道合聖人之道。而小者也。異端違聖人之道。而異者也。小者猶可以施之。近異端如佛老楊墨之類。不可。以頃刻施也。彼之無父無君。又何待致遠而後不通哉。

蔡虛齋曰：致遠。是以其道推而致遠。如治國平天下是也。此只就小道說。若聖人一以貫萬。執御游藝。亦何不可為。

周海門曰：此或承無為小人儒之訓而言也。小道即小人儒學問。曲謹博聞。最是好看。却不通大道。不為者。正是無為小人儒也。

金瑯山曰：小道不是全與道無涉。但不可謀。王。斷。國。經。天。緯。地。傳諸萬世。而無弊耳。君子雖不絕小道。決不為小道。恐其泥吾遠也。不為內防閑甚嚴。註楊氏說得之。可觀。根道字說亦。是道之散見

處。小道不止農圃醫卜。凡百家無益於修身治世者。皆是說可觀便見。不可致遠。便不可為。若為之。則旁寄於曲說。滋禍於末流。害道甚大。故君子慎之。

子夏曰：日知其所亡。月無忘其所能。可謂好學也已矣。

亡讀作無。好去聲。亡無也。謂凡之所未有。尹氏曰：好學者日

新而不失。

知其所亡。無忘所能。與溫故知新意不同。溫故知新。是溫故之中。而得新底道理。此却是因知新而帶得溫故。

勉齋黃氏曰：求之敏。則能日新。守之篤。則能不失。進學之道。無以復加於此矣。

汪氏曰：此章當與時習章參看。此以每月每日言。時習以時時言。日有所進。而知其所未得。又能月有所守。而不忘其所已得。知其所以無。則識愈長。而日新。保其所有。則得愈堅。而不失。既日新而且不失。非好學能如是乎。

樂庵李氏曰日知其所亡者凡欲學而未至者也月無忘其所能者已學而得之者也君子教人於其所未學則切切然日以爲念於其所已學則一月之間須嘗自省也如此則學安得不進

蔡虛齋曰好學全在日月二字上見得凡人都是怛惕時日故無所知即有所知又旋忘了人知爲學誠能孜孜汲汲知其所無所無者既有諸已却又拳拳服膺久而弗失其心無一時一刻不在學上故曰可謂好學也已知字對無忘說非知行之知乃汲汲以求道之意以用功言無忘亦然所亡所能指義理日月二字要看得圓只是一日有一日之功一月有一月之功非必以日月計也

周海門曰學者須先識所亡所能是何物日知無忘是如何下手若終日在知解上盤桓究竟於聖學本領無涉只就尋常日用間認取體貼舉眼動步皆足證心此即所謂時習方可謂好學

金瑯山曰學字不可淺看亡是我所未能者自知之而學日進能即我所已知者無忘之而失去總之時時體認存養在心上用工夫無一刻間斷默雷云亡不必作無吾人日用動靜此心走作處最多只爲無操存提醒之功所以有亡去而不知者口知所亡全是檢點細密處月無忘便是存養不懈處此亦有理但集註鉄案竹舊爲是

子夏曰博學而篤志切問而近思仁在其中矣

四者皆學問思辨之事耳未及乎力行而爲仁也然從事於此則心不外馳而所存自熟故曰仁在其中 程子曰博學而篤志切問而近思何以言仁在其中矣學者要思得之了此便是徹上徹下之道又曰學不博則不能守約志不篤則不能力行切問近思在已者則仁在其中矣又曰近思者以類而推蘇氏曰博學而志不篤則大而無成泛問遠思則勞而無功

朱子曰此未是說仁處乃是尋討個求仁門路是爲學工夫未是爲仁必如夫子所以語顏冉者乃正言爲仁耳然人能博學而篤志切問而近思則心不放逸天理可存故曰仁在其中博學是都理會過近思是注心著力處博學是大規模近思是漸進工夫篤

志是至誠懇切以求之。不要理會不得又掉了。若只汎汎博學。更無懇切之志。便成放不知求底心。惟篤志又切問近思。便有歸宿處。這心便不汎濫。雖非所以為仁。然學者用力於此。仁在其中矣。在其中。非便是仁。而在其中。干祿直躬章同。

西山真氏曰。切問。謂以切己之事。問於人也。近思。謂不馳心高遠。就其切近者思之也。外問於人。內思於心。皆先其切近者。則一語有一語之益。一事之功。不必汎然馳騫而無補於身心也。

新安陳氏曰。博學。先提其綱。篤志。切問。近思。是分其自。蓋就所博學者。而志之篤。問之切。思之近也。學不博。固失之狹隘。志不篤。問不切。思不近。則又失之泛濫。亦徒博耳。

勉齋黃氏曰。集註謂心不外馳。而事皆有益。蓋以博篤切近為心不外馳。學志問思為事皆有益。夫以學志問思為有益於事。乃是有所求而得之。不可以為求此而得彼也。後乃以所存自熟易之。則專主於心之所存而言。人惟無所用其心。則其心放逸而不收。學之博。則此心嘗有所繫著而不放逸矣。人惟所志苟簡而不堅。則其心泛濫而不一。志之篤。則此心嘗有定向而不汎濫矣。問不切。思不近。則其所用心。皆在吾身之外矣。切問近思。則皆求其在己。而無復外馳之患矣。人能盡此四者。雖學問思辨之事。自有得

夫操存涵養之效。所以謂仁在其中矣。

雙峰饒氏曰。志字要粘上面。學字說切問。亦須從近處思量起。方不流於虛遠。以序求之。則博學在先。篤志切問。近思在後。學博矣。而志不篤。問不切。思不近。則汎濫而不著已。如何可至於仁。

蔡虛齋曰。仁者心之德。即中庸所謂擇善之善。誠身之誠也。擇而執之。則仁矣。此乃擇善工夫。方用功去。證本體未及。固執未能不違乎仁。故僅以在中為言。然其功弗措。至於純熟。則亦與仁為一矣。仁之理本合宇宙為一源。不就萬處。理會却無從見。一故必博

學。多其聞見。觀其會通。又必切問。切如刀切物。一一剖析開來。却又收攝到志思上。所學皆用志不分。沉篤而不涉獵。所思皆不鑿

不泛。務求此理之至當。如此則於吾心之德。既有以見其全。又有以會其一。分明是明善工夫。雖未至與仁合一。而仁已在其中矣。

徐勿齋曰。學與問似在外。而實則借外證內。志與思則愈歛而內矣。看兩而字。垂重下面。篤志近思。乃是真學問。

金瑯山曰。仁是心體。須用實地工夫。收斂向裏面來。裁無放逸。博學與孟子博學同。篤志切問近思。正是詳說處。這心便不汎濫走作。中字。正指博學篤志等說。非此外另有一仁在中也。

子夏曰百工居肆以成其事君子學以致其道

肆謂官府造作之處致極也工不居肆則遷於異物而業不精君子不學則奪於外誘而志不篤尹氏曰學所以致其道也百工居肆必務成其事君子之於學可不知所務哉愚按二說相須其義始備

雲峰胡氏曰工必居肆則耳目之所接者在此心思之所為者在此而其事即成於此君子之居於學也亦然集註二說相須然前說尤重蓋居肆而不務成其事者有之矣未有不居肆而能成其事者也學而不知所務者有之矣未有不學而能致其道者也慶源輔氏曰繇朱子之說則君子之欲致道不可不繇於學繇尹氏之說則君子之學必當務致乎道欲致道而不繇學則心志為外物所誘遷而不能專一固不足以致其道然學而不足以致道則所學又不過口耳之習欲致其道則必繇學既曰繇學則必務

致道然後為君子之事也

胡氏曰前說則重在居肆與為學後說則重在成事與致道一至於用功一至於立志然知所以用功而志不立不可也知所以立志而功不精亦不可也二說相須而備非如他章存兩說之比也蔡虛齋曰致是究極止至之義學力透時即是致道無盡境曰以致其道何日是已致之時學何日能已居肆之工終身豈能離肆金瑯山曰此節上段引起下段一直說下重在學上致其道正是學處以字著力不日至而曰致至則已成了致正有工夫此胡子云前說尤重也

子夏曰小人之過也必文

文去聲 文飾之也小人憚於改過不憚於自欺故必文以重其過

雲峰胡氏曰此章當與後章子貢所謂君子之過也參看蓋君子有過幸人知之非惟不敢自欺亦不欺人故其過也卒改而為善

小人之過。惟恐人知之。不惟欺人。徒以自欺。其過也。卒流而為惡。
徐勿齋曰。須先窮究。文過根源。陸象山云。學者不長進。只是好已
勝。古人惟貴知過。今各自執己是。被人說破。便愕然。百計文飾。到
底。以此日流於汙下。按好勝一句。說盡小人心事。後世君子。却多
犯此病。若不除好勝。自是病根。學問德業。終無長進。
金瑯山曰。君子無心得過。有心改過。故常能寡過。小人以私心成
過。與無心之過殊。然猶望其改。故亦名過。若必欲文飾。自欺欺人。
終無自新之日矣。所惡於小人者。不在過。而在文過。此亦是喚
醒他。修省意。天下明知其過。還要欺天下。自心有時難昧。畢竟要
瞞自心。方是必字之意。必字內。伏許多機詐。在。

子夏曰。君子有三變。望之儼然。即之也溫。聽其言也厲。

儼然者。貌之莊。溫者。色之和。厲者。辭之確。程子曰。他人儼然則
不溫。溫則不厲。惟孔子全之。謝氏曰。此非有意於變。蓋並行而不
相悖也。如良玉溫潤而栗然。

勉齋黃氏曰。儼者。手恭而足重。溫者。心平而氣和。厲者。義精而辭
確。聖人本無三變。但目他人觀之。則遠望近就。聽其言若各有異
似乎有三變耳。厲。只當訓嚴。而云確。何也。嚴則恐人認做猛烈。確
者。是是非非。確乎不易之義。形容言厲最切。

新安陳氏曰。儼然而溫。剛中有柔也。溫而厲。柔中有剛也。剛柔不
偏。陰陽合德。人見以為三變。聖人自然。然而然。豈有意於變也。

金瑯山曰。君子身備中和。容貌辭氣自然。如此三句。須串合看。方
見一時氣象。流行不測。處變只是變動不拘。即所謂動容周旋中
禮。不是儼變為溫。溫變為厲。自觀者見他各中。其節故言變。君子
只是不失其常。註謝氏說。是溫即在儼中。厲即在溫中。總是一
個君子。却一端盡他不得。君子初不自知。只人就望即聽。彷彿其
氣象耳。此子夏形容最親切處。却還有形容不能盡處。

子夏曰。君子信而後勞。其民未信則以為厲已也。信而後諫。未信則
以為謗已也。

信謂誠意惻怛。而人信之也。厲猶病也。事上使下。皆必誠意交孚。

而後可以有爲

慶源輔氏曰信而上下交孚。已雖有信而人或未之信。猶未可謂之信也。若上下未交孚。則君之勞民。所以安其生也。而反以為厲已也。臣之諫君。所以成其德也。而反以為謗已也。如湯武之使民。則可謂信而後勞之也。如伊傅之告君。則可謂信而後諫矣。

雙峰饒氏曰誠意惻怛。是說所以信之之由。惻怛屬愛。君之於民。臣之於君。皆當以愛為主。君愛其民。惟恐有勞。民平日已信之。一旦不得已而勞之。亦何所怨。臣愛其君。惟恐有過。君平日已信之。一旦不得已而諫之。亦何所嫌。我以誠意惻怛感。彼必以誠意孚。又安有以為厲謗者乎。

蔡虛齋曰此信字。指人信我說。其本則在誠意惻怛上。最要認。君子指臣說。上有君。下有民。平素當積誠以動君。民則勞民。諫君無不悅從。不然非厲而以為厲。非謗而以為謗。信誠不可一日緩矣。
金瑯山曰事上使下。須先信。信只實心愛民愛君。便是此心自信。信得過。使人亦信得過。信在未勞未諫前一段精誠感格上看。末信二句是反語。足上意。說到謗厲。不是避勞與諫正見。信不可緩處。

子夏曰大德不踰閑小德出入可也

大德小德猶言大節小節閑闕也。所以止物之出入。言人能先立乎其大者。則小節雖或未盡合理。亦無害也。
吳氏曰此章之言不能無弊。學者詳之。

雙峰饒氏曰此章用之觀人。則可用之律已。則不可。但觀人不可責備。且只看他大節。大節既立。而目小節。且或有出入。亦未可瑣屑議之。若律已之道。又與觀人不同。雖一毫亦不可放。過微有背理。便成欠闕。如何聽他出入得。

梅惠連曰小處若固執。大處反不能不踰閑。如魏穎嫁父妾。屈建不薦芟。從治命不從亂命。小德出入處。正是大德不踰閑處。
張惟適曰出入仍不離閑內。故曰可。可者不執一之意。子夏既言不踰閑。則知小德出入處。非判然與大德相悖也。

金瑯山曰總要人先立乎其大意上。句說得謹嚴。下句正。鞭緊。上句不是寬一步。說話出入字。從閑字生來。若大德未能不踰閑。下便著不得可字。須知出入只對不踰看。猶言不固滯拘謹耳。却非走出在閑外去。

子游曰子夏之門人小子當灑掃應對進退則可矣抑末也本之則無如之何

洒色賣反掃素報反 子游譏子夏弟子於威儀容節之間則可

矣然此小學之末耳推其本如大學正心誠意之事則無有

雲峰胡氏曰集註推子游之言本末者如此然小學大學功夫可分先後不可分本末也故子夏將始卒換本末為穩

子夏聞之曰噫言游過矣君子之道孰先傳焉孰後倦焉譬諸草木區以別矣君子之道焉可誣也有始有卒者其惟聖人乎

別彼列反焉與虔反 倦如誨人不倦之倦區有類也言君子之道非以其末為先而傳之非以其本為後而倦教但學者所至自

有淺深如草木之有大小其類固有別矣若不量其淺深不問其生熟而槩以高且遠者強而語之則是誣之而已君子之道豈可如此若夫始終本末一以貫之則惟聖人為然豈可責之門人小子乎 程子曰君子教人有序先傳以小者近者而後教以大者遠者非先傳以近小而後不教以遠大也又曰灑掃應對便是形而上者理無大小故也故君子只在謹獨又曰聖人之道更無精粗從灑掃應對與精義入神貫通只一理雖灑掃應對只看所以然如何又曰凡物有本末不可分本末為兩段事灑掃應對是其然必有所以然又曰自灑掃應對上便可到聖人事愚按程子第

一。條說此章文意最爲詳盡。其後四條皆以明精粗本末。其分雖殊。而理則一。學者當循序而漸進。不可厭末而求本。蓋與第一條之意實相表裏。非謂末卽是本。但學其末而本便在此也。

朱子曰。非以洒掃應對爲先而傳之。非以性命天道爲後而倦焉。但道理自有先後之殊。不可誣人以其所未至。惟聖人然後有始有卒。一以貫之。無次第之可言耳。須知理則一致。而其教不可缺。其序不可紊。惟聖人分上事。惟聖人道頭便知。始有卒。不是說聖人教人事。乃是聖人分上事。惟聖人道頭便知。尾下學便上達。不是自始做到終。乃是合下便始終皆備。若教學者。則須循其序也。若不知理之無大小。則以洒掃應對爲末而無本。不知教人之有序。而以門人小子欲直教之。精義入神之事。哉。厚齋黃氏曰。形而上。謂超乎事物之表。專指事物之理言也。洒掃應對。事雖至粗。其所以然者。便是至精之理。其日理無大小者。非以洒掃應對爲小。形而上者爲大也。蓋不但至大之事。方有形而上之理。雖至小之事。亦有之。故曰理無大小也。

慶源輔氏曰。學者所得之淺深。如草木之有大有小。類各不同。循其次第等級而教之。若夫先傳後倦。則君子無是心也。但時其可而已。至不察學者淺深生熟之異。而一槩以所謂本者強而聒之。則學者漫而聽之。實不知其味。勉而行之。終不得其方。則是誣之而已。君子教人之道。豈有誣之之理。

蘇穎濱曰。善乎子夏之教人也。始於洒掃應對。而不急於道。使其來者自盡於學。日永月長。而道自至。譬農夫之殖草木。別爲之區。溉種而時耨之。風雨旣至。莫不咸得其性。而農夫無所用巧也。今世之教者。非性命道德不出於口。教者未必知。學者未必信。務爲大言以相欺。天下之僞自是而起。此子夏所謂誣也。

蔡虛齋曰。兩道字。是立教方法。兩孰字。發明教者之心。有始有卒。是有始卽有卒。惟聖人爲然。正以聖人反映門人小子。見必當先教以近小。以申不可誣之意。一節只是教必因材。不可躐施也。金那山曰。此本末先後始卒等字。是眼目。本末只一理。教人却有。序君子之道九句。總是說本末是一不是二。有末便有本。以破子游之見。二孰字。就教者心上看。教有先後之別。心無先後之殊。草木四句。正言教不能無先後處。有始二句。見後先一貫之難也。

子夏曰仕而優則學學而優則仕

優有餘力也仕與學理同而事異故當其事者必先有以盡其事而後可及其餘然仕而學則所以資其仕者益深學而仕則所以驗其學者益廣

新安陳氏曰仕者先盡仕之事有餘力則益及於學學者先盡學之事學既足則始及於仕重在兩優字問仕優則學為已仕者言也不學則無知新之益以資其仕學優則仕為未仕者言也不仕則無行道之功以驗其學仕優不學如源伯魯之不悅學是也學優不仕如荷蓀丈人之流是也子夏之言似為時而發或以為仕有暇則又學學有餘然後仕如此則其序當云學而優則仕仕而優則學今反之則知非相因之辭也朱子曰舊亦嘗疑兩句次序顛倒今云各有所指甚佳

優者所事已完足力尚有餘也學字優字一樣看
金瑯山曰仕學難並說却無論已仕未仕總離不得這個學故仕優便當學必學優方可仕故范石湖曰終身之間有時而不仕無時而不學也兩優字不同上指暇日下有充裕之意學字兼講求體驗舊只說向誦讀上去非是

子游曰喪致乎哀而止

致極其哀不尚文飾也楊氏曰喪與其易也寧戚不若禮不足而哀有餘之意愚按而止二字亦微有過於高遠而簡略細微之弊學者詳之

慶源輔氏曰子游有簡忽禮文之意要之喪固貴以哀而禮之節文亦不可廢故曰直情而徑行戎狄之道也立言之難蓋如此
雙峰饒氏曰子游平日考究喪禮豈廢禮而專事哀戚者考之禮記可見其意恐人事未忘本姑為之抑揚耳

張南軒曰喪主乎哀。致者自盡之謂。若毀生滅性。則過乎哀者也。
金瑯山曰而止二字。有惟盡乎哀。更無別事。一切文飾。都無用處。
子游曰吾友張也為難能也然而未仁

子張行過高而少誠實惻怛之意

蔡虛齋曰為難能。是才高意廣。好為苟難。如尊賢容眾。慕子文之忠。文子之清。皆是。然而未仁。是轉語。上似揚。下似抑。未仁雖在上句見。然子游語氣自婉轉。

金瑯山曰是規切。不是譏刺。為難能。正是受病處。為字著力。有勝人駭俗意。未仁。即在為難內見。然而一轉。特婉其辭耳。未仁非不仁。蓋一意從事高遠上去。近裏著。已工夫。却疎。故曰未仁。

曾子曰堂堂乎張也難與並為仁矣

堂堂容貌之盛言其務外自高不可輔而為仁亦不能有以輔人之仁也。范氏曰子張外有餘而內不足。故門人皆不與其為仁。

子曰剛毅木訥近仁寧外不足而內有餘庶可以為仁矣

新安陳氏曰堂堂以貌言難與以才言皆自高之意並猶共也

慶源輔氏曰務外好高則於己無體認密察之功人不輔之為仁於人無切偲觀感之助己亦不能輔人之仁也

蔡虛齋曰重在己難資其輔一邊

金瑯山曰看以友輔仁一謂曾子意主因人資己上然並字雖兼人已還重惜張一邊堂堂二字無深潛退藏之意故難與為仁

曾子曰吾聞諸夫子人未有自致者也必也親喪乎

致盡其極也蓋人之真情所不能自己者 尹氏曰親喪固所自

盡也於此不用其誠惡乎用其誠

胡氏曰上智之資於理所當然者固不待勉強而皆極其至中人以下則罕能之惟父母之喪哀痛慘怛蓋其真情之不能自己者聖人指以示人使之自識其良心非專為喪禮發也

雙峰饒氏曰乎字有感動人底意思事親莫大於死生之際人之

所必能自盡者也。當此而猶有不能自盡者，獨何心哉？若不看聖人微意所在，只說人人能如此自盡，此言似乎無味。

楊慈湖曰：人心即道，本不假求。因物有遷，始昏始亂。初遭親喪，哀痛由中，全體真實，全無他念慮，純然道心，但人自不覺耳。

金銘石曰：親喪何以自致？天性之愛，不可解，正真不容己。處聖人指以示人，使自察識其心，非專為喪禮發也。

金瑯山曰：此述夫子語，須體貼。未有與必也及乎字，皆是感動人的意思。自致指良心，不必專就致哀說。言今人錮蔽日深，却未有

自致者，必到親喪時，這良心裁發露出來，乎者疑辭，使人自省也。

曾子曰：吾聞諸夫子，孟莊子之孝也，其他可能也；其不改父之臣與父之政，是難能也。

孟莊子魯大夫名速，其父獻子名蔑。獻子有賢德，而莊子能用其臣守其政，故其他孝行雖有可稱，而皆不若此事之為難。

蔡虛齋曰：其他可能也，謂生而能事，死而能哀，皆可能也。獻子有賢德，而莊子能一遵先德，終身不改，是已與親合為一心，克肖象賢，繼志述事，所以難能。

易曦侯曰：此特就不改見莊子之孝，非謂子皆以不改為孝也。善者以不改為孝，不善者又以改為孝。宣王承厲王之烈，改之而周室中興，宋紹聖沿熙豐之法，不改而宋轍北矣。大全南軒說是。

金瑯山曰：此借孟莊子以戒人子之忘親者。皆是述語，其他句就孝行說，輕帶過，只重難能喜新進，便棄黜老成，作聰明，便蔑視成憲。莊子不改，雖是臣與政，可以無改，亦其心不忍忘父耳。難能重，在心之不忍上。獻子歷事三君五十年，魯稱社稷臣，其臣必賢，其政必善。莊子年少嗣立，與季孫宿同朝，宿父文子，忠於公室，不能守而改之，莊子獨不改如此，此所以謂難也。然考莊子父喪方新，盟莒伐邾，以專橫見譏，貽親令名，謂何聖人節取焉耳。其他可能也，一句中便有微辭。

孟氏使陽膚為士師，問於曾子。曾子曰：上失其道，民散久矣。如得其情，則哀矜而勿喜。

陽膚曾子弟子民散謂情義乖離不相維繫謝氏曰民之散也以使之無道教之無素故其犯法也非迫於不得已則陷於不知也故得其情則哀矜而勿喜

勉齋黃氏曰得情而喜則太刻之意或溢於法之外得情而矜則不忍之意常行於法之中仁人之言蓋如此

慶源輔氏曰民之犯罪有二迫於不得已則使之無其道故也陷於不自知則教之無其素故也後世治獄之官每患不得其情苟得情則喜矣豈知哀矜勿喜之謂哉且人喜則意逸逸則心放放則哀矜之意不萌其於斷獄剖訟之際必至於過中失正有不自知者唯能反思夫民情之所以然則哀矜之意生而喜心忘矣詳味曾子之言至誠惻怛而體恤周盡如此嗚呼仁哉

雲峰胡氏曰集註情義乖離不相維繫八字釋一散字情相維繫不忍離義相維繫不可離上之心何忍使之離而至犯法哉虞書曰欽哉欽哉惟刑之恤哉欽恤是形容帝堯好生之心欽則自然有哀矜之心恤則自然無喜之意

陸象山曰訟獄得情最難唐虞惟臯陶見道甚明舜乃使之爲士周書亦曰司馬蘇公式敬由獄賁象亦曰君子以明庶政無敢折獄此事正學者用工處噬嗑離在上則曰利用獄豐在下則曰折獄致刑蓋貴其明也

徐勿齋曰失道二語正犯法根源哀矜二念又盡道根源得情正得其失道犯法之情人喜則易逸逸則必有過中失正而不自知者不然刑訊之下何求不得

雙巖金子曰須知在上有道道即法也民不知道故多犯法犯上之法不得遂民之情也道本情之本法者所以傷無情而之有情也得其情非徒得詭慝奸頑之情在得其民散之情則伸士師之法者此得留士師之心者亦此得

全哪山曰士師雖在刑獄上盡職須先推究到民散根源必無失道方能無失刑非徒不峻刑而已哀矜之念本失道來其窮可憫其窮又可悲推情至此自是勿喜爲士師者無務得其情而當推上之失其道

子貢曰紂之不善不如是之甚也是以君子惡居下流天下之惡皆

歸焉

惡居之惡去聲 下流地形卑下之處衆流之所歸喻人身有汗
賤之實亦惡名之所聚也子貢言此欲人常自警省不可一置其
身於不善之地非謂紂本無罪而虛被惡名也

雙峰饒氏曰子貢非爲紂分疏其意在下兩句。

金瑯山曰要看下流二字言爲惡皆始於一念不自制衆惡便相
引而來猶川澤居下衆水歸之也註欲人常自警二句宜說

子貢曰君子之過也如日月之食焉過也人皆見之更也人皆仰之

更乎聲

勉齋黃氏曰過也明白而無掩覆故人皆見更也瑩徹而無瑕疵
故人皆仰君子所以能如此者只是純乎天理之公而無人欲之

私若此心猶有纖毫私累則諱過而掩匿不改而固吝益重其過
而愈暗愈甚矣豈有日月光瑩之氣象哉

蔡虛齋曰君子心體無私堪與日月並懸故有過亦如日月之食
過是無心偶失或時勢適窮皆是總於心體無損下兩句正見其
如日月之食方其過也不自隱諱人皆得而見之及其更也或覺
悟卽改或事過情蹶人皆欽而仰之如日月食時原是浮翳人皆
諒其過至復明時心事依舊光明人皆快觀故曰如日月之食
金瑯山曰食是日月不能免者同度同道直是避不得君子過亦
然如周公孔子之過是也蓋君子原不是過更只如日月過了那
食的特節便復還光明本體皆見皆仰人皆知其非過耳與過而
能改

衛公孫朝問於子貢曰仲尼焉學

朝音潮焉於虔反 公孫朝衛大夫

子貢曰文武之道未墜於地在人賢者識其大者不賢者識其小者

莫不有文武之道焉夫子焉不學而亦何常師之有

識音志下焉字於虔反 文武之道謂文王武王之謨訓功烈與

凡周之禮樂文章皆是也在人言人有能記之者識記也

新安陳氏曰焉學問何所從學焉不學謂何所不從學此論夫子之學而專言文武之道者蓋列聖道統傳在文武而文武之道統傳在孔子故也文武之道無往不在夫子於文武之道無往不學惟善是主初無常師此所以備斯文之大全集列聖之大成歟

采子曰不賢者只指眾人而言不是不好底的人
蔡虛齋曰焉學一問只見得夫子學識一邊如商羊萍實之類子貢以道言便見得大然亦只淺說方是對公孫語文武之道即堯舜以來相傳之道識大識小不過形容道之在人賢者佩服考求而得其大綱常人傳聞習見而得其一端是道之在人各得其偏而夫子却以全收之此所學之大處師字因學字生有學即有師無不學故亦不可以定師目之語意仍歸結在焉不學上
麻孟璿曰焉不學緊對前焉學看公孫朝疑聖人何嘗學子貢直

說夫子何嘗不學何嘗師一句正是明焉不學一句蓋學有嘗師者學於此遺於彼便有學有不學聖人無常師無往而非道無往而不學也下句從上句生不是兩截語亦不是進一步語

奎瑯山曰師字從學字帶言不宜學師對說問焉學疑夫子生知不須學也說焉不學無常師明夫子終身無適非學也道無小大隨人而在學不泥師隨道而在夫子就文武見道却不離了賢不賢求道就道見文武却不靠著文武求學此處便見聖人徹上徹下學問不專在語言聞見上學字不可說向多學多識須想由會博歸約即小見大得力處方是聖學子貢此言與聖人我非生知不如丘好學二節相發明不是推尊聖人說話天不變道不變何從墜得時至春秋說不墜不得徑說墜亦不得故曰未墜未字須玩時講或牽引憲章文武謂子貢與子思之論合或泥朱子無不學無不師之說師學平看或又單指聖人能自得師不照顧學字又或謂無常師是夫子無師皆誤

叔孫武叔語大夫於朝曰子貢賢於仲尼

語去聲朝音潮 武叔魯大夫各州仇

子服景伯以告子貢子貢曰譬之宮牆賜之牆也及肩窺見室家之
好夫子之牆數仞不得其門而人不見宗廟之美百官之富

牆卑室淺 七尺曰仞不入其門則不見其中之所有言牆高而
宮廣也

得其門者或寡矣夫子之云不亦宜乎

此夫子指武叔

雙峰饒氏曰聖人之道雖曰難入然其入亦自有方且如仰彌高
鑽彌堅此是數仞難入處然其入亦自有方循循善誘博我以文
約我以禮這便是從入之門學者須從此門路入方有所見
蔡虛齋曰由地位勘出識見由識見勘出議論以自已形夫子重
在夫子之道高深難知上宮牆二字不平乃宮之牆也牆言其造
詣賜之牆夫子之牆只頂牆說牆卑故不必入門而見室家之好

牆高故不入門則不知官室之美與官中所有之富只就宮牆說
無一實語喻體也美富影喻禮樂政事必見之真然後言之確今
入門者有幾武叔亦宮牆外望之人耳宜其有卑聖人之言也
金瑯山曰武叔見地卑陋難與深言故只將宮牆比喻宗廟百官
亦只是影語譽子貢處正是要毀仲尼處却不是真知子貢處子
貢晚見用於魯懼吳之強大曉宰嚭而舍衛侯伐齊之謀詰陳成
子而反其侵地魯人賢
之此所謂賢於仲尼也

叔孫武叔毀仲尼子貢曰無以為也仲尼不可毀也他人之賢者丘
也猶可踰也仲尼日月也無得而踰焉人雖欲自絕其何傷於日
月乎多見其不知量也

量去聲 無以為猶言無用為此土高曰丘大阜曰陵日月喻其
至高自絕謂以毀謗自絕於孔子多與祇同適也不知量謂不自

知其分量也

南軒張氏曰子貢善喻如宮牆日月之喻可謂切矣夫丘陵雖高日月尚在其上則可踰矣至於日月之行天則孰得而踰之哉人之議日月者豈能抑之使卑徒為自絕於日月而已矣
金鄒山曰因武叔毀仲尼子貢方發出此段議論使萬世益信仲尼日月中天雖百口交毀於聖人何傷無以為不是教他不要毀聖人直是毀不得其地位甚高憑你毀亦說他不著日月句有指不他洞然心目
何不睹見之意

陳子禽謂子貢曰子為恭也仲尼豈賢於子乎

為恭謂為恭敬推遜其師也

子貢曰君子一言以為知一言以為不知言不可不慎也

知去聲 責子禽不謹言

勉齋黃氏曰言君子一言當即成其為知一言不當即成其為不知知不知係於一言不可不謹尤之言失之不知矣

夫予之不可及也猶天之不可階而升也

階梯也大可為也化不可為也故曰不可階而升也

新安陳氏曰孟子曰大而化之之謂聖由善信美而至於大乃思勉之所可及故曰可為猶可攝階梯而升也至於化則非思勉之所可及故曰不可為非可攝階梯而升也朱子以此發明孔子所以如天之不可階而升之實處然後子貢取譬之意顯然非但言其高也一章通重不可及之意此二句已極摹其德之不可及下就作用言之正如堯之德不可名而止言成功文章也

夫子之得邦家者所謂立之斯立道之斯行綏之斯來動之斯和其生也榮其死也哀如之何其可及也

道去聲 立之謂植其生也道引也謂教之也行從也綏安也來

歸附也。動謂鼓舞之也。和所謂於變時雍。言其感應之妙。神速如此。榮謂莫不尊親。哀則如喪考妣。程子曰。此聖人之神化。上下與天地同流者也。謝氏曰。觀子貢稱聖人語。乃知晚年進德。蓋極於高遠也。夫子之得邦家者。其鼓舞羣動。捷於桴鼓。影響人。雖見其變化而莫窺其所以變化也。蓋不離於聖而有不可知者存焉。聖而達於不可知之謂神矣。此始難以思勉及也。

新安陳氏曰。此章前言夫子之不可及。以其德化之不可為者言也。終言如之何其可及。以其神化之不可測者言也。然正明所謂不可階而升。以曉子禽。非別一意。瞿崑湖曰。通章重夫子不可及上。天德不可形容。即生物而見造化之妙。聖德不可形容。即感人而見神化之速。蓋聖人與天一也。集註程子說得之。

袁坤儀曰。上言不可及。下言如之何其可及。正節正發明上節。勿作兩樣看。感應神速。正見化不可為處。

管東溟曰。聖人分量亦別。有具聖人心體。而作用未必神者。亦未可謂至聖。故子貢又推及夫子得邦家。以究其用如此。

金瑯山曰。為恭。照上二章。勿泛。君子即指言者。美大都有階級可及。化神如何可及。猶天不是說高。天體化神何處。可尋階級。正是曲為摹擬。而不得。所謂云云。是借古語。以擬夫子之神化。生榮見有夫子而天下皆立。皆行皆來皆和。何榮如之。死哀見無夫子而天下即不立。不行不來不和。何哀如之。四斯字。兩也字。正起下如之。何其句。與不可及也。緊相呼應。

下論卷之十九終

男佐臨編正

下論卷之二十一

堯曰第二十章 凡三章

堯曰咨爾舜天之曆數在爾躬允執其中四海困窮天祿永終

此堯命舜而禪以帝位之辭咨嗟歎聲曆數帝王相繼之次第猶歲時節氣之先後也允信也中者無過不及之名四海之人困窮則君祿亦永絕也戒之也

南軒張氏曰以其德當天心故知天之曆數在其躬允執其中事事物物皆有中。天理之所存也。惟其心無依倚則能執其中。此所謂時中也。君之所為安榮者以民故也。天之視聽自我民視聽。若四海困窮則天祿永終矣。聖人之相授。凡以天人之際而已。雙峰饒氏曰守與執不同。執是執其要。如擇乎中庸而不能期月守。方是守。守便易得死殺了。執者隨事隨物而執其中。甚活。程氏復心曰天祿謂天所賦予人君之崇高富貴也。咨字因四海困窮二句而發授命之際。天祿方於此乎始也。而即以永終言之。

四書述 卷之二十一 下論

朱子曰伊川云允執其中中怎麼執得識得則事事物物上皆天
然有箇中在不待人安排安排著則不中矣
新安倪氏曰執非執一定之理蓋於事物上酌其中而執以用之
中庸謂舜用其中即用其所執之中也
雲峰胡氏曰天下之大運之在心此心之用稍有過不及即非中
矣非中則四海將至困窮而天祿亦永終矣
新安陳氏曰天祿永終與天之曆數在爾躬相照應允執其中告
以保天祿之本也四海困窮不能允執其中之驗所以致天祿之
永終也舜之授禹謹述此四句不易一字但辭加詳而理益明意
益盡耳舜之授禹具載於書堯之授舜微弟子記之於此則三聖
人一中相授受之淵源其孰從而知之哉
金瑯山曰曆數句是遺大投艱意執中工夫雖在心運用却在事
執字須活看困窮二句不過反言足上意正見不可不執中處後
來舜命禹亦只這個中總見中的道理不容一毫增減看他三聖
相授處中以外無別
說蓋別說不得也

舜亦以命禹

舜後遜位於禹亦以此辭命之今見於虞書大禹謨比此加詳

朱子曰中只是恰好道理允是真個執得堯當時告舜只說這一
句後來舜告禹又添人心惟危道心惟微惟精惟一三句說得又
細這三句是允執厥中以前事是舜教禹做工夫處人心惟危道
心惟微須是惟精惟一方能允執厥中堯當時告舜只說一句舜
已曉得所以不復更說舜告禹時便恐禹尚未曉得故恁地說後
而謹權量審法度修廢官舉逸民之類皆是恰好當做底事這便
是堯舜禹湯文武治天下只是這個道理聖門所說也只是這個
雖是所聞所記說得不同却只是一個道理堯舜禹湯文武相傳
治天下之法雖纖悉不止此然大要却不出此

蔡虛齋曰記者不增一字正見三聖相傳無別法只是一個執中
精神全
在亦字

曰予小子履敢用玄牡敢昭告于皇皇后帝有罪不敢赦帝臣不蔽
簡在帝心朕躬有罪無以萬方萬方有罪罪在朕躬

此引商書湯誥之辭。蓋湯既放桀而告諸侯也。與書文大同小異。曰上當有湯字。履蓋湯名用玄牡夏尙黑未變其禮也。簡閱也。言桀有罪已不敢赦而天下賢人皆上帝之臣已不敢蔽簡在帝心。惟帝所命。此述其初請命而伐桀之詞也。又言君有罪非民所致。民有罪實君所爲。見其厚於責已薄於責人之意。此其告諸侯之辭也。

朱子曰簡閱也善與惡天皆知之。如天點檢數過人之有善已在帝心。人之有惡已在帝心。
南軒張氏曰有罪不敢赦謂桀得罪於天不敢稽天命而不討。然凡天下之人莫非帝之臣其善惡不可蔽也。則何敢專顧帝所眷命何如耳。已有罪則不敢以及萬方萬方有罪則歸之於已。此自列以聽天命之辭。公天下之心如此也。

蔡虛齋曰此湯既放桀述其初告天伐桀之辭以告諸侯簡在帝心以上重命討上以下重自責有罪於天者不敢赦有德之臣不敢蔽而不舉以其簡閱於帝心蔽則違天之心也。此見命討皆奉乎天而不敢私已有罪固與萬方無與萬方有罪由一人教之不豫處之失宜罪在朕躬此見以天下任之已而不敢諉。
金瑯山曰子小子節皆克夏後語不敢赦以上述初請命之辭。帝臣以下輯寧邦家之辭皆見奉天綏民無敢怠違意朕躬有罪一段只見責己未嘗責人。專重罪在朕躬上帝臣二句卽湯誥聿求元聖與之戮力二句意天下賢人雖不止有莘伊尹尤最著者耳。

周有大賚善人是富

賚來代反 此以下述武王事賚予也武王克商大賚于四海見周書武成篇此言其所富者皆善人也詩序云賚所以錫予善人蓋本於此

蔡虛齋曰言周大賞賚於天下非人人而富之惟善人是富而已紂為天下逋逃主小人得志善人不得吐氣武王此舉所以抑小人而彰有德反紂之舊也

金瑯山曰大賚五節記者零碎收拾繫指出武王當日事實或舉其辭或述其事句句須見反商政政由舊意大賚非專說散財發粟凡列爵分上皆是善人指有功者言雖有周親四句皆武王誓師語周親蔡傳周至也紂雖有至親之臣不如周仁人之可恃百姓二句須想見武王毅然天下已任直欲人人得所同歸於善意與湯罪已意同權量三節件件與民更始皆是順天綏民處凡法之所設與法之所變皆有斟酌在三者皆政之綱承上言四方之政自此次第舉行不指效驗說與滅國繼絕世舉逸民三者天下人心同然故心悅誠服如此重武王能使天下歸心上書武成本交重民五教惟食喪祭引書不言五教者使民養生喪死無憾知慎終追遠固教之本也重字總見立人紀厚風俗意

雖有周親不如仁人百姓有過在乎一人

此周書泰誓之辭孔氏曰周至也言紂至親雖多不如周家之多

仁人

甫軒張氏曰百姓有過在乎一人是武王公天下之心與成湯無以異也此所載帝王之事孔子之所常言門人列於末章所以見前聖後聖之心若合符節其不得時位而在下則夫子之道其得時位而在上則帝王之業

蔡虛齋曰紂雖有至親之多不如周仁人之賢而可恃今將與仁人共治天下俾人人寡過乃可若百姓有過在乎一人此與湯同意與書註迥別此見武王在天下之心弔民因革皆因此起蓋誓師之辭也

謹權量審法度脩廢官四方之政行焉

權稱錘也量斗斛也法度禮樂制度皆是也

蔡虛齋曰謹權量是不其在官者使無過取於民關石和鈞王府則有固要通於官民然紂時必取民過制謹之重在上邊凡以上御下之式俱謂之法其中細微節目為度審者斟酌其因革損益而協於當也脩字照廢字言非脩削之脩紂有廢而不舉之官故

脩舉之。有治。法。又。有。治。人。故。政。行。於。四。方。無。阻。隔。說。在。外。與。天。下。歸。心。一。例。非。以。謹。量。等。就。是。四。方。之。政。行。也。

焦漪園曰謹權量等事紀綱何等嚴肅與滅國等事恩澤何等浩大王者一統規模太和景象備見於此。

興滅繼絕世舉逸民天下之民歸心焉

興滅繼絕謂封黃帝堯舜夏商之後舉逸民謂釋箕子之囚復商容之位三者皆人心之所欲也

朱子曰興滅國繼絕世舉逸民此聖人之大賞兼弱攻昧取亂侮亡此聖人之大罰。

夔峰饒氏曰周有大賚以下夫子零碎收拾或舉其辭或述其事湊成武王一段事實。

蔡虛齋曰興滅繼絕朱註合解耳實非一事興滅國是其子孫微甚國土盡無搜訪尋出一個來封為諸侯繼絕世是其子孫還衆多爵土之遺者猶未盡無扶豎他起來便重膺封爵以承先緒若合二為一則集註三者二字說不去舉逸民專指釋箕子之囚復

商容之位言不可汎說滅國絕世必其先世有功德於民民所欲興欲滅逸民可以長民民所欲舉一如所願所以歸心。

所重民食喪祭

武成曰重民五教惟食喪祭

金瑯山曰帝王事事從民起見食喪祭尤最切民生日用故特重之蓋治平之後禮教興焉此可想當日休息氣象。

寬則得衆信則民任焉敏則有功公則說

說音悅此於武王之事無所見恐或泛言帝王之道也 楊氏

曰論語之書皆聖人微言而其徒傳守之以明斯道者也故於終篇具載堯舜咨命之言湯武誓師之意與夫施諸政事者以明聖學之所傳者一於是而已所以著明二十篇之大旨也孟子於終

篇亦歷序堯舜湯文孔子相承之次皆此意也

雲峰胡氏曰帝王之道不外一中字堯舜以禪讓為中湯武以征伐為中泛言之則曰寬曰信曰敏曰公約言之曰中而已。

蔡虛齋曰人心必有至一者而寬信敏公如應用而形四者典謨訓誥所不載記者見得上數節內已有此意故揭此以結之見帝王之道有所合也得眾人任等作現成看重寬信敏公上

周鹿溪曰四句須想出帝王相傳之要猶云寬則然不寬則未必然下三句皆是此意皆是從心上做惕而治法在其中非專屬武

王一人說集註云此於武王之事無所見蓋未詳此節是總結通章諫承上文武王而言耳

勉齋黃氏曰論語末篇在叙堯舜禹湯武王相傳之道而先之以執中得其要矣其下泛及賞善罰惡責已恕人天綱小紀本數末

度無不具舉蓋帝王之道初無精粗凡事之合天理當人心者是其所以為道也所謂執中正以其事事物物無適而非中耳豈虛

空無據而可謂之中乎

郝京山曰堯曰以下數語虞書不載或云脫簡當在舜讓于德弗嗣之下古文尚書大禹謨載舜命禹之辭別增人心惟危等語疑

後人補緝曆數紀年代世系也古帝王受命首年頒朔易革象曰

君子以治曆明時帝嚳序三辰堯命羲和舜齊七政皆曆數也在

爾躬明不在乎他也中者天下之大本合顯微內外貫天人為一

惟此能軫念四海之困窮為能享天祿以長終即天視聽自我民

視聽三句意曰予以下述湯伐桀告諸侯之辭與今孔書小異大

賚封賞也周頌賚之序曰大封于廟是也周道忠厚故德主善周

親至厚之親忠信曰周周雖尚親不仁雖親必黜仁人非親亦用

如管蔡誅微箕封之類

金那山曰寬信敏公四項不見於典謨訓誥但上數節皆有此意此節只槩論帝王之道舉不外此以垂訓後世耳存疑云此必夫子所常言記者綴於此以盡

四書

卷之二十一

下論

六

子張問於孔子曰何如斯可以從政矣子曰尊五美屏四惡斯可以

從政矣子張曰何謂五美子曰君子惠而不費勞而不怨欲而不貪

泰而不驕威而不猛子張曰何謂惠而不費子曰因民之所利而利

之斯不亦惠而不費乎擇可勞而勞之又誰怨欲仁而得仁又焉貪
君子無眾寡無小大無敢慢斯不亦泰而不驕乎君子正其衣冠尊
其瞻視儼然人望而畏之斯不亦威而不猛乎子張曰何謂四惡子
曰不教而殺謂之虐不戒視成謂之暴慢令致期謂之賊猶之與人
也出納之吝謂之有司

費芳味反焉於虔反出去聲 虐謂殘酷不仁暴謂卒遽無漸致
期刻期也賊者切害之意緩於前而急於後以誤其民而必刑之
是賊害之也猶之猶言均之也均之以物與人而於其出納之際
乃或吝而不果則是有司之事而非為政之體所與雖多人亦不

懷其惠矣項羽使人有功當封刻印刑忍弗能予卒以取敗亦其
驗也 尹氏曰告問政者多矣未有如此之備者也故記之以繼
帝王之治則夫子之為政可知矣

朱子曰仁是我所固有而我得之何貪之有若是外物欲之則為
貪於問政及之蓋治已治人其理一也此吝字說得廣只是戒人
遲疑不決若當賞便用賞遲疑之間澁縮靳惜便誤事機如李絳
勸憲宗速賞魏博將士謂若待其來請而後賞之則恩不歸上矣
政是此意若是有司出納之間吝惜不敢自尊却是本職人君為
政大體却不可如此當與便果決與之
雙峰饒氏曰要行一事須預先告戒使便遵承若不先告戒猝然
責他成就即是暴慢令於前一時却去緊他是慢而賊之也當與
而吝易失人心也是惡上三者是急迫之惡下一件是悠緩之惡
楊氏曰非其義也一介不以予人而不為吝義在可與而惟出納
之吝在有司則為善在為上則為惡天下之事亦惟當其可而已
雲峰胡氏曰四惡虐為甚暴次之賊又次之剛惡也吝如有司不

能專決，柔惡也。吝在有司，不便謂之惡。從政而謂之有司，則惡矣。故特舉項羽以吝取敗之事，以示爲政不知大體者之戒。

蔡虛齋曰：尊五美，屏四惡。一勸一戒也。惠勞等非美，不費等方是美。利卽惠也。利自在民而我因之，如因生於天而養於地，因制於人，因民自有之利而成之，故不費。擇可勞，美在擇字。主意原不在勞，而亦有可勞者，如三農有隙時之可一勞，永逸理之可勞。民忘其勞，故不怨。仁就政上說，亦根心來。欲仁是我心欲立達天下，得仁是果於天下有濟。愈欲愈公，又焉貪。無衆寡以待人言，無小大以應事言，皆以敬心處之，則鎮定凝一。凡所應接舉得其道，自無忙迫，而有安舒自得之意。泰生於敬，非侈肆也。夫何驕。正衣冠，尊瞻視，所謂莊以涖之人，自然生畏，乃德威之畏，非作聲色以耳服民心也。夫何猛。不素教之以善，而殺其不善，謂之虐。比聽令與作，未嘗戒以速成，而速考其成，則爲暴。或故意慢其令於前，而刻期以急於後，是悞民而必刑之謂之賊。總之以物與人而於出此，納彼之際，遲疑吝查，不亟於與，此在有司爲上守財，施予不得自由，故可吝。從政者下同有司，則招怨隳功，甚非所宜。是亦一惡也。王桐庵曰：樹美務滋，去惡務盡。尊屏二字，須說得鄭重。叙五美不言所以尊，尊卽在。美，內理會。叙四惡不言所以屏，屏卽在。惡，內理會。美則與治同道，惡則與亂同事。

會美則與治同道，惡則與亂同事。

鄒嶧山曰：上節言五美之目，下節言五美之實。惠勞等俱是政，美從不費等上見。

吳省庵曰：惠勞之美，是加於民物者，無所累於上，欲泰威之美，是出於身心者，無所愧於下，須知出身加民，皆本諸心，非可分兩截。王芳洲曰：非直屏其虐與暴與賊，尤核其所與，要在猶之二字，闡發隱含下意，如弓矢之賦，車服之庸，緩急疾徐，猶之乎與人也，竟不得以愛惜名器之心於此而別參一念。

金瑯山曰：記者以此附前章之後，見夫子之爲政，蓋與帝王若合符節，尊屏皆心上工夫。從源頭處理會，不在出身加民時，整頓五美曰尊，見奉若典型，必欲出乎身，四惡曰屏，見視如荼毒，不使加乎民，此中得失，間不容髮，關係天下治亂甚大，不可不慎。因民間所自有的爲之，經畫料理，使民受無窮之利，不費公帑，利之所在，卽是惠，不費全在因字內看出。欲卽欲立，欲達欲字，從吾心萬物一體之念而起，原非欲羨於外，隨欲隨得，特與吾源頭萬物一體意思適協耳。卽仁恩遍及本體，未嘗增分毫何貪之有，儻一人忽一事，此心便覺不安，便饒然如不終日，惟件件處得恰好，俯仰不愧不作，何等泰然泰全是主敬內一段，從容光景，故不驕，正衣冠。

尊瞻視。卽恂。慄見於威儀者。不宜淺看。就人之望而畏處。卽是威。此與仁守莊。蒞一例。自不至於猛也。或云惟正斯尊重。上一句誤。易家人傳云。威如之吉。反身之謂也。正是此意。爲政者欲民善。當素教之不教而殺。雖殺當其罪。猶虐也。不戒與慢令相似。但不戒是無令。全不告戒。要立視成其功。急遽無漸。故爲暴。慢令是明明有令。却出之延緩。要刻期取必。有心誤人。故爲賊。出納之吝。不獨傷爲政大體。併無以激勸忠義。此一惡最害事。猶之與人言。均是。要與他的先與固是與。卽延至後。亦是一般要與。何不速與之。乃出納之際。吝惜不果。便似有司爲國守財。而不敢專。必至沮功怠善。與怨生疑。故皆謂之惡。或因前章遂有牽入道心。人心貽美惡。或云四惡與寬信敏公相反。或云尊屏非兩心。尊卽有屏屏卽爲尊。皆誤。

子曰不知命無以爲君子也

程子曰。知命者。知有命而信之也。人不知命。則見害必避。見利必趨。何以爲君子。

不知禮無以立也

不知禮。則耳目無所加。手足無所措。

不知言無以知人也

言之得失。可以知人之邪正。尹氏曰。知斯三者。則君子之事備矣。弟子記此。以終篇得無意乎。學者少而讀之。老而不知一言爲可用。不幾於侮聖言者乎。夫子之罪人。也可不念哉。

朱子曰。此與五十知天命不同。知天命。謂知其理之所自來。此不知命。是說死生壽夭貧富貴賤之命。今人開口亦解說。一飲一啄。自有分定。及遇小小利害。便生趨避計較之心。古人刀鋸在前。鼎鑊在後。視之如無者。只緣見道理。都不見那刀。鋸。鼎。鑊。論語首云。人不知而不愠。不亦君子乎。終云無以爲君子也。此深有意。蓋學者所以學爲君子者。若不知命。則做君子不成。

胡氏曰一定而不可易者命也。人不知命，常求其所不可得，避其所不可免，斯所以徒喪所守而為小人也。輔氏曰必知此而信之，始見利不苟就，見害不苟避，故全得我之義理，所以為君子。

南軒張氏曰此所論命，謂窮達得喪之有命也。不知命則將微俸而苟求，何以為君子乎？知命則志定，然後其所當然者，可得而為矣。禮所以檢身也，不知禮則視聽言動無所持守，其將何以立乎？知禮則有踐履之實矣，知言如吉人之辭寡，躁人之辭多之類，不知言則無以知實情之所存，其將何以知人乎？故知言則取友不差矣。皆學者所當先切要之務也。必以是為本，而後學可進。不然雖務於窮高極遠，而終無所益。門人以此終論語之書，豈無旨哉？

勉齋黃氏曰知命，知其在天者；知禮，知其在我者。知言，知其在人者。知天則利害不能動乎外，而後可以修諸身；知禮則義理有以養乎內，而後可以察諸人。知天而不知己，未必能安乎天；知己而不知人，未必能益乎己。

慶源輔氏曰知命則在我者有定見，知禮則在我者有定守，知言則在人者無遁情。知斯三者則內足成己之德，外足盡人之情，故君子之事備。

雲峰胡氏曰學始於致知，終於治國平天下。前篇之末，與此篇前

二章皆說治國平天下。聖學之終事，此篇復提起三知字，是聖學之始事。知斯三者而為君子，則聖學之體立，遇時而用之，則聖學之用行。弟子記此以終一書，不無意矣。

覺軒蔡氏曰論語首章末以君子言，末章首以君子言。聖人教人，期至於君子而已。詳味兩章語意，實相表裏。學者其合而觀之。

金那山曰此學問道德之要，總括二十篇大指。聖人承天設教，化民成俗，立言垂訓，皆備於此。三知只一知，全不說知的得力處。止說不知的受病處，三無以語氣最緊切，見得裁不知便處處障蔽身心，便沒處安頓正做醒人求知意。程朱及蒙引存疑，主孔註命字，單指氣數說，頗惑後學。葛吧瞻首節為至命，次節為盡命，末節為窮理，尤割裂害道，必不可從。或以命字貫下二節，重知命上，亦非。

論卷之二十終

男師編正

四命

無窮

字單

其必

其不

其立

其同

其立

其立

其立

其立

其立

其立

其立

其立

其立

其立

其立

真和壬戌

